

**NATIONAL ASSEMBLY OF
SEYCHELLES**

Tuesday 15th October 2024

The Assembly met at 9 am

National Anthem

Moment of Reflection

*Mr Deputy Speaker in the
Chair*

MR DEPUTY SPEAKER

Bonzour tou Manm Onorab. Tou travayer Sekretarya. Piblik ki'n zwenn nou e pe swiv travay Lasanble pour sa Mardi le 15 Oktob. Byenveni pour nou sesyon ozordi e sa semenn, ki ava prensipalman dominen avek kestyon e en Mosyon ki lo *Order Paper* pour sa semenn.

Avan ki nou pas lo premye *item*, mon rekonnnet dan galeri i annan en group viziter ki pe vizit nou ozordi. Mon konpran zot sorti dan distrik Port Glaud. Donk, avan ki nou pas lo *PNQ* mon ava zis donn laparol Manm Elekte distrik Port Glaud pou dir en pti mo byenveni pour son bann *constituent*.

HON EGBERT AGLAE

Mersi Mr Speaker. Mon a dir bonzour tou Manm Onorab e

tou dimoun ki a lekout. E en byenveni spesyal pour bann etidyan Primer Port Glaud ki akonpannyen avek zot *teachers*. Mon swet zot en bon lantant. Zot a konpran en pti pe mannyer nou Lasanble i fonksyonnen. Mersi.

MR DEPUTY SPEAKER

Mersi Onorab. Donk, nou pou pas lo premye *item* ki *Private Notice Question* dan non Dirizan Lopozisyon. E mon ava demann Hansard Reporter pou apel delegasyon ki pe reponn kestyon silvouple. Mersi.

MR DEPUTY SPEAKER

Nou ava swet labyenveni parmi nou Vis-Prezidan Larepublik Mr Ahmed Afif ki prezan dan Lasanble pou reponn *Private Notice Question*. E zisteman sa i nou premye *item*. Mon donn laparol Onorab Sebastien Pillay.

HON SEBASTIEN PILLAY

Mersi. Bonzour tou dimoun. Bonzour bann etidyan ki dan Galeri. Byenveni dan Lasanble Nasyonal. Mon kestyon pour Gouvernman i lir koumsa;

Prenan kont ki Prezidan Larepublik ti anonse ki CCCL in ganny lotorizasyon Gouvernman pou rekommans prodiksyon e ki zot in dakor pou met larzan ki zot fer dan

en fon pou ed bann viktim leksplozyon le 7 Desanm:-

- (i) Eski Gouvernman pe dir avek Lepep Seselwa ki CCCL ki responsab sa lensidan?
- (ii) Vi ki i annan en lot fon ki ti'n ganny kree pou asiste tou viktim le 7 Desanm, ki pou arive avek larzan ki dan sa enn fon? Mersi.

MR DEPUTY SPEAKER

Mersi Onorab. Mon envit Vis-Prezidan pour larepons.

VICE-PRESIDENT AHMED AFIF

Mersi bokou Mr Speaker. Bonzour Mr Speaker. Bonzour *Leader Government Business*; *Leader Lopozisyon*, tou bann Manm Lasanble e tou bann envite sorti Port Glaud ki dan galeri, bonzour. E tou dimoun a lekout.

Mr Speaker, mon prezimen ki *Leader Lopozisyon* pe fer referans avek deklarasyon Prezidan le 7 Zilyet sa lannen lo televizyon, kot i ti koz lo lensidan le 7 Desanm 2023, CCCL. E answit bann deklarasyon ki i ti fer dan Konferans Lapres le 12 Septanm 2024.

Parey labitud, *Leader Lopozisyon* ankor in detourn – in ekout parol Prezidan, detourn li pou fer krwar in dir sa ki li i anvi tandé, e apre sey

fer pep Seselwa krwar dan sa mansonz.

Leader Lopozisyon dan son kestyon i dir ki Prezidan ti anonse ki CCCL in ganny lotorizasyon Gouvernman pou rekomans prodiksyon e ki zot in dakor pou met larzan ki zot fer dan en fon pou ed bann viktim leksplozyon le 7 Desanm. Se sa ki ou'n dir. Sa deklarasyon i fo. E mon pou sit sa ki Prezidan in dir le 7 Zilyet lo TV dan son *Discours à La Nation*.

“En konversasyon in komanse avek CCCL lo size kreasyon en fon ki pou asiste dan peyman konpansasyon bann viktim. Sa i ava ganny anonse dan plis detay byento.”

Lo CCCL rekomans prodiksyon. “Bann analiz pe ganny fer e en kon..sil..ta..syon avek bann rezidan i a ganny fer. Pour lemoman CCCL in ganny permisyon pou egzamin son bann masin pou determin zot leta.”

La mon pou sit bann ekstre Konferans Lapres le 12 Septanm mwan pase. “Lo nou kote, lo kote Gouvernman parey mon ti dir dan mon dernyen *Conférence de Presse*, nou, nou annan en konversasyon. E letan mon ti zwenn bann zabitan Cascade, mon ti osi dir avek zot; si zot anvi konpansasyon fodre ki

nou fer ser ten keksoz e fodre ki nou ranpli boutey."

Answit en lot kestyon lo menm size e mon sit li ankor,

"Clive, i pa sa degre fasil. Ki kalite konversasyon ki nou Gouvernman nou annan ouvertman? Ki konversasyon ki nou annan avek CCCL? Se pour nou regarde. E CCCL in dakor pou regarde ki mannyer i kapab rekomans prodiksyon. E avek komite Cascade mon'n dir zot ki poudir nou pou tenir lot konversasyon. Akoz avan ki sa i komanse pou regarde ki mannyer pou tir lanmin, ensidswit. Frekans. Ki frekans ki zot pou tir lanmin, parske nou realize ki poudir bann dimoun in pas dan troma."

Mr Speaker, atraver ou, mon bezwen demann *Leader Lopozisyon*. Ler ou'n ekout sa, be kote ki Prezidan in dir ki CCCL in ganny lotorizasyon Gouvernman pou rekomans prodiksyon? Malerezman Onorab, ou pe detourn parol Prezidan. Sa i ou labitud. E ou ekspekte ki mansonz i pas koman laverite. Me sa i pa pou arive.

Eski CCCL i responsab pour sa lensidan? Sel keksoz mon kapab dir avek ou se ki leksplozyon i ti ariv lo sit CCCL kot i fer son loperasyon. E ki si ti napa leksploziv, sa leksplozyon pa ti pou arive.

Ki lenplikasyon legal lo CCCL? Eski zot pou ganny

sarze pour en akt kriminel? Sa se lenvestigasyon ki pou determinen. Se pa mwan, ni Prezidan ki pou reponn sa kestyon. Me plito Atorni Zeneral ki pou deside. Se li ki annan pouvwar prosekisyon.

CCCL e Gouvernman antretan in deside ki nou bezwen annan en konversasyon pou ed dimoun ki'n ganny afekte. E se sa ki nou'n angaz nou ladan. Lo dezyenm parti kestyon ki dir ki i annan en lot kont ki'n ouver. Sa malerezman i en lot mansonz ankor.

Mon ti ava demann *Leader Lopozisyon* pou dir ek Lepep Seselwa kan sa kont ti ganny ouver e dan ki labank i ete? Parske mon'n sit Prezidan ki in dir egzakteman. Sel fon ki'n ouver i apel *7th of December Disaster Fund*. I annan 4 kont an Roupi, Dolar, Liv Sterlen apre Euro.

Zot annan referans 14200. Sa en kont Roupi. 14201, sa en kont Dolar ; 14202, en kont Liv Sterlen ; 14203 en kont an Euro dan Labank Santral. Tousala i ganny odite. Tou i swiv lenstriksyon finansyel ki Minister Finans i aplike.

Alor, vwala Mr Speaker. I enportan pour nou pa detourn parol nou Prezidan pou kree mansonz. Sa i ariv tro souvan avek *Leader Lopozisyon* dan

Lasanble. Mon a donn zis en legzanp 3 semenn pase.

Dan *PNQ* le 24 Septanm mon ti vin isi menm pour ankor enn fwa koriz en mansonz. *Leader Lopozisyon* ti dir Prezidan in dir ki bann dokter pa zwenn standar lo etik. Prezidan pa'n zanmen dir sa. I ti koz lo direksyon ki i krwar nou devret ale an konparezon avek lezot pei devlope.

Ankor enn fwa dan sa kestyon ozordi, mon oule demanti sa mansonz e fer tou Seselwa konnen ki lo *CCCL* sa ki nou pe rode, se byennet tou zabitan ki'n ganny afekte. E rod sa pli vit posib pour ki lavi dan nou pei e sirtou pour zot, a kapab return parey ti ete avan sa lensidan.

Permet mwan dir Mr Speaker, ki sa size leksplozyon le 7 Desanm, i en size ki preokip nou Ladministrasyon dan en fason profon. I annan en kantite travay ki'n ganny fer pou asiste bann rezidan e *businessmen*. Zabitan Cascade e Pointe Larue i konn sa tre byen.

E Onorab Monthy, mon remersye ou pour sa travay nob ki ou pe fer ansanm avek nou pou rod solisyon dan sa bann letan difisil. Wi, in annan negosyasyon ki'n pran bokou letan.

E ozordi mon annan plezir pou dir ki nou pe ariv en

staz kot mon espere tre byento, Gouvernman pou dan en pozisyon pou fer en konsiltasyon final avek bann rezidan Cascade e biznes Providence. E pou met devan zot serten propozisyon.

E nou annan lespwar ki sa i ava permet nou tonm dakor lo ki mannyer pou bouz de lavan. Se sa fason ki nou, nou travay. Nou fer fas ek nou problem e nou rod solisyon.

Malerezman Mr Speaker, *Leader Lopozisyon* i fer li son labitud envant en mansonz, senm sa mansonz. Fer Seselwa krwar sa bann mansonz. E finalman ou a krwar li osi i krwar dan sa mansonz. I fasil Mr Speaker. Olye donn en koudmen, pran en bout papye, envant en kestyon avek mansonz e fer krwar ou pe rod leklersisman zis pou konfiz Seselwa.

Zabitan Cascade i konnen poudir sa Gouvernman pa travay koumsa. Nou, nou prefere akonpanny zot tou dilon pandan sa moman detres e trouv bann solisyon baze lo realite ki devan nou.

Mr Speaker, isi dan sa Lasanble, nou tou nou bann Dirizan. Nou annan en responsabilite ki enkli anmenn tou nou dimoun ansanm. Konmdir Ton Simon “*Together!*”

(Interruption)

VICE-PRESIDENT AHMED AFIF

Parey lo sa kote zot kontan dir. Me sa pa kapab vin zis parol, apre nou fer le kontrer. Annou pran nou responsabilite, dir keksoz parey i ete. Fer politik i *ok* li, me pa pran labitid mansonzer.

Mon espere mon'n ekliersi sa size e ki pep Seselwa i konpran ki sa bann alegasyon *Leader Lopozisyon* i zis pa korek. Mersi bokou Mr Speaker.

MR DEPUTY SPEAKER

Mersi Vis-Prezidan pour ou larepons. *Leader Lopozisyon*, mon war ou lanmen anler. Ou le demann ou siplemanter la?

HON SEBASTIEN PILLAY

Mr Speaker, mersi. Mon remersi Vis-Prezidan pour son larepons. Non, mon ti le koriz en *misapprehension* akoz anba en *point of order* ki Vis-Prezidan in *mislead* Lasanble.

Si ou a regard mon dezyenm kestyon Mr Speaker, mon'n demann Vis-Prezidan, vi ki i annan en lot fon. Mon kestyon pa mansyonn kont ki mon'n dir kot in kree en lot kont.

Alors se Vis-Prezidan ki pe koz mansonz devan Lasanble. Mon ti a kontan ki ou fer referans ek sa e son

larepons ki'n donnent. E ki i korize ki mon kestyon i demann li ti annan en lot fon ki'n ganny kree, non pa en lot kont.

E li in koz lo en lot kont ki mon'n dir in ganny kree. Alors ki en keksoz ki pa korek ki'n fer devan Lasanble. Mon ti le met sa devan Lasanble. Mersi.

MR DEPUTY SPEAKER

Mon krwar la i vin en kestyon lenterpretasyon fon avek kont, ki dan mon lopinyon i menm zafer. Donk, mon pa krwar poudir i annan okenn *misapprehension* akoz VP in ale pou eksplike legzistans *The December 7th Fund*.

In ariv moman pour nou pas lo bann siplemanter si i annan. E Onorab Manm Elekte pour distrik Cascade ti'n lev son lanmen byen boner.

HON PHILIP MONTHY

Mersi Mr Speaker. Bonzour VP. Bonzour bann zenn sorti Port Glaud anler dan galeri. E mon a profite pou remersye tou zenn ki ti reponn lapel LDS Dimans pou desann an gran nom pour nou Some Lazenès Mr Speaker!

(APPLAUSE)

HON PHILIP MONTHY

Ki montre ki zenn i par deryer LDS isi Sesel. Vis-Prezidan, depi leksplozyon le 7 Desanm, Gouvernman e menm mwan menm nou'n reste angaze dan en travay sanses pou aport soulazman pour bann zabitan. Plis ki R60 milyon depanse; plis ki 400 ekek lakaz repare e sa prosesis i ankor pe kontinyen. Me selman zabitan Cascade pe esper en larepons final lo kwa ki'n arive egzakteman e *the way forward.*

Ou'n koz lo en konsiltasyon final avek biznes ek zabitan Cascade ki pou arive byento. Eski ou kapab a en pti pe pli presi lo sa deklarasyon? Dir zabitan Cascade la bomaten egzakteman si i posib, kan egzakteman - ou'n dir tre byento - kan egzakteman ki sa konsiltasyon final pou ganny fer e en deklarasyon a ganny fer?

Par egzanp mon ti kapab dir ou, eski lafen dimwan Oktob i ava posib pour ki nou kapab ganny sa konsiltasyon e ki zabitan Cascade enn fwa pour tou i ava konnen ki mannyer zot pou bouz devan? Mersi Mr Speaker.

MR DEPUTY SPEAKER

Mersi Onorab. Mon ava envit VP pour larepons.

VICE-PRESIDENT AHMED AFIF

Mersi bokou Mr Speaker e mersi Onorab. Onorab, ankor enn fwa mon felisit ou e tou ou lekip. E mon konnen i annan bokou Manm Lasanble, menm lo sa kote latab ki ti ede pandan sa dezas. E in toultan reste an kontak avek bann zabitan Cascade, Pointe Larue. E menm bann *businessmen.* Alors mersi bokou.

E mon konnen pandan sa letan ou'n travay sanses Onorab. E ansanm avek nou, nou osi nou pe rod tou fason pour nou kapab ed sa bann zabitan Cascade. E parey mon'n dir taler, nou krwar poudir tre byento – e mon'n mansyonn tre byento.

E ou, ou pe sizere ki zabitan Cascade i anvi en keksoz en pti pe pli kler, pli presi. Mon krwar mon kapab donn sa komitman. Mon a donn sa komitman. Mon a diskit ek Prezidan byensir.

Selman mon pare pou donn en komikman ki avan lafen Oktob – avan lafen Oktob nou a kapab vin devan zabitan Cascade. Nou a kapab tonm dakor an diskisyon avek zot e dan en konversasyon lo en fason pou bouz devan. E Gouvernman a fer en serten lanons swivan sa bann diskisyon ek konversasyon.

Sa i en keksoz ki mon krwar nou devret fer. Dimoun Cascade i merite apre sa bann konplikasyon e letan ki zot pe espere. Selman i en keksoz ki mon a donn en langazman lo la. Mersi bokou.

MR DEPUTY SPEAKER

Mersi VP. Onorab Cosgrow?

HON WALLACE COSGROW

Mersi Mr Speaker. Bonzour Mr Speaker. Bonzour tou dimoun. Mr Speaker, dabor ler mon konmanse mon ti a kontan remersi *Leader Lopozisyon* pou anmenn sa kestyon pou fer Vis-Prezidan ozordi dan Lasanble Nasyonal donn en langazman pou kapab donn finalite dan sa sityasyon.

Mr Speaker, mon kestyon bomaten ki mon anvi demann Vis-Prezidan, eski – in koz lo konversasyon, konversasyon e la in donn langazman.

Eski sa konversasyon avek CCCL in fini ganny fer pou zot kapab rekonmans loperasyon e pou kapab annan larzan ki antre dan fon pou kapab ed dimoun Cascade? Eski sa konversasyon in fini ganny fer?

E dezyenm, si i pe dir nou ki CCCL pa responsab, akoz ki CCCL ozordi pe – Gouvernman osi pe demann CCCL pou met larzan dan en fon pou pey bann keksoz ki relye avek sa

lensidan ki'n arive le 7 Desanm? Si i annan en dimoun Mr Speaker ki pe fer dimoun Cascade tourn an ron e konfiz...

MR DEPUTY SPEAKER

Out of context. Pour ou dezyenm parti, si CCCL i responsab. VP in kler dan son larepons pou dir lanket i ava determinen. E mon swete ki nou pa *proceed* dan sa *angle*.

HON WALLACE COSGROW

(Off-Mic)

Mr Speaker!

MR DEPUTY SPEAKER

Alor, premye parti kestyon ki mon pou *allow* lo eski konversasyon avek CCCL in fini? VP...

(Interruptions)

HON WALLACE COSGROW

Mr Speaker! Mr Speaker *point of order* silvouple!

MR DEPUTY SPEAKER

VP, reponn larepons. Mersi.

HON WALLACE COSGROW

Point of order Mr Speaker.

(Interruptions)

MR DEPUTY SPEAKER

Point – mon pe envit VP pou reponn kestyon silvouple.

HON WALLACE COSGROW

Be Mr Speaker, mon annan en *point of order*. Onorab Monthy in fer en pe *statement* laba. Mon pa ganny drwa koze isi mwan?

(*Interruptions*)

MR DEPUTY SPEAKER

Eski nou kapab ganny *order*? Swa nou argimante. Ouswa nou demann *VP* pou kit lasal. Ki zot oule ant le 2? Mon'n donn li *the floor* pou reponn kestyon. So nou permet li fer sa. Mersi.

(*Interruption*)

MR DEPUTY SPEAKER

Hold on, hold on, mon'n deza dir zot, letan mon asiz la anler, mon tann byen ki pase anba. Savedir okenn lekspresyon ofansiv kont okenn Manm – Onorab Loze, pa annan drwa ganny servi. Mon rapel ou *Standing Orders*. Pour lemoman nou pou les pase akoz i pa'n *on mic, ok?* Nou pa kapab tret dimoun avek bann mo ki pa akseptab dan en sosyete modern konmela kot dimoun i sansib avek tou keksoz ki nou dir. *Ok?* Mersi bokou. *VP*, ou ava reponn larepons. Mersi.

(*comments off-mic*)

VICE-PRESIDENT AHMED AFIF

Mersi bokou Mr Speaker. Mr Speaker, lo premye parti son kestyon; si ki nou annan en konversasyon? Eski konversasyon in fini? Non. Konversasyon pa ankor fini.

Mon'n dir poudir nou'n angaz nou dan en konversasyon avek CCCL. I pe kontinyen. E mon'n donn en langazman atraver sa kestyon ki Onorab Monthy in poze, poudir ver lafen Oktob nou ava sorti pou montre kot nou'n arive an term progresyon sa bann diskisyon. Alor vwala Mr Speaker. Mersi bokou.

MR DEPUTY SPEAKER

Mersi *VP*. Mon ava donn laparol Onorab Uranie.

HON ROCKY URANIE

Mersi Mr Speaker. Bonzour bann etidyan e ansenyan sorti Port Glaud, tou koleg Onorab e byensir bann zabitam Zil Pros ki a lekout.

Ler mon pe swiv sa size CCCL, *VP*, lekel ki zot pe proteze e akoz ki ziska preznan zot pa oule en lanket endependan? Mersi.

MR DEPUTY SPEAKER

Kestyon i an deor konteks ki devan Lasanble ozordi bomaten. I pe koz lo responsabilite. *VP* in eksprim sa. E apre kestyon i lo zafer

fon. This question is out of line. It's introducing new subject matter. Refer avek ou Standing Orders. Onorab Aglae?

HON ROCKY URANIE

Chair? Chair be VP in koz *out of context*. I pe dir en bann zafer li osi.

MR DEPUTY SPEAKER

Onorab Aglae, *proceed*.

HON EGBERT AGLAE

Mersi Mr Speaker. Bonzour VP. VP, eski pour Gouvernman *sore CCCL* i pli enportan ki *sore dimoun Cascade*, par lefe ki Prezidan in anons sa fon ki *CCCL* ki pou vin – si i vin an operasyon, pou met larzan ladan?

Anvi ki plizyer dimoun i ankor pe rod rekour e zot pa ankor kapab retourn dan en lavi normal ziska ozordi. Eski *sore CCCL* i pli enportan ki *sore dimoun Cascade*? Mon anvi konnen.

MR DEPUTY SPEAKER

Meris Onorab. Ou kestyion i refer avek premye parti larepons ki VP in donnez poudir i pa'n neseserman sa ki *Leader Lopozisyon* in konpran.

Mon ava donn - pa mwan ki pou reponn. VP, re eksplik Lasanble sa silvouple. Son kestyion i baze lo premye parti *PNQ* bomaten. Mersi.

VICE-PRESIDENT AHMED AFIF

Mersi bokou Mr Speaker. Mr Speaker, Gouvernman son preokipasyon se fer keksoz retourn normal. I annan dimoun pour rezon ki pa zot lafot, zot lakaz in ganny andomaze. I annan biznes pa zot lafot, zot biznes in ganny afekte.

E Gouvernman i krwar poudir li ansam pour nenport ki ki'n enplike dan en fason pour sa sityasyon arriv la, nenport ki, ki anvi donn en koudmen, vin devan. E nou a travay ansam pour nou kapab remet sityasyon normal. Se sa ki nou pe fer. Se sa ki nou pe fer.

Nou'n depans R54 milyon ziska ozordi. Nou'n ouver kont. Nou'n fer dimoun kontribye. Nou'n aranz plis ki 400 lakaz. I annan en kantite fanmir ozordi ki satisfe, ki kontan poudir Gouvernman pa'n zis abandonn zot dan en moman difisil. Nou'n fer tou sa ki nou kapab pou ede. E nou pou kontinyen fer tou sa ki nou kapab.

Alor, se sa kot nou ete. Pour nou priyorite se nou dimoun. Se fer sir ki bann biznes i kontinyen. Valer azoute i kontinyen dan pei. Se sa nou priyorite. Nou napa en lot priyorite. Nou anvi fer sir pei i marse. Lendistri i marse. Biznes i marse. Rezidan zot

lavi i retourn normal. Mersi Mr Speaker.

MR DEPUTY SPEAKER

Mersi Vis-Prezidan. Mon ava donn laparol Onorab Lemiel.

HON SYLVANNE LEMIEL

Mersi Mr Speaker. Bonzour VP. Bonzour tou bann etidyan lekol Port Glaud ek zot ansenyan.

Mr Speaker, mon vwar ki i annan diferan keksoz nou kapab dir i pe ganny diskite an sa ki konsern CCCL. E ozordi VP in vin met devan nou serten an repondan kestyon *LOTO*. Menm si in dir ki kestyon *LOTO* li menm i pa neseserman vre petet sa bann keksoz ki'n ganny mete ladan.

Me kestyon i kestyon. Se ki parey mon'n tann li dir, in annan bann diferan sizesyon. In annan bann diferan diskisyon ki Gouvernman pe mazin fer avek zabitan e osi avek CCCL. En sizesyon petet ki'n ganny met devan se sa reouvertir CCCL. E sa in dir zot bezwen diskite ankor pou vwar si i annan posibilité parey ou'n dir.

VP in osi Mr Speaker, nonm nou ki Atorni Zeneral in fini resevwar rapor CCCL. Me an sa ki konsern tou sa diskisyon ki pe ganny fer pou kapab vwar en solisyon pour zabitan Cascade, pour biznes Cascade, e eski in annan en

aksyon konkret petet ki Atorni Zeneral in anmenn devan Gouvernman ouswa in diskit ek Gouvernman, pour ki i kapab pran an sa ki konsern sa ki'n ganny met dan sa rapor?

Si ou pou konpran mwan byen Mr Speaker, eski Atorni Zeneral in antre dan okenn diskisyon an sa ki konsern sa rapor avek Gouvernman, pou li donn li en desizyon wi CCCL i kapab komans fer sa -

Oubyen tel keksoz i kapab ganny fer koumsa an sa ki konsern faver sa bann zabitan? Mon panse mon kestyon i kler. Mersi Mr Speaker.

MR DEPUTY SPEAKER

Mersi Onorab. VP?

VICE-PRESIDENT AHMED AFIF

Mersi bokou Mr Speaker. Mr Speaker, Atorni Zeneral son rol se resevwar bann rapor lo sa lensidan, egzamin li e deside ki mannyer i pou prosede, swa avek en ka legal oubyen okenn aksyon legal. Se sa son domenn.

I pa pou antre an diskisyon avek nou lo lezot laspe ekonomik oubyen diskisyon, konversasyon ek CCCL. Li son louvraz se pirman lo kote legal e prosekisyon. E se sa ki i pe fer.

E nou, nou pa kapab

zanmen enterfer dan son louvraz parske i endepandan konman en prosekiter li. Se pa nou ki pou vin dir li; la, la ki ou devret fer, eksetera. I endepandan konman Atorni Zeneral lo nivo prosekisyon. E nou kit li koumsa.

E pareyman nou, nou pe anmenn en diskisyon avek CCCL lo nou kote. E bann zabitant Cascade ki primordyal ladan, pour nou regard fason pou bouz devan. E osito ki nou an kapab annan en diskisyon frikye kot nou a kapab sorti ek bann propozisyon kler.

E nou pe dir ki ver lafen Oktob nou krwar nou ann kapab annan keksoz konkret pou met devan bann dimoun Cascade e pep Seselwa. E kekfwa la i ava vin pli kler. Me se koumsa larealite ozordi. Mersi Mr Speaker.

MR DEPUTY SPEAKER

Mersi Vis-Prezidan. Onorab Loze?

HON JOHAN LOZE

Mersi Mr Speaker. Mr Speaker, mon annan zis 2 kestyon. Premye se; VP in koz lo Atorni Zeneral dan son kapasite koman prosekiter. Sa ki mwan mon okouran se ki Atorni Zeneral i egalman Avoka Gouvernman. E tou negosyasyon konpansasyon ki i annan pour Gouvernman

peye, se li ki fer. Parey dan ka PUC Praslin.

Alors mon pe demande si Gouvernman i ganny *found* okenn *liability* dan sa leksplozyon, si pa Atorni Zeneral ki pou negosye dan son plas? Sa i mon premye kestyon.

Mon dezyenm kestyon Mr Speaker, mon le konpran ki mannyer Gouvernman Sesel pe fer diskisyon, konversasyon e konsiltasyon avek en lakonpannyen ki anba len..ves..tigasyon?

E lenvestigasyon pa ankor terminen. Napa en rapor. Personn pa ankor ganny en konklizyon parey li menm li VP i dir. Yet, i annan konversasyon deryer rido pe pase ant Gouvernman avek CCCL ki sipoze anba lenvestigasyon. Eski sa pa pou polye sa lenvestigasyon? Mersi Mr Speaker.

MR DEPUTY SPEAKER

Mersi pour ou kestyon. VP?

VICE-PRESIDENT AHMED AFIF

Mersi bokou Mr Speaker. Mersi Onorab. Non Onorab, mon pa krwar akoz en lakonpannyen i annan en lenvestigasyon ki pe ganny fer otour en lensidan, in ganny deklare koupab ozordi par en Lakour. Napa naryen ki anpes Gouvernman koz ek li.

Nou pa pe siny en lagreman la ozordi. Nou pa pe tonm dakor lo okenn keksoz ki pou dan en fason ou en lot afekte okenn desizyon evantyelman legal ki kapab ganny pran par en Lakour, oubyen desizyon pou prosekite. Se en konversasyon. Napa naryen ilegal an en konversasyon pou get diferan opsyon a lavenir anba diferan sirkonstans. Anba diferan sirkonstans.

Nou bezwen planifye. Nou pa kapab asize sakenn dan en kwen. Nou pe dir; be *arh*, be ou konnen, problem in arive. La nou pa konnen. Mon pa annan drwa koz ek li. Nou annan drwa koz ek tou dimoun dan pei. Nou lib pou fer sa.

Nou tou nou annan en responsabilite pour nou trouv solisyon dan letan difisil. E se sa ki nou pe sey fer. Nou rod solisyon. Nou pa kree dezord oubyen kree konfizyon parmi dimoun.

Nou, nou vvar CCCL. Nou vvar en leksplozyon ki'n arive. Nou war lakaz ki'n kase. Nou war biznes ki'n ganny enteronpe. E dimoun ki'n perdi dyob. Dimoun ki'n perdi zot bann mwayen, alor, konman en Gouvernman responsab, nou louvraz se sey etablir lord. Pa anpes - dan sa prosesis etablir lord, pa anpes prosekisyon fer son louvraz.

Pa pou anpes Lakour demen, si zanmen Atorni Zeneral i dir fodre fer en prosekisyon. Pa pou fer sa sorti lo ray akoz nou, nou pe koz ek zot.

Alor nou, nou anvi en konversasyon. Nou anvi rod en fason pou bouz devan pour ki zabitant i trouv en semen pase. E kot zot lavi i a retourn normal. Mersi bokou Mr Speaker.

MR DEPUTY SPEAKER

Mersi VP. Mon pou donn laparol Onorab Gill.

HON CHURCHILL GILL

Mersi Mr Speaker. Bonzour bann marmay sorti Port Glaud. Bonzour tou dimoun ki pe ekout nou.

Mon annan 2 kestyon. Mon premye kestyon; nou pe apres 1 an apre ki sa lensidan leksplozyon in arive. E dapre larepons ki VP in donnen, in annan bokou konsiltasyon avek bann dimoun Cascade ki'n ganny afekte.

Alors mon kestyon pour VP; eski sa fon ki'n ganny kree pou donn lasistans sa bann dimoun Cascade, i ase? oubyen se sa ki pe fer sa konversasyon kontinyen?

E si sa i leka, vi ki nou pe apres lafen lannen 2024 e Fon Dezas i deza annan serten sonm ladan, nou osi annan *Contingency Fund* ki la lannen pe al terminen e tou sa bann

fon – petet pou soulaz dimoun Cascade, ti ava annan en desizyon ki pran.

E vi ki nou pe apros 1 an la kot sa bann dimoun Cascade ti a kapab ganny asiste atraver sa bann diferan posibilite, ki enn fwa pour tou sa bann ki ankor pe espere i a kapab ganny en solisyon.

Apre mon dezyenm kestyon se, kestyon Onorab Pillay i lo CCCL, mwan mon ti anvi konnen, dan sa konversasyon ki ou'n dir nou ou pe fer; eski i konsern CCCL Praslin? Akoz pour lemoman, nou pe osi ganny difikilte pou ganny materyo laba. Mersi.

MR DEPUTY SPEAKER

Mersi Onorab. Pour ou dezyenm kestyon, mon konpran ou pasyon pour ou zil. Me selman nou ava *limit* li lo CCCL Mahe.

E donk nou ava koz lo sa; eski i annan ase larzan ki reste dan fon? E si *contingency* i antre? Mon krwar *that was the question*. Mersi.

VICE-PRESIDENT AHMED AFIF

Mersi bokou Mr Speaker. Mersi Onorab. Onorab, sa ki mon konnen se ki larzan ki ti'n ganny anmase dan bann – sa 4 kont anba *Emergency Fund – Disaster Fund* ki'n ganny kree, in preski ganny servi preski tou. Ti annan environ en 48

milyon si mon pa tronpe. Be selman detay i ava ganny donnez swivan tou bann odit e tou bann analiz ki a ganny fer byento.

Selman preski tou larzan in ganny servi. I annan larzan osi ki'n ganny servi atraver *Contingency Fund* pou ede. Nou, nou priyrite se fer sir ki otan ki nou kapab, nou anmenn sa bann lasistans imedyat ki nou bezwen pou donn nou dimoun. Nou bezwen fer sa en priyrite parske lavi i bezwen tourn normal.

Si i pou bezwen annan ankor lezot larzan a lavenir. Sa en keksoz ki ava ganny deside an konversasyon avek bann dimoun Cascade. E byensir an konversasyon avek Minister Finans.

E mon espere ki ver lafen Oktob ler Gouvernman a kapab vin en pe pli kler avek en plan ki'n ganny diskite avek zabitant Cascade ki pratik, ki i kapab marse. La zot ava ganny plis detay. Mersi bokou Mr Speaker.

MR DEPUTY SPEAKER

Mersi VP. Onorab Labrosse?

HON RICHARD LABROSSE

Mersi Mr Speaker. Dabor mon ti a kontan dir bonzour bann zelev sorti Port Glaud e tou dimoun ki a lekout.

Mr Speaker, mon annan en pti kestyon senp. Mon pa konnen si VP in aborde oubyen en pti pe profon; nou pe koz lo bann viktim leksplozyon le 7 Desanm. E nou konnen bann viktim i pa zis bann zabitan Cascade. E sa i osi enkorpor bann biznes dan Providence.

Vis-Prezidan mon ti a kontan konnen si lo kote bann biznes dan Providence si zot annan en konversasyon osi ki pou al lo menm laliny parey ou pe eksplike, ki pou enkorpor bann zabitan?

Apre mon dezyenm kestyon, eski Gouvernman i satisfe ki in fer otan ki i kapab ziska la pou ed zabitan Cascade, e osi komite biznes parey mon premye kestyon in demande? Mersi Mr Speaker.

MR DEPUTY SPEAKER

Mersi Onorab. VP?

VICE-PRESIDENT AHMED AFIF

Mersi bokou Mr Speaker. Mersi Onorab. Wi, Gouvernman in toulstan an diskisyon, non-selman avek bann rezidan Cascade. Me avek bann biznes.

E nou'n fer tou sa ki nou kapab dan sa bann letan pou ede ouver laport pou fer zot kapab ganny serten lasistans. Parey ou konnen, menm lo kote tax nou ti donn serten

konsesyon pandan en peryod letan, pou permet zot kapab respire dan sa letan difisil; repar zot landrwa, eksetera.

E sa konversasyon pou toulstan kontinyen Onorab, parske nou, nou la pour nou soulaz zot dan en moman difisil. Parey mon'n dir, pour laplipar sa bann biznes se pa zot lafot. Set en aksidan. En lensidan. En leksplozyon. Zot pe ganny - en lanket pe ganny fer ladan. Me sa bann biznes pa zot lafot zot. Zot, zot in ganny afekte. E nou, nou la pou ed zot dan sa letan.

Byensir dan nenport ki propozisyon a lavenir ki pou annan, zot osi zot pou ganny enkli dan diskisyon. Nou bezwen pran kont tou sa ki annan pou fer avek zot, parske zot osi zot ganny kouver anba lasirans. Serten zot. Pa tou keksoz ki'n ganny kouver.

Alor, nou pou travay kot a kot avek bann biznes e bann rezidan pou kapab zisteman ed zot dan sa moman difisil. Mersi bokou Onorab.

MR DEPUTY SPEAKER

Mersi. Ou dezyenm kestyon i ti pe demande, si Gouvernman i satisfe ki in fer otan?

VICE-PRESIDENT AHMED AFIF

Wi Mr Speaker, nou pe fer otan ki nou, nou kapab. Otan ki nou kapab. Otan ki Bidze i

permet nou. E byensir parey ou konnen Onorab, e atraver ou Mr Speaker.

Ler ou, ou bezwen ede dan bann letan difisil e ou konnen ou lanyllop i en sel groser, souvandfwa ou bezwen fer serten sakrifis dan lezot landrwa. E alor kot nou'n kapab nou'n tant pou met larzan dan sa bann proze sa i retard serten lezot proze. Me nou rod otan posib finansman kot nou kapab pour nou permet sa arive.

E si pou annan bezwen – e mon konnen zot fek pas en Mosyon pou aprouv Bidze Siplementer. Tousala i enkli dan bann travay ki nou, nou pe fer. I pa pou zanmen ase. Me nou pou fer otan ki nou kapab. Mersi bokou.

MR SPEAKER

Mersi VP. Mon pou donn laparol Onorab Spiro.

HON RACHEL SPIRO

Mersi Mr Speaker. Bonzour Mr Speaker. Bonzour tou dimoun ki a lekout. Bonzour VP.

Mon kestyon i an referans avek larepons VP. VP in mansyonn en aksidan dan pe reponn son kestyon. E pli boner Prezidan ti'n dir pou dir i annan en lenvestigasyon kriminel ki pe deroule e probableman i en case kriminel.

E la nou pe koz osi konpansasyon e bann konversasyon ki pe deroule otour lensidan CCCL. Mon ti a kontan konnen kan finalman nou pou kapab ganny rekour avek determinasyon lanket ki'n ganny fer dan sa lensidan?

E osi an relevans avek sa fon, eski nou kapab war larzan sorti dan Fon Dirzans pou asiste sa bann dimoun CCCL pou pey zot konpansasyon, e osi finalman war en rekour dan sa lensidan?

E osi nou pe mazin sa lanket la, ki son *outcome* e ki CCCL pou fer pou ed sa bann dimoun li si li i koupab dan sa case? Mersi.

MR DEPUTY SPEAKER

Mersi Onorab. VP?

VICE-PRESIDENT AHMED AFIF

Mersi bokou Mr Speaker. Mr Speaker mon pa kapab donn ou en dat pour en travay ki Atorni Zeneral pe fer an term son analiz e desizyon si pou fer prosekisyon. Nou, nou pa pou antre ladan. Lapolis i fer son lanket. I rod tou son lenformasyon, i pas li avek Biro Atorni Zeneral.

Zot, zot kapab demann ankor kestyon. Zot kapab demann ankor lezot lanket. E mon pa konnen konbyen letan sa bann keksoz i arive. E

byensir, parey tou dimoun ti a swete, nou ti a kontan ki i ti ariv pli vit posib. Me selman pa tou keksoz ki ou annan tou lenformasyon la pou kapab tonm lo en konklizyon e fer sa deswit.

Alor, mon pa konnen konbyen letan i pou pran. Me selman nou swete ki Biro Atorni Zeneral avek lenformasyon ki i pe gannyen ek lapolis ek tou lezot dimoun, ki i a kapab fer sa osito posib.

Sa bann peyman ki nou, nou pe fer atraver sa fon ki'n ganny kree. Wi, nou'n pey otan ki nou kapab. I pa ti ase, e Gouvernman in servi larzan dan *Contingency Fund* osi pou *top up*. Tou sa bann detay i ava pli kler dan deklarasyon ki a ganny fer lafen Oktob. Mersi bokou Mr Speaker.

MR DEPUTY SPEAKER

Mersi VP. Mon pou donn laparol Onorab Arissol.

HON SANDY ARISSOL

Mersi Mr Speaker. Bonzour VP. Bonzour tou dimoun ki pe ekoute. Letan nou pe get lapant kestyon Mr Speaker, ou vvar poudir i parti US se zot pe rod zis larzan. Tou zot kestyon i *about* larzan. E parey zot konnen, tou bann kof bann kod in sanze lo la. So, zot pa pou ganny akse avek larzan definitivman.

So, mon ti a kontan demann avek ou VP, lo menm kestyon laliny kestyon ki Onorab Richard Labrosse in demande, eski - byento nou pe al 1 an, eski apard bann difikilte ki mon tande la ozordi, eski in annan bon keksoz ki'n arive Cascade pour bann dimoun? Eski lakaz in refer? Dimoun in ganny asiste? I annan dimoun ki'n retourne kot li?

Konmsi i enportan pour nou osi konnen pandan sa 1 an. Akoz mon rapel menm moman ki Cascade ti pe fer fas avek sa difikilte, Sesel an zeneral, Moris osi zot ti pe fer fas avek enn. Me zot pa'n ganny asiste parey.

Me eski nou Gouvernman, eski in asiste dimoun Cascade? Dir nou. Nou bezwen konnen sa. Eski zot in ganny asiste dimoun Cascade? Biznes Providence, eski in annan en koze avek zot? Zot in ganny asiste? Konmsi sey dir nou, parske mon ganny lenpresyon poudir depi leksplozyon, napa naryen ki'n arive Cascade. E bann kestyon i kontinyen monte. Be napa naryen bon. Mon anvi konnen anvi ki mwan mon reste Bel Ombre.

I annan en kantite keksoz bon ki'n ariv Bel Ombre kot nou. partaz avek nou VP, si dimoun Cascade i osi annan keksoz ki byen ki'n

arive kot zot, apard bann keksoz mal ki mon tandé? Dir nou. Mon ti a kontan konnen silvouple. Mersi bokou.

MR DEPUTY SPEAKER

Mersi Onorab. Mon ava envit VP pour larepons.

VICE-PRESIDENT AHMED AFIF

Mersi bokou Onorab. E mersi Mr Speaker. Mr Speaker, si nou *rewind* nou retourn le 7 Desanm e nou get sityasyon ozordi. Mwan mon rapel tre byen. Ti annan en ta lakaz Cascade tol ti'n leve, laport ti napa, lafnet ti napa. Dimoun pa ti konnen. Ti pe al reste kot zanmi. Zot ti per.

Biznes ti'n fermen. Ti parey en landrwa ki en bonm in pete dan *Gaza* ou a krwar. I ti en landrwa difisil. En landrwa danzere. En landrwa kot dimoun pa ti konnen ki zot pe fer e pa ti konnen ki pou fer.

E sete la nou avek Gouvernman nou'n antre. Ziska ozordi, preski R60 milyon in ganny depanse pou aranz plis ki 400 lakaz. Nou'n ede avek tou sa bann biznes pou al akote zot, pou akonpanny zot e pou dir zot lo kote *tax eksetera*. Nou'n donn zot en dele letan pour zot peye. Nou'n ed zot tousala.

Nou'n ede fasilit bann mouvman, sirtou atraver Ladwann pou permet zot

kapab fer vin keksoz. Pou donn zot *tax breaks* lo sa bann keksoz ki zot pe fer - zot pe envestir ladan. E pou fer sir ki zot kapab re debout koman biznes.

Nou'n fer sir ki tou bann zabitant Onorab, bann zabitant plis ki 400 lakaz. I annan ki nou'n dir ziska 1 milyon nou ava fer zot gannyen pou rekonstrir zot lakaz. Bann ki'n ganny kondannen. E bann lezot kot i annan domaz, nou'n sey antre pou fer sa ki nou kapab. E in difisil, parske materyo li menm ti napa.

Me ozordi, ler ou regard sityasyon konpare ek le 7 Desanm, ozordi ou war plis ki 400 lakaz ki'n ganny repare. Dimoun zot lavi pe retourn normal. I pa pou zanmen retourn parey i ti ete pour bokou zot, parske zot in tromatize, eksetera.

Me selman zot lo zot lipye. Zot zanfan i annan en landrwa pou dormi. Zot annan en twatir. Zot laport i fermen. Zot lafnet i fermen. E i annan lezot ki petet pa ankor fini finaliz tou detay. I annan ki kontrakter osi par ler i ganny retar.

Pa tou keksoz ki annan pou fer ek Gouvernman. Me nou konman en Gouvernman nou'n fer tou sa ki nou kapab pour nou ed zot. Tou sa ki nou kapab nou'n met de kote.

E mon ti a kontan profite pou remersye tou dimoun ki'n ede. Parske i annan bokou dimoun. I annan biznes ki'n vini ki'n donn kontribisyon ek Gouvernman. I annan Gouvernman aletranzé ki'n vini li osi in donn en kontribisyon. Zot in rekonnet poudir nou pe travay, nou pe fer keksoz. Larzan ler ou donn konman en kontribisyon, i al pour sa ki ou dir ou pe al fer.

E nou'n fer sa bann keksoz. Nou'n remet lenfrastriktir annord. Elektrik nou'n met annord. Delo pe marse. Biznes pe marse ozordi. E tousala i bann keksoz pozitiv ki pe arive dan nou pei ozordi! Pozitiv!

Be selman, ler mon ekout bann kestyon ou a krwar naryen pa'n arive. Ou a krwar konmsi nou ankor parey le 7 Desanm. Nou pe esper en rapor e nou pa konnen kot nou ete. Be, nou'n fer en kantite.

E nou dan konversasyon zisteman pour nou trouv ankor lezot solisyon pou fer sir parey Prezidan in dir, ki nou anpli boutey pou boutey kapab vid en ver delo.

E se sa lafason nou, nou pe bouz devan nou. Nou, nou anvi al devan pou fer sir tou dimoun i ganny keksoz. Tou dimoun lavi i retourne normal e nou, nou pou kontiny dan sa direksyon.

Nou pa pou al dan negativite. Nou pa pou pesimis. Nou pou optimis. Nou pou travay pour pep Seselwa. Nou pou donn zot lespwar. Nou pou fer zot war poudir avek en Gouvernman *LDS*, nou la pou travay pour zot. Mersi bokou Mr Speaker.

(APPLAUSE)

MR DEPUTY SPEAKER

Mersi Vis-Prezidan. Dernyen *round kestyon* lo sa *PNQ*, nou retourn kot loter kestyon e sa se Onorab Pillay.

HON SEBASTIEN PILLAY

Mersi. Mon ti a kontan par demann ou lendilzans pour mwan sit parol Prezidan ki i ti dir dan son *Press Conference* ki *VP* pa'n met devan piblik Seselwa. Ok, apre ki in koz lo konversasyon. In koz lo *CCCL* i rekomans travay, ki dayer travay in fini ganny konmanse lo *CCCL*. Ok?

I ti dir; "larzan ki zot ranmase avek lavant materyo i ava al dan en fon." Mon annan sa *video* la ki mon kapab donn Lasanble. Mon kapab donn piblik Seselwa. "Larzan ki zot ranmase avek lavant materyo i ava al dan en fon." I pa mwan ki pe koz mansonz. Se Vis-Prezidan dan sa Lasanble ki pe koz mansonz!

So, mon premye kestyon ki mon le demann Vis-

Prezidan; ou ou'n dir dan Lasanble la ki sa leksplozyon ti en aksidan. Ou dir i annan en rapor ki'n al kot Atorni Zeneral. Prezidan i dir ti annan en lanket kriminel.

Lekel ant ou rapor e Prezidan ki pe koz laverite, si i annan en lanket kriminel ki mannyer i kapab determinen poudir sityasyon i en aksidan? Sa i premye kestyon ki nou annan pour Vis-Prezidan.

Dezyenm kestyon. Si CCCL pa koupab – si i pa responsab pour naryen, akoz Prezidan pou fer sa *statement* ki dir “larzan ki zot ranmase avek lavant materyo i ava al dan en fon”? So, lalang e mansonz se ou ki pe koze dan Lasanble! E i ou labitid koz mansonz dan Lasanble. Ou pa dir tou laverite e ou kasyet laverite.

(APPLAUSE)

HON SEBASTIEN PILLAY

Sa ki ou pa pe dir ek pep Seselwa. Par egzanz Mr Jeffrey Delorie i dir mwan *remind* ou ki...

MR DEPUTY SPEAKER

Onorab Pillay.

HON SEBASTIEN PILLAY

Li i pa ankor ganny peye ek lasirans...

MR DEPUTY SPEAKER

Onorab Pillay, dir Mr Delorie si i annan en *issue*, ekrir sa landrwa spesifik. Rod en apwentman. Al fer sa. Lasanble Nasional i pa landrwa pou anmenn problem personnel Mr Delorie.

(Interruption)

MR DEPUTY SPEAKER

Ou pa kapab mansyonn – get ou *Standing Orders*. Get ou *Standing Orders* ki i dir ou, ou pa kapab mansyonn non dimoun dan Lasanble. So, can you please get back.

HON SEBASTIEN PILLAY

Standing Order i osi dir pou dir mon kapab servi...

(Interruption)

MR DEPUTY SPEAKER

Onorab, Onorab, mon pe koz avek ou, e ou *Standing Orders* i dir ek ou letan Speaker pe koze ou ekoute. Ok?

Now, Mr Delorie ki ou'n mansyonnen. Ou ki'n mansyonn son non. Pa mwan. Ok? La son *MNA* laba. Mr Delorie si ou pe ekout mwan, pran kontak swa avek Ladministrasyon Distrik Cascade ouswa Lofis *MNA* Cascade i ava rezourd sa problem. Ou retourn lo ou kestyon an relasyon avek ou *PNQ* silvouple. Mersi bokou.

HON SEBASTIEN PILLAY

Mersi bokou. Pour benefis dimoun Cascade mon a kontinyen avek mon kestyon. Ok?

Prezan kestyon ki nou annan pour ou ankor, MNA Cascade in bezwen servi mon kestyon pou demann ou kan zot sipoze annan en *meeting*. Me selman ou, ou dir poudir ou'n an konversasyon ek MNA Cascade. Me selman in bezwen vin demann ou la anndan ki dat.

Me selman ou Prezidan in dir lafen Fevriye ki nou pou tann keksoz ankor lo sa zafer. So ankor enn fwa, lekel ant ou, MNA Cascade e Prezidan ki pe koz laverite?

(*Interruption*)

HON SEBASTIEN PILLAY

Swa ou pe koz lalang ek Lasanble...

MR DEPUTY SPEAKER

Onorab, *Question Time is not – pa en letan pour ou fer en largiman e akiz larepons ki pe donnен. Si ou annan en kestyon, demann sa kestyon e nou ava proceed. Eski ou annan en kestyon siplemanter Onorab?*

(*Interruption*)

HON SEBASTIEN PILLAY

Mersi Mr Speaker. Mr Speaker, Vis-Prezidan i devret kapab dir nou zot in anvoy en rapor kot Biro Atorni Zeneral. Prezidan in dir dan son parol pour li, CCCL pou pran larzan lo lavant materyo e met dan en fon.

Travay in konmanse kot CCCL menm avan le 7 Zilyet ki Prezidan in vin lo medya pou koz lo la. Akoz dimoun in sirkil *video bulldozer* pe konmans travay, selman lanket ti ankor pe ganny fer.

Alors nou le demann ek Vis-Prezidan; kan eski dimoun Cascade enkli bann *businessmen Providence*, pou war finalite dan sa sityasyon e Gouvernman i aret fer zot vir an ron? Mersi Mr Speaker.

MR DEPUTY SPEAKER

Mersi. Mon krwar VP in deza donn sa larepons. Ou ava pas lo la ankor VP. Mersi.

VICE-PRESIDENT AHMED AFIF

Mr Speaker, mersi bokou. Mon krwar Onorab pa konnen ki kestyon pou demande akoz mon'n fini reponn tou sa ki in dir. Prezan zis pe vir an ron.

Ti annan en morso kot in *quote – i quote* Prezidan i dir Prezidan ti dir "larzan zot ava ranmase avek lavant e i ava al dan en kont." Me i pa lir antye sa *statement* ki Prezidan...

E la mon montre ou mannyer ou pe koz – mon a montre ou ki mannyer ou pe detourn sa parol. Ou pa lir antye sa ki in dir ou. I ti dir “CCCL dan sa konversasyon ki nou pe fer avek zot parski nou bezwen osi mazin materyo konstriksyon, zot in pare pour zot dir. Zot in pare pour zot dir, larzan ki zot ava ranmase avek lavant materyo i ava al dan en fon ki ava ganny *managed.*” CCCL in pare pou dir sa e nou dan konversasyon.

(Interruption)

VICE-PRESIDENT AHMED AFIF

Nou dan en konversasyon. Gouvernman pa'n zanmen dir i pe al ouver en kont. E sa ki ou pe sey fer pep Seselwa krwar. I en *statement* fo Onorab.

I fo e ou pe mal enterpret tou sa ki ganny dir. Ou pran bout ki ou anvi, ou ekoute. Mon pa konnen si ou krwar ladan apre ou anvi pep Seselwa krwar. Be ou pa pou anbet dimoun isi.

(Interruption)

VICE-PRESIDENT AHMED AFIF

E mwan sertennman ou pa pou anbet mon ek sa bann kalite *statement*.

(APPLAUSE)

(Interruption)

VICE-PRESIDENT AHMED AFIF

Mr Speaker, lo kote prosekisyon. Mon pou repepe akoz i pa paret ou atann ler nou koze. Lenvestigasyon pe ganny fer. Lenformasyon i donn kot Atorni Zeneral. Li i pou analize, i pou fer prosekisyon.

Antretan i annan en konversasyon ki pe pase pour nou trouv solisyon pour nou bouz devan. Onorab MNA Cascade, Onorab Monthy i an diskisyon a tou moman avek nou. Ou, ou pa konnen ki pe pase. Onorab Monthy i konnen ki pe pase!

Parske i an konversasyon avek son pep. I an konversasyon avek nou. I konn byen li. Ozordi sa ki in sey fer. Parske nou pa ti ankor aranze en dat nou. E ozordi i pe ensiste parske i lager pour son dimoun parey toulstan in fer. E son dimoun pou donn li ankor en vot an 2025.

E i pe dir avek nou i anvi fer sa pli vit posib. E ozordi nou'n tonm dakor – apre ki in fer sa pwen, nou'n tonm dakor avek li ki lafen Oktob nou ava vin pli konkret swivan bann diskisyon e konversasyon ek

dimoun Cascade. Mersi bokou Mr Speaker.

MR DEPUTY SPEAKER

Mersi Vis-Prezidan. Sa in anmenn nou lafen *Private Notice Question* pour ozordi bomaten. Nou ava remersi Vis-Prezidan pour son prezans e dir li bonn kontinyasyon lazournen. E i kapab fer son depar a sa moman. Mersi Vis-Prezidan.

Mon zis *remind* Lasanble ki ozordi nou dan prezans bann etidyan. Se tou ki mon anvi dir zot. Mersi bokou.

Nou ava aprezan bouz lo nou dezyenm *item* lo nou *Order Paper*. E sa i *Questions for Oral Answer* ki kestyion 114 ziska kestyion 221. Nou ava demann *Hansard* reporter pou apel delegasyon ki pou zwenn nou bomaten. Mersi. Nou ava dir bonzour e byenveni delegasyon ki fek zwenn nou la bomaten. Delegasyon ki dirize par Minis pour Transpor Mr Antony Derjacques.

E lo *head table* i akonpannyen par Sef Egzekitif lakonpannyen *Air Seychelles*. Sa i *Captain Sandy Benoiton*. I osi annan Mrs Nichole Mancienne ki *Head of Commercial* kot *Air Seychelles* avek Ms Veronique Nibourette ki *Chief Policy Analyst* dan Minister Transpor.

E lo *side table* nou annan Sef Egzekitif Lotorite Por Mr

Sonny Payet. *Welcome* dan Lasanble Nasyonal. E premye kestyion ki *panel* pou reponn se kestyion 214 ki dan non Manm Elekte pour Distrik Anse Royale, Onorab Lemiel.

HON SYLVANNE LEMIEL

Mersi Mr Speaker. Bonzour Minis avek ou delegasyon. Mon kestyion i al konn swivan;

Eski Minis i kapab enform sa Lasanble e osi bann pasyan ki al fer tretman lo zot menm aletranze, spesyalman bann pasyan kanser, si en laranzman i kapab ganny fer avek *Air Seychelles* pou organiz en *package* spesyal a en pri rezonnab pour sa group dimoun spesifik, etandonnen ki souvandfwa zot tretman i prolonge e zot war zot pe depans vreman bokou lo pri adisyonnal pou tiket avyon akoz ki zot pann desann sa dat ki zot ti sipoze? Mersi.

MR DEPUTY SPEAKER

Mersi Onorab. Mon ava envit Minis pour son larepons.

MINISTER ANTHONY DERJACQUES

Mersi Mr Speaker. Bonzour *Chief Whip*. Bonzour *Leader of the Opposition*. Bonzour tou sa ki pe ekout nou bomaten. Mersi pour sa kestyion Onorab.

Air Seychelles konman laliny aryen nasyonal i deza pe ofer son soutyen a bokou bann

pasyan ki al trete aletranze. Sak ka i ganny trete lo en *case by case basis*, tout an pran kont bann Polisi entern ki gid bann proze parey.

Par egzamp, dan sityasyon kot en pasyan i war son lekor kwense aletranze avek en nesesite pou bouz son dat retour, akoz zot tretman in prolonge, *Air Seychelles* pe deza kennsel sa fre ki normalman ganny aplike pou fer sanzman avek tiket.

Pou asir bon gouvernans, kriter ki kliyan i bezwen obzerve i enkli; prezantasyon sertifika medikal, ouswa lezot dokiman ki prouve ki sa ka i otantik.

Propozisyon pou ofer en lof spesyal spesifikman pour tou bann pasyan prive ki pe al trete, i pa soutenab baze lo bann bon pratik komersyal aryen. Savedir *revenue management*, ki enkli bann fakter parey sezonnalite.

I osi enportan pour nou tou note, ki *Air Seychelles* i ankor pe obzerv sa *rescue plan* ki ti ganny met an plas pou asir profitabilite soutenab e son legzistans pour bokou lannen ankor.

Par kont, dan letan *low season*, *Air Seychelles* i ofer bann promosyon ki ganny servi byen par tou manm piblik, ki osi enkli bann pasyan medikal.

Fodre note ki *Air Seychelles* i reste angaze avek tou pep Seselwa pou ede kot i kapab otan ki posib, anliny avek son bann responsabilite sosyal dan en fason responsab pour li pa antre ankor dan bann sityasyon problem finansiel, parey detrwa lannen pase. Mersi Mr Speaker.

MR DEPUTY SPEAKER

Mersi Minister. Onorab Lemiel, ou siplemanter.

HON SYLVANNE LEMIEL

Mersi Mr Speaker. Mersi Minis pour ou larepons. Minis, i annan serten pwen ki ou'n fer resorti ki par egzamp – bi ki mon'n anmenn sa kestyon ozordi se akoz pasyan dan mon distrik ki'n dir mwan demann sa.

E petet sa bann serten pasyan zot pa okouran prosedir pour zot kapab ganny sa rekour ki ou'n dir, ki *Air Seychelles at times* i annan de ka ki i retir sa larzan an plis. Ki dapre sa pasyan ki li in dir mwan ti R7 mil ki li i ti bezwen peye zis akoz i ti'n *postpone* son retour apre son tretman ki ti'n prolonge. I R7 mil diferans ki i ti bezwen peye. E ki sa i bokou Mr Speaker.

So, Minis annou eksplik en pasyan byen ki trouv li dan sa sityasyon ozordi e ki bezwen retournen petet Zanye – pe bezwen retournen.

E ki si ler i ariv laba i dir li poudir ou tretman pou bezwen prolong ankor e i ariv li menm ka, ki ou advise sa pasyan pour li fer? Lekel ki i kontakte? En pe pli an detay letan ou'n ganny loportinite pou reponn sa kestyon, ki egzakteman i bezwen fer? Lekel ki i kontakte pour li kapab war en rekour? Mersi.

MR DEPUTY SPEAKER

Mersi Onorab. Mon ava envit *panel* pour larepons.

MINISTER ANTHONY DERJACQUES

Mr Speaker, lo sa bann pwen ki teknik, mon a pas avek CEO Air Seychelles Captain Benoiton. E o bor li i annan osi Mrs Mancienne ki lo sa komite ki osi ed *Captain* pour li fer sa bann desizyon.

Selman mon le *emphasise* i en komite ki annan 4 dimoun lo la. Mersi Mr Speaker. Eski *Captain* i kapab koze?

MR DEPUTY SPEAKER

Mersi Minister. Sertennman, *Captain* Benoiton?

CEO AIR SEYCHELLES CAPTAIN SANDY BENOITON

Mr Speaker. *Leader* Lopozisyon dan Lasanble, tou Manm Lasanble, bonzour. I pou pli fasil pour mwan les sa kestyon a Mrs Mancienne akoz

i en kestyon teknik e plizoumwen ver komersyal.

Be selman i enportan pour nou realize ki dan menm larepons ki nou ti pe prepare, nou realize ki sak ka i ganny gete separe. Akoz nou dir sa?

Nou'n fer resorti ki i annan sezonnalite. Par egzanp; *let's say* ou pe sanz ou tiket dan Zen as an example, en. Zen i en letan ki nou konsider li *low peek* Sesel an zeneral. So nou avyon i annan plis plas lo la.

En avyon – vreman en *airline* i pa fer larzan dan Zen. Ou fer larzan 365 zour dan en lannen. Ou *average* li *out. That's why* nou pe koz lo *revenue management*. Ou *manage* li parey en lotel depi Zanvye ziska Desanm. Tiket i menm ganny vann aepre 11 mwan davans. So tousala i bezwen ganny konsidere.

So, si nou annan bokou dimoun ki pe tir dan sa letan kot nou pe sorti dan Zen, meton nou pe al dan – ou pe pou li pour Out as an example. Therefore, i pou vreman afekte profitabilite.

Me par kont, e nou annan en bon pe kliyan ki ler zot call nou advise zot si zot pe *travel*. E mon war ki bokou dimoun deza pe servi bann loportinite ki nou deza pe gannyen.

Si i en keksoz en pe pli grav, ou bezwen regete. Be

selman si bann *normal checkup* eksetera, nou pou advise. Parey ou konnen, bann dimoun Seselwa i ase sarz. Zot in realize ki i annan sa bann letan sezonnalite. *And they are using it very well.* Bokou dimoun i pe servi li dan bann letan e zot aste sa bann package boner. *And that's how we do it.*

Be selman zeneralman, pour bann dimoun ki pe bouz zot *flight*, i annan 2 fre ki ganny kontenir. I annan sa fre kot ou sarz li *for the date change. Which is normal.* Tou *airline* i fer.

Plus, apre i annan sa fre baze lo sa seat – konbyen sa seat i vo dan sa period of letan. Akoz sa *seat* pa kout menm pri toulezour pour sak dimoun. Ok? So, mon ava pas laparol avek Mrs Mancienne ki i ava donn ou en pti pe plis detay lo la. Mersi.

MR DEPUTY SPEAKER

Mersi *Captain.* Mrs Mancienne?

HEAD OF COMMERCIAL AIR SEYCHELLES NICOLE MANCIENNE

Mr Speaker bonzour. *Leader Lopozisyon e tou bann Manm, bonzour.* Zis pou azout lo sa ki *Captain Benoiton* in dir.

I vre ki letan nou annan sanzman pou fer lo tiket *based on nou revenue management,*

nou annan *the fare difference from once class to another.* Apre plis, i annan sa pri ki nou sarz zot pou sanz sa tiket.

Nou kot *Air Seychelles to date*, tou sa bann *request* ki nou'n gannyen sorti kot pasyan ki annan en *medical certificate.* Nou'n *waive* sa *fee*, enkli sa dimoun ki pe *travel* ek li. Normalman en pasyan i *travel* avek en *attendant.* So, to my knowledge, zanmen mon krwar nou'n refize pou *waive* sa *fee.*

I vre ki Manm Onorab Lemiel in mansyonnen ki i annan en pasyan ki'n ganny en *quote R7 mil.* Zis pou konpran, dan sa *R7 mil* normalman i enkli sa *fare difference* akoz nou *flight* i ganny *revenue managed.*

Bann keksosz ki nou'n fer, bann konsesyon ki nou'n fer par egzanp si i vreman, vreman nou war i ser, akoz sa pasyan ti boukte dan en *class vreman* ba, par egzanp dan en promosyon. Apre ler in ler pour li sanze i trouv li dan en *class vreman* o. So nou sey *compromise.* Nou donn zot en pri *in between.* Apre nou toulstan *waive* sa *additional change fee.*

Sa nou fer li san okenn – mannyer ou kapab dir? Toulstan nou fer li. Nou toulstan fer li akoz – selman *provided you have en medical certificate.* Mersi.

MR DEPUTY SPEAKER

Mersi Mrs Mancienne? Onorab Lemiel, ou annan klarifikasyon?

HON SYLVANNE LEMIEL

Wi, Mr Speaker. Mersi. Akoz mon santi i pa'n ase sorti byen. Mon ti'n demande petet, konmsi *how do that person go about?* Konmsi, ki mannyer i fer? Kote i avoye? Lekel ki i kontakte letan li i laba deor, in pri koumsa? Kote i avoye? Lekel ki i kontakte, dan sa laliny? Mersi.

MR DEPUTY SPEAKER

Mersi Onorab. Panel?

**HEAD OF COMMERCIAL AIR
SEYCHELLES NICHOLE
MANCIENNE**

Ok. Normalman, tou nou bann pasaze zot konnen poudir nou annan en lofis ouswa zot demande. Swa dan sa bann pei kot zot ale, *obviously*. I annan ki vin direkteman kot nou dan nou lofis Sesel. Par *WhatsApp*, par *email*. So, sa i vin dan nou *Call Center* normalman.

Par kont i annan dimoun ki kekfwa i konn *Captain Benoiton* ouswa i konn mwan, i vin direk kot nou. Be selman adres ki ganny *published*, par egzanz lo ou tiket si ou annan okenn *query*, ou vin kot nou *Call Centre*. Prezan nou *Call*

Centre li i pou avoy sa kot nou pour nou aprouve.

Parey mon'n dir, toultan letan i annan sa *change fee*, nou *waive*. Prezan si i annan leres keksoz, *the committee will* deside. Nou fer en desizyon. Me tou – mon krwar tou pasyan i konnen kot pou ale. Pa zis pasyan. Tou nou bann dimoun ki pe *travel* i konnen ki bor pou ale.

So, mon krwar nou byen *publish* nou bann kontak kote zot pou kontakte si zot annan okenn sanzman ouswa okenn issues, pou pran kontak ek nou. Mersi.

Sorry. Madanm Lemiel i annan en *additional question*.

MR DEPUTY SPEAKER

Sertennman. Wi, lekel ki ti le – i annan en *additional* Onorab?

HON SYLVANNE LEMIEL

Wi. Si sa tiket in aste ek en lot lazans, ki i fer dan sa ka?

MR DEPUTY SPEAKER

Madanm Mancienne?

**HEAD OF COMMERCIAL AIR
SEYCHELLES NICHOLE
MANCIENNE**

Ok. Tiket kantmenm i aste ek lezot lazans, *the contract is between Air Seychelles and the passenger*.

So, annan de fwa zot al kot zot lazans. Kantite fwa zot al kot zot lazans. Zot lazans i

konnen kot pou vini. Pou vin kot nou, swa dan nou *Call Centre*, swa kot nou *manager* ki ansarz *local market*. Which is the Seychelles Market.

So, *irrespective* kot ou aste ou tiket; ou kapab vin direk kot nou, ou kapab al kot ou lazans.

MR DEPUTY SPEAKER

Ok, Onorab. Nou ava donn laparol Onorab Labonte.

HON ANDY LABONTE

Mersi Mr Speaker. Bonzour Minis avek ou *panel*. Minis mon kestyon i plizoumwen - petet vi ki mon'n tann *panel* in dir zot pa'n zanmen refize.

So, si zot ti annan statistik avek zot, konbyen fwa in arive kot zabitan petet in apros zot dan bann tel sirkonstans parey?

E petet mon pran sa lokazyon osi pour mwan remersye *Air Seychelles*, akoz mwan a plizer fwa mon'n fer kontak avek *customer service* e mon pasyan in kapab ganny asiste.

E petet lo kestyon ki Onorab Lemiel in demande direkteman; eski i annan okenn lenstans ki li Onorab Lemiel li menm in pran kontak avek zot lofis pour ed enn son zabitan ki war li dan en tel sirkonstans? Mersi.

(*Interruption*)

MR DEPUTY SPEAKER

Mersi Onorab. Mon pa konnen si *panel* pou le – akoz i en zafer ant Onorab Lemiel avek *Air Seychelles*, e i pa en keksoz ki nou ti pou anvi i al piblik. So, nou pou inyor sa dezyenm kestyon. Me, eski zot annan okenn statistik lo lakantite ka ki'n ganny ede?

MINISTER

DERJACQUES

ANTONY

Sel keksoz avan mon pas avek CEO. Mon oule dir ki mon konsyan akoz mon osi mon ganny en kantite bann aplikasyon. Mon anvoy drwat kot – pa en kantite. Enn de bann aplikasyon, mon anvoy drwat kot CEO. E ler mon koz avek CEO, CEO i dir mon e i fer li. I call son *panel* e zot get tou bann ka, par ka.

Tou bann dimoun ki mon konnen zot in ganny en pe led. Mon pa pe dir ki tou sa ki zot demande zot in gannyen. Solman i annan sa fleksibilite ek sa diskresyon akoz nou tou nou Seselwa, sa nou *national airline*.

Solman parey mon'n reponn dan mon *regional question*, nou bezwen reste toultan konsyan ki *Air Seychelles* fek sorti dan ladministrasyon. Savedir i ti pe al ganny li *liquidated*. Posibilite ti la.

I ti annan son det par lao 142 milyon *Euro* ki nou ti

bezwen fer en *rescue plan*. Pey bann *bond holders*. Pey bann det e restriktir *Air Seychelles*. E en kantite dimoun in fer en kantite sakrifis.

Bann sanzman dan bann saler, ki ankor en fwa mon salye *top management*, bann pilot, bann enzenyer *Air Seychelles* ki zot in fer en kantite sakrifis. Mon salye tou sa ki'n ede ki'n ed mwan osi pou *rescue Air Seychelles*.

Alor Polisi i ase kler lo *Air Seychelles*. *Air Seychelles* i kontinyen travay lo en *commercial basis*. Solman i annan en konsyan. I annan en *social responsibility*, kot i kapab ed son bann sitwayen. Solman sa i ganny deside ka par ka.

Lo bann statistik, mon a demann *CEO* si i annan avek li. Si i napa, i ava ekrir Onorab Labonte. I ava donn ou tou bann statistik. Solman mon ava pas avek *CEO*, avek ou permisyon Mr Speaker.

MR DEPUTY SPEAKER

Sertennman Minis. *Captain?*

CEO AIR SEYCHELLES **CAPTAIN SANDY BENOITON**

Ok. Mersi pour ou kestyon. Senpleman mon pou reponn ou sa, mon pou dir ou non, nou napa statistik lo la. Akoz nou pran li en keksoz – i en *normal part of* nou loperasyon.

Nou pa pran li konman en keksoz spesyal parey nou dir, akoz toulstan – menm kantmenm nou ti dan problem, nou'n toulstan note nou annan sa responsabilite sosyal. So *by doing that*, pour nou i *normal business*. So nou kapab *go back and try to retrieve the information*.

Be konpleksite i vin kot parey Minister in dir. E menm bokou Manm Lasamble i deza annan mon nimero. So, si i annan okenn – oubyen mon *email*. Si i annan okenn dimoun ki vin direk kot zot pour bann okenn sirkonstans, zot anvoy li direk kot mwan. E toulstan *as much as possible*, kot nou kapab fer nou fer li.

So, i pa pou zanmen en problem. Me solman *it will be difficult to get that exact information* akoz i vin parpiye. Me solman nou kapab anmase e nou ava fer ou gannyen. Be solman *its part of normal business*. I pa en keksoz ki nou pe fer nou kapab dir i *super special, because we know we are a state-owned enterprise, and we know our corporate responsibility*.

E nou konnen ki nou bezwen balans tou lede pou fer sir ki – *at the end of the day their shareholder, which is also the people of Seychelles*, i kapab ganny serten rekour oubyen rezouir of sa bann

travay ki ganny fer Air Seychelles. Mersi.

MR DEPUTY SPEAKER

Mersi Captain Benoiton. Mon note lentere Lasanble dan sa size. Me nou bezwen toulstan mazin *time management*. I reste ankor 3 Manm ki ti'n eksprim lentere pou demann kestyon lo la. 2 Manm US avek en Manm LDS.

Me i en size ki mon envit Komite Lasanble, Lasante. I osi annan NGO osi parey *Cancer Concern* e medya nasyonal, pou eksplwat sa size ankor en pe plis. Me mon satisfe ki *panel* in donn bann larepons neseser ki loter kestyon ti bezwen.

Donk, nou pou fini sa sesyon la e nou pou eskiz Mrs Mancienne parmi nou. E i pou ganny ranplase lo *head table* par Mr Payet ki CEO *Seychelles Port Authority*. Mersi pour ou letan e partisipasyon Mrs Mancienne.

Nou pou kontinyen avek nou sesyon *Questions for Oral Answer*. E nou ava osi remersi Captain Benoiton osi ki'n fer son depar dan Lasanble. Donk, mersi pour son partisipasyon. Nou ava envit Onorab Churchill Gill, Manm Elekte pour distrik Baie Ste Anne pour kestyon 215.

HON CHURCHILL GILL

Mersi Mr Speaker. Bonzour *panel*. Kestyon i lir koumsa; Eski Minis i kapab dir sa Lasanble konbyen *port fees* e *passenger fees* ki'n ganny anmase avek piblik, espesyalman ek zabitan ek biznes *cargo* Praslin e La Digue? E eski *Port Authority* i annan nide pou vin ankor avek lezot *fees* dan lefitir? Mersi.

MR DEPUTY SPEAKER

Mersi Onorab. Mon ava envit *panel* pour larepons. *Minister?*

MINISTER ANTHONY DERJACQUES

Mersi Onorab Gill. Bonzour *Leader of Government Business*. Kot i konsern *port fees* Mr Speaker, depi Zanvye ziska Out 2024, Lotorite Por Sesel in anmas en total R17 milyon 747 mil 904 ek 55 sou, ki'n ganny anmase kot i konsern tou lede *fees*; *local berth fees dues* ek *local passenger fee*.

Kot i konsern biznes *cargo* lo Praslin ek La Digue, Lotorite Por Sesel in anmas en sonm R527 mil 715 depi Zanvye ziska Out 2024 sa lannen. I enportan note ki i annan bann derogasyon ki'n ganny etablir dan Lalwa, ki'n osi donn lavantaz bann biznes bato *cargo*, ki fer ki zot in ganny en *fee* spesyal.

Apartir 7 er diswar ziska 5 er bomaten dan wikenn, si zot in fer lakostaz e pe reste *overnight*, sa i en konsesyon ki nou fer. Sa i zis R15 par erdtan dan plas R 210 parey normal kot i sipoze aplikab.

An plis, kot i konsern konze piblik, okenn *fee* pa aplikab si zot in fer lakostaz. Adisyonnelman, Lotorite Por Sesel in osi fleksib an term ki i annan bato ki bezwen reste avek lasose pandan letan ki zot an reparasyon. E sa Lotorite pa sarz zot okenn *fees* pour sa. Me zot bezwen enform sa lotorite avan davans pour zot ganny permisyon pour zot kapab antreprann bann louvraz reparasyon.

Kot i konsern laplikasyon bann lezot *fees* dan le fitir. E ler aktyel – *à l'heure actuelle*, por napa okenn plan pou ogmant sa bann *fees*. En logmantasyon pou depan lo devlopman ekonomik ki arive dan le fitir. Me avan sa i arive, si i arive, pou bezwen annan en seri konsiltasyon entansif pour nou kapab desifre si en logmantasyon pou fezab ouswa non.

Parey nou ti fer pour sa bann *fees* ek bann *dues*, nou ti fer en seri konsiltasyon. Alor, nou pa pe anvizaze fer okenn *increase*. Solman, si a lavenir sa Lotorite i vvar ki i neseser, sa ki nou'n fer i a ganny repete e tou dimoun

pou annan zot *say*. E nou pou gete si i fezab. Mersi Mr Speaker.

MR DEPUTY SPEAKER

Mersi Minister. Mon pou envit Onorab Gill pour son siplemanter.

HON CHURCHILL GILL

Mon premye – mersi Minis pour ou larepons. Premye siplemanter i koumsa;

Pandan sa letan, parey Minis in eksplike ki kantite larzan ki'n ganny anmase. Mon kestyon alors; ki *Port Authority* i anvizaze fer avek sa bann larzan?

Mon dezyenm kestyon; dan sa bann *fees*, ti osi annan kot Seselwa ki sorti Mahe i desann Praslin e tournen menm zour ti sipoze pey zis *one-way*. Pa sipoze pey 2 fwa. I annan konsern ki serten dimoun zot santi par fwa zot pe ganny demande pou pey 2 fwa. Alors si *CEO* i kapab eksplike dan ki lenstans ki sa bann keksoz koumsa i arive? Si i arive? Oubyen si kekfwa i annan lezot faktor ki pe kontribye pour sa.

E mon trwazyenm kestyon; Touris ki vizit Praslin ek La Digue, zot naturelman bezwen pey sa. Me mon kestyon; eski Lotorite pe anmas sa larzan avek kliyan ki al Ste Anne avek Silhouette,

akoz zot osi zot bezwen servi bato?

E mon lot kestyon. Eski de lavan i annan posibilite kot Lotorite i a kapab vwar, donnen sityasyon ekonomik ki pa ankor amelyore parey petet nou ti ava apresye, ki sa Lalwa i ganny revwar pour lemoman ziska ler keksoz i re aranze - nou santi kot sityasyon ekonomik i re aziste. Mersi.

MR DEPUTY SPEAKER

Mersi Onorab. Mon ava envit *panel* pour larepons.

MINISTER ANTHONY DERJACQUES

Mersi Mr Speaker. Mon pou *combine* kestyon nimero 1 avek nimero 4. Apre CEO i ava antre lo nimero 2 avek nimero 3 lo Ste Anne avek Silhouette spesifikman. Savedir lo touris.

Mr Speaker, mon a donn zis enn de *chiffre* kot por in bezwen larzan pour li devlop bann lenfrastruktir. Zis mon pou konmans avek en pti *anecdote*. En pti keksoz ki mon kontan dir partou dan lemonn.

Sesel ler i ti ganny kolonize, premye keksoz ki ti ganny devlope ler nou ti sorti Ste Anne pour nou vin Mahe dan en fason pli serye. Sa bann Franse avek zot lesklav se kree en por.

Si ou napa en por, ou napa koneksyon, ou pou napa

transportasyon. Ou bezwen bato koste pour ou fer devlopman. E ler ou'n fini fer ou por, ou bezwen semen pour ou al devlope pour ou met lendistri, lakaz, rezidans. E pli tar, komersyal.

Par egzanp; ler Langleter ti koloniz Lanmerik, premye keksoz ki zot ti fer zot ti al laba, zot ti antre dan en *safe harbour*, zot ti fer por. Apre por i vin en laval. Be i menm parey Sesel. Apre 50 an, apre tou sa bann lannen, por ek transpor in bezwen refer lenfrastruktir Sesel. Enkli Mahe ek La Digue.

Par egzanp; sa *passenger jetty* Eve Island ti kout R34.9 milyon an 2021. La Digue Jetty an 2023 ti kout nou R24.6 milyon. *New Eves Island Passenger Terminal building* ki'n apel "ERO" ti kout nou R18 milyon. La nou pe gete ki mannyer nou pou met bann *super structure*. Savedir en terminal La Digue.

An plis ki sa, nou fini fer *letter of interest*. Nou'n fini negosye. E sa semenn nou ankor pe zwenn ankor *European Investment Bank* avek *African – L'agence Développements Français*.

E Zedi pou annan *Euro Seychelles Political Dialogue* pour nou kapab konkretiz final e siny tou dokiman neseser pou garanti ki nouveau Por Victoria i ganny etablir. E

sa pou kout de dizenn de milyon *Euro*.

Kot sa bann larzan i ale, Onorab in demande, i al dan enfrastriktir pour devlopman nou pei. I al pou fer novo Por La Digue, Praslin, Mahe. I al pou moderniz por.

Par egzant nou'n met en *new management information system* kot tou keksoz i ganny *digitalised* elektronik dan Por Victoria. Kot nou nepli bezwen anmenn *manual*, bann papye kot tou bann *stakeholders*, bann *shipping agents*, bann bato, bann dimoun ki delivre.

Tou keksoz. Imigrasyon, *Customs*, *Tax*, *Revenue* i konekte lo en *single platform*. Nou pe lev Por Victoria ek SPA. Nou pe moderniz li. Se la kot tou larzan i ale.

Sa bann larzan i pa ganny tire dan *Consolidated Fund*. Nou pa kapab tir li avek zot atraver *tax*, akoz se zot *tax* ki al dan *Consolidated Fund*. Nou pe pran *loan*. E nou bezwen fer en *analysis* finansye pour nou re pey nou bann *loan* avek *EIB*, avek *L'agence Développements Français* e tou bann *local loan* ki nou'n pran.

Sa bann *fees* ti ganny byen regarde, kalkile, analize pou kapab fer ki Por SPA, *Port Authority* i reste vyab, soutenab. I kapab pey son bann det e i kapab osi angaz li dan plis devlopman.

Mr Speaker, si okenn keksoz i arive avek sa bann *fees*, ouswa okenn sanzman, sa pou met en danze tou bann proze por. Annefe *CEO* i ankor enkyet. E tanzantan i vin dan mon biro. E nou koz lo ki pou arive dan 3 an, 4 an. Akoz i annan bann *analysis* ki dir ki nou pou kapab ganny en difikilte dan 3 an, dan 4 an.

Alor la nou pe plan pour 3 an, 4 an ki mannyer nou kapab fer sir ki *SPA* i reste vyab. I ranpli son manda e pep Seselwa i ganny bann enfrastriktir ; *Businessmen* i ganny bann enfrastriktir pour zot fer zot biznes.

E Por Victoria i vin modern. I vin *accessible*, *seamless*. E *businessman* i kapab dan en fason fasil, fer enport bann *goods*, bann marsandiz. E tir zot dan por, anmenn dan zot bann *warehouse* ek laboutik.

Mr Speaker, mon krwar ki mon'n kouver lo nesesite e kestyon nimero 1 avek 4. Mersi. Eski *CEO* prezan i kapab tous en pe lo nimero 2 ek nimero 3?

MR DEPUTY SPEAKER

Sertennman *Minister*. Ou ti dir li nimero 2 lo zafer pey 2 fwa. Avek nimero 3, touris, Ste Anne avek Silhouette. *Proceed*.

CEO SPA SONNY PAYET

Mersi Mr Speaker. Bonzour tou dimoun. Mon krwar Minis ou'n adres bokou bann keksoz pertinan ki nou bezwen met lo latab ozordi dan sa Lasanble.

Me kestyon ki Onorab Gill in poze se en kestyon ki nou osi dan por nou pe adrese, se ki nou bezwen normalize. Nou bezwen fer sir kot tou i annan bann *revenue leakage*, i ganny adrese.

E se pour sa nou'n dir pour lemoman nou pa pe war okenn tarif sanzman, akoz nou pe pti ta pti remet lo latab tou bann – Par egzanp Onorab in mansyonnen ki arive avek en bato ki al Ste Anne; ki arive avek en bato ki al Silhouette. Sa nou pe adrese.

Me pli gro ankor ki nou pe adrese se donn pour bann traze bato enteril ki nou pe koz Praslin, La Digue, pou fer sir ki tou bann reveni ki Gouvernman in met lo latab pour nou, pour nou anmase pour nou kapab a lonterm fer nou bann devlopman, i ganny anmanse korekteman.

Onorab, mon kapab garanti zot, mon kapab garanti sa Lasanble ki sa bann regar ki nou pe zete lo Silhouette, lo Ste Anne tre byento, kekfwa boner lannen prosenn, nou a vin en fason kot nou kapab kontrol nou bann facilite portyer. Nou kapab osi kontrol bann dimoun ki'n navig dan

nou *limit* portyer. Mersi Mr Speaker.

MR DEPUTY SPEAKER

Mr Payet, ti annan sa kestyon bann dimoun ki pey 2 fwa.

CEO SPA SONNY PAYET

Mersi Mr Speaker. Mon pa'n tann bokou dimoun ki'n pey 2 fwa. Si Onorab ki responsab son *contingency* lo Praslin, kekfwa i bezwen annan. Si i permet mwan, mon ava kapab adres li e vvar avek bann propriyeter bato - bann ki *run* bann *ferry*, pou vvar kwa vreman pe arive.

E menm si i posib ki *MNA* Churchill i kapab apros mwan dan en *forum* ki tanzantan mon pas Praslin, pour nou kapab diskrit ansanm e vvar, adres sa sityasyon e normaliz li. Mersi Mr Speaker.

MR DEPUTY SPEAKER

Mersi Mr Payet. Onorab Gill, ou annan klarifikasyon?

HON CHURCHILL GILL

Mersi Mr Speaker. Mersi pour bann leksplikasyon ki'n ganny donnen.

Lo premye leksplikasyon ki'n ganny donnen konsernan sa bann *fees*, i kler ki sa bann *fees* baze lo Minis sa ki ou'n dir mwan ou'n anmase, i pa pou ase pou fer sa bann devlopman ki ou'n koz lo la.

E naturelman bann lapros miltilateral, labank parey ou'n mansyonnen, sa bann landrwa ki ou kapab ganny bann sonm sibstansyel. Donk alors, i kler ki sa ki'n anmase, sa ki pe anmase, i pa neseserman pou kit por flote.

Lo larepons Mr Payet, mon a zis fer li realize ki ler i dir i pe al travay lo bann *leakage* parey Silhouette, Ste Anne, mon fer li realize ki bann kliyan touris ki vin Praslin, zot deza pe pey sa.

Alors dan li menm sa i kree en sityasyon kot si en touris i reste Ste Anne, i reste Silhouette, i zwenn en touris ki'n reste Praslin, lo avyon dan konversasyon, i pa pou sorti byen lo limaz Sesel kot en serten group zot santi zot pe peye, *whereas* en lot group pa santi zot pe peye. Alors mon ti a sizere ki sa sityasyon i ganny adrese ase vit pour limaz Sesel reste entak. Mersi.

MR DEPUTY SPEAKER

Mersi Onorab. Mon ava envit *panel* –

MINISTER **ANTONY** **DERJACQUES**

Mersi Mr - Sorry Mr Speaker.

MR DEPUTY SPEAKER

Please proceed Minister.

MINISTER **ANTONY** **DERJACQUES**

Thank you, Mr Speaker. Sorry ki mon'n *interrupt* ou. Mon apresye bann komanter. E i montre ki sa Lasanble osi pe akonpanny nou dan sa bann semen annandler ki parfwa i vreman difisil.

Kot por avek son Minis i bezwen pran bann desizyon ase serye. E pou pas sa mesaz avek osi bann *businessmen* ki annan bann bato ki met en bon pe presyon lo nou.

Bann pasaze pa tro met presyon, en. Zot abzorb sa. Se bann *businessmen* ki bezwen konpran ki nou pe donn zot bann facilite pour zot fer biznes bokou pli byen. E par egzanp sa *management information system*. Dernyen fwa mon ti la aepre 5 semenn pase avan zot *recess* mon ti dir avek tou bann *agents*; angaz zot dan sa novo teknolozi. Sa servis *digital*. Aret desann avek papye Victoria pou al tir *container* avek *cargo*. Fer li lo zot *computer* e keksoz i a vin bokou pli fasil.

Par egzanp nou pe bouze. Nou pe al *digital*. Nou pe aret servi *chequebook*. Servi *mobile*, servi *computer* e keksoz i a vin bokou pli fasil. E zis konminyon ki ava desann anvil pou tir zot *container*, anmenn dan zot *yard*. Tou leres fer li lo *computer*. E sa i ava ed transpor osi, akoz napa bokou *parking* Victoria.

Mersi pou konpran ki ler ou pran bann *loan*. Ler ou pe *invest heavily*. Espesyalman pour Por Victoria ki byento mon ti ava swete nou met premye pyer. Pour - nou pe regard lavenir Sesel pour sa prosen 50 an. E mon kontan ki Lasanble i ava akonpanny nou. Mersi Mr Speaker.

MR DEPUTY SPEAKER

Mersi Minister pour ou larepons. Ankor enn fwa mon *note* lentere bann Manm dan sa kestyon. Partikilyerman bann MNAs ki sorti dan bann *constituency* ki lo bann zil Praslin avek La Digue.

Me malerezman in ler aprezan pour nou pran en *break* ziska 11 er, kan nou ava kontiny avek nou lot kestyon ki lo *Order Paper*. Mersi.

(BREAK)

MR DEPUTY SPEAKER

Welcome back tou Manm Lasanble. E ankor enn fwa, bonzour. Sirtou bann dimoun ki fek zwenn nou pour travay Lasanble pour sa Mardi le 15 Oktob. E nou pou kontinyen avek sesyon *Questions for Oral Answer*.

Me selman avan nou fer sa pour nou al lo kestyon 216, i annan en pti keksoz ki nou pou fer la senbolik ki *Caucus* bann Madanm ti'n demann permision Speaker avan, akoz

i koensid avek sa mwan Oktob ki nou pe komemor *Cancer Month*. E mon pou donn laparol Onorab Regina Esparon pou adres nou briyevman silvouple. Mersi.

HON REGINA ESPARON

Mersi Mr Speaker. Bonzour tou dimoun a lekout. Mr Speaker, de lapar *Women's Caucus* mon ti a kontan dabor swet la byenveni nou bann envit spesyal dan Galeri ozordi, ki enkli;

Madanm *Ambassadrice de France* Olivia Berkeley-Christmann. *Cancer Concern members*, Manm Soroptimist ki osi en *partner* kle dan sa lalit kont kanser. E osi bann *cancer survivors* ki'n zwenn nou bomaten pour sa sesyon.

E an dizan sa, mon pou envit Onorab Spiro konman en Manm nou *Women's Caucus* pou delivre mesaz a sa lokazyon. Mersi Mr Speaker.

MR DEPUTY SPEAKER

Mersi Onorab Esparon. E mon ava donn laparol Onorab Spiro.

HON RACHEL SPIRO

Mersi Mr Speaker. Mersi Madanm Chair. Bonzour tou dimoun ki'n vin zwenn nou isi dan Galeri, nou bann envite. Mon pe prezant de lapar *Women's Caucus* dan Lasanble, mesaz a lokazyon

Mwan Sansibilizasyon lo Kanser Tete.

Mwan Oktob i ganny dedye a sansibilizasyon lo kanser tete. Isi Sesel, kanser tete i dezyenm lako lanmor parmi bann madanm a en total 43 poursan parmi lezot kanser.

Caucus bann Madanm dan Lasanble Nasyonal i oule a sa moman aport soutyen anver tou bann madanm atraver lemonn. Espesyalman bann madanm e osi bann msye isi Sesel ki'n ganny afekte avek kanser tete, menm si kanser tete dan bann zom i ase rar.

Nou solider avek zot pandan sa moman difisil dan zot lavi e fer zot konnen ki zot pa tousel. Nou la akote zot pou kontinyelman akonpanny zot pandan zot tretman ver gerizon.

Nou osi remersye tou bann partener e bann lorganizasyon parey *Cancer Concern* e *Soroptimist*. E demande ki zot ogmant zot zefor pou soutenir bann pasyan e zot fanmir avek servis *counselling* pandan sa parkour difisil ki zot pe pas ladan. Zot travay i vreman ganny apresye. Kontinyen avek zot travay sansibilizasyon e edikasyonnel.

Nou osi pe demann Minister Lasante pou

kontinyen met a dispozisyon popilasyon tou mwayen e sipor neseser anver en tretman rapid e efektiv, par fer deteksyon boner an servan lekipman pli modernize. Ki bann travayer lasante i pratik plis konpasyon anver bann pasyan kanser.

Nou pe osi demann tou manm fanmir, espesyalman bann msye, pou reste akote zot madanm dan sa moman difisil dan zot lavi. Akoz se la lemoman ki zot pli bezwen sa sipor e lanmour.

Ki bann legliz i osi zwe zot rol pou met tou sa bann madanm e zot manm fanmir dan zot lapriyer. Ki zot a ganny en gerizon e ofer zot soutyen a bann fanmir dan detres.

E nou pe osi demann bann manm kominote pou kontinyen ede soutenir enn nou manm dan kominote ki pe viv avek kanser tete.

Nou pe osi enplor e ankouraz bann zenn fiy ek bann madanm pou aprann ki mannyer pou egzamin zot tete, akoz se atraver deteksyon boner ki zot pou kapab ganny tretman e swen boner ki asov zot lavi.

Mazinen ki kanser tete i kapab trete. Pa les li pran kontrol ou lavi. Si ou santi okenn groser dan tete, silvouple apros en dokter e ensiste ki ou ganny swivi apropriye. Akoz bann

madanm, se zot ki konn zot lekor.

Pour bann ki'n sirmont sa defi, kontinyen ankouraz en lot ser ki pe pas atraver sa menm sityasyon. E ankouraz en lot lo sa semen gerizon.

Nou osi mazin tou bann madanm ki'n kit nou. Nou kontinyelman mazin zot e zot kontribisyon ki zot in fer dan lavi zot fanmir, zot zanmi e lasosyete. Nou mazin zot avek bokou tandres.

Caucus bann Madanm dan Lasanble Nasyonal i swet tou bann madanm ki pe sers zot gerizon e ki kontinyen debout for e persevere. E tou madanm an zeneral, bon kouraz e bonn sante tou dilon zot lavi.

Mon oule pret en sitasyon ki mon'n vwar *Soroptimist* in servi. E mon war li tre apropriye. Annou aport – “bann ki pe lit kont sa maladi, nou aport zot sipor. E pour sa bann ki pe viv ek sa maladi. Annou admir bann sirvivan sa maladi. E annou onor bann ki'n viktim kanser tete.” Mersi.

(APPLAUSE)

MR DEPUTY SPEAKER

Mersi Onorab Spiro. E mon ava remersye *Caucus* Madanm pou organiz sa levennman ozordi bomaten. E partikilyerman, mersi tou bann envite.

Je souhaite la bienvenue à L'Ambassadrice de France Son Excellence, à L'Assemblée Nationale. E partikilyerman Cancer Concern, Soroptimist Seychelles. E partikilyerman bann dimoun ki'n sirmont sa defi parey Onorab Spiro in dir.

E pour nou bann Manm Lasanble ki sorti dan bann kominote. Alor mersi pou kontinyen ed bann dimoun dan nou distrik.

E se sa rezon pour piblik ki pe swiv Lasanble, akoz zot vvar bokou Manm ozordi i dan kouler roz. E menm annan sa pti riban lo nou resanz ozordi. Onorab Esparon?

HON REGINA ESPARON

Mersi Mr Speaker. Petet osi ti a bon enform tou bann Manm ki apre sa sesyon apre midi la, nou pou annan en sesyon *advice* dan *Members Lounge* ki pou ganny fer par bann *personnel* Minister Lasante, kot zot tou zot ganny envite. Mersi.

MR DEPUTY SPEAKER

Mersi byen. Donk nou ava bouz aprezan lo nou prosen item lo *Order Paper*. E sa i se kontinyasyon *Questions for Oral Answers*. E nou ava demann Hansard *reporter* pou apel Minis avek son delegasyon.

Ankor enn fwa nou ava *welcome* delegasyon sorti kot

Minister Transpor avek nou ozordi bomaten, ki pe dirize par Minis pour Transpor Mr Antony Derjacques.

E i akonpannyen pour sa prosen 6 kestyon par Sef Egzekitif Lazans Transpor lo Later Mr Parinda Herath.

I osi annan *Principal Engineer* sorti dan Minister Transpor Mr Carl Rose avek *Chief Policy Analyst* sorti dan Minister Transpor Ms Veronique Nibourette.

E mon ava pas laparol avek Onorab Esparon pour kestyon 216. E mon ava zis port atansyon bann Manm ki tou bann kestyon ki swiv i tre spesifik lo en *area*. So nou bann kestyon i pou bezwen alor reste lo sa topik e sa rezyon. Mersi.

HON REGINA ESPARON

Mersi Mr Speaker. Bonzour Minis ek ou delegasyon. "Eski Minis i kapab dir Lasanble ki distans son Minister i ete lo lagrandisman semen North East Point e kan i sipoze konplete?" Mersi.

MR DEPUTY SPEAKER

Mersi Onorab. Mon ava envit *panel* pour larepons. Minister?

MINISTER ANTHONY DERJACQUES

Mersi Mr Speaker. Byenveni *Ambassadrice Votre Excellence*. Mr Speaker, ler

mon'n ekout zot i fer mwan rapel ki nou dan en moman – en mwan ki dedye a kanser.

Bomaten alors sa kestyon lo *Air Seychelles* kot ti dir pou ed espesyalman bann pasyan kanser, i anliny avek sa ki pe pase dan nou pei e partou dan lemnoff.

E alor, tou mon senpati pour bann ki pe soufer avek kanser. E konman en sosyete nou bezwen vin ansanm pour nou regard sa maladi e ki mannyer nou pou dil avek. E ki mannyer nou pou ed tou nou bann pasyan ek tou Seselwa ki ganny afekte. Mersi.

Mr Speaker, nou plan pou agrandi semen North East Point, depi *main road* ziskan premye krwaze semen. Nou'n reisi konplet 95poursan avek sikse. E nou satisfe avek bann amelyorasyon ki'n fini ganny fer.

Malerezman, i annan en pti seksyon sa semen lo son finisyon kot i annan en dezagreman ant bann propriete lo sa later. E sa i fer ki pour sa dernyen 5 poursan, nou napa *wayleave* pour nou finalman konplet sa semen. Alor pour lemoman, nou'n konplet 95poursan. Mersi Mr Speaker.

MR DEPUTY SPEAKER

Mersi Minister. Onorab, siplemanter?

HON REGINA ESPARON

Mersi Mr Speaker. Mr Speaker, mon ti a kontan demann ek Minis si pour sa 5poursan ki reste, si nou pa kapab re antre an negosyasyon avek sa bann propriyeter pour nou kapab konplet sa semen?

Parski lo sa bout - lo sa finisyon semen parey ou'n dir Minis, i annan larivyer kote isi. E i annan ranpar lo lot kote. Pour nou kapab konmsi *once and for all* konplet li e met sa bann baraz pyeton pou fer sa semen vin an sekirite. Sirtou aswar. Mersi Mr Speaker.

MR DEPUTY SPEAKER

Mersi Onorab. Minister?

MINISTER ANTHONY DERJACQUES

Mersi Mr Speaker. Onorab, mon konnen ou'n en dirizan, ou'n MNA Glacis pandan bokou lannen. E napa en dimoun ki pli byen konekte dan son distrik ki ou. Avek ou sipor, avek ou led, mon asire SLTA pou kapab ganny sa bann *wayleave*.

Alor mon'n koz avek CEO, si i kapab akonpanny ou, e ouswa ou akonpanny li, e nou fer sa dernyen lesey pour nou kapab sorti lo 95poursan pour nou vin 100poursan. Mersi Mr Speaker.

MR DEPUTY SPEAKER

Mersi Minister. Mon ava dir Onorab bonn sans ek sa demars. Napa okenn lot lendikasyon Kestyon Siplementer lo sa kestyon.

Donk nou ava bouz lo kestyon nimero 217 ki touzour dan non Manm Elekte pour distrik Glacis, Onorab Esparon.

HON REGINA ESPARON

Mersi Mr Speaker. "Eski Minis i kapab dir Lasanble kan ki SLTA pou rekonomans demars pou fini sa travay lagrandisman semen La Gogue, sorti kot Legliz Glacis pou al kot danm?" Mersi.

MR DEPUTY SPEAKER

Mersi Onorab. Minister?

MINISTER ANTHONY DERJACQUES

Mersi Mr Speaker. Lot faz proze pou amelyor semen Glacis/La Gogue ki konmans depi Legliz Glacis e mont ver kot danm, i deza lo nou azanda pou konmanse lannen prosenn.

Dan sa Bidze ki pou annan son prezantasyon mon asire byento dan detrwa zour, R2.5 milyon in ganny *soumet* dan nou *budget request* pour 2025.

An se moman, *survey* topografi ki'n fini ganny fer, e plan desen ek *Bill of Quantities*

pe ganny finalize pou inisyé prosedir *tender* boner sa lannen - boner lannen prosenn.

Note ki pou annan plizyer *wayleave* osi ki nou bezwen avek bann propriyeter prive. E nou pou avoy en nouveau lalis kot distrik pour lasistans pour nou kapab ganny sa bann permisyon. Savedir *wayleaves*.

E la Mr Speaker, mon ti a kontan profite pou lans en lapel avek tou sa bann propriyeter pou korpore avek nou e pou ed nou e fasilit sa proze ki pour benefis sa kominate an zeneral.

Si tou prosedir i konplet dapre plan, nou antisipe ki proze i ava kapab komanse lannen prosenn boner. Mersi Mr Speaker.

MR DEPUTY SPEAKER

Mersi *Minister.* Onorab Esparon, ou annan siplemanter?

HON REGINA ESPARON

Mersi Mr Speaker. Mersi Minis, pour larepons. E mon ti ava kontan dir mersi ou osi SLTA pour sa bann louvraz ki zot pe fer dan distrik Glacis ki pe vreman ganny apresye.

Minis, mon ti anvi demann avek ou; anvi ki sa proze semen in kommans anler kot danm in desann anba. E nou annan sa seksyon dan

milye ki la ki nou bezwen *wayleave* pou kapab kontinyen sa proze.

Eski safwasi nou pa ti ava kapab kommans anba kot legliz e fer li an montan anler? Epi nou ti ava regard dan milye ki mannyer nou - antretan ki nou negosye dan milye pou ganny sa bann *wayleave*. Ki fer ki ti ava pli en benefis pour bann dimoun ki reste en pe pli ba.

E eski sa proze i osi met drenaz avek trotwar dan sa landrwa? Mersi.

MR DEPUTY SPEAKER

Mersi Onorab. *Minister?*

MINISTER

ANTONY DERJACQUES

Mr Speaker, akoz sa kestyon i teknik, eski mon kapab demann CEO SLTA pour li reponn?

MR DEPUTY SPEAKER

Sertennman. *Proceed CEO.*

CEO SLTA PARINDA HERATH

Mersi Mr Speaker. Bonzour tou dimoun. Wi Onorab, annefe sa dezyenm faz ki nou pe al komanse i pou kommans lo kote Glacis kot legliz pour nou mont avek.

E parey ou konnen dan lepase, nou annan serten landrwa dan milye ki nou'n deza fer en pe agrandisman.

Selman i pa bann travay final, kot i ankor reste serten miray eksetera pou fer.

E parey ou'n mansyonnen, i pou osi enkli drenaz, bann *retaining walls* eksetera, kot i neseser. E osi *crash barriers*, lalimyer parey tou bann Proze Lagrandisman Semen. Mersi.

MR DEPUTY SPEAKER

Mersi CEO. Onorab Pillay, ou annan siplemanter lo la?

HON SEBASTIEN PILLAY

Mersi Mr Speaker. Mr Speaker zisteman, mon ti a kontan le ganny presizyon avek Minis. An sa ki konsern North East Point ou'n dir pou dir ou annan sa bout ki pe ganny difikilte *wayleave*. Akoz nou konpran sa bann *secondary road* kot zot in pase mannyer teren i ete.

Regarding La Gogue sa bout dan milye, i pou osi prezant menm sityasyon. Vi ki ou'n dir nou poudir proze pe al *tender* lannen prosenn, akoz ki zot pa'n konmans angaz zot dan prosedir *wayleave* la pour sa bout dan milye?

Akoz nou konn sa bout ki sorti lo kote Glacis depi kot legliz, i napa - ou napa gran problemm *wayleave* an sa ki konsern sa bout. Akoz tou lede kote semen i preski later Gouvernman.

Me sa bout dan milye kot ou annan bann lakaz anba semen eksetera, sa bout menm, akoz ou pa'n angaz ou dan sa problemm sityasyon *wayleave*?

E mon ti a kontan an pasan Mr Speaker, remersi Dokter David Payet ki ti *MNA* sa letan, ki li *CEO SLTA* i a rapel tre byen, in par deryer en kantite travay ki'n ganny fer lo semen La Gogue. Mersi.

MR DEPUTY SPEAKER

Mersi Onorab. Mon swete ki ti annan en let remersiman pour Dokter Payet pour son bann travay ler in nepli *MNA*. Alor mersi pour ou komanter. Nou ava demann *panel* pou pran larepons silvouple.

MINISTER ANTHONY DERJACQUES

Mr Speaker, mon asire e mon konnen ki en kantite bann travay lo *wayleave* in fini ganny fer. Solman mon a pas laparol avek *CEO*, akoz mon osi konsyan i annan *additional wayleave* ki nou bezwen. Mr Speaker, *CEO* i ava eksplike. Mersi.

MR DEPUTY SPEAKER

Mersi, nou a donn laparol *CEO*.

CEO SLTA PARINDA HERATH

Mersi Mr Speaker. Wi Onorab, annefe nou ti konmans sa travay pou rod *wayleave* depi ler nou'n konmans premye faz. Nou'n deza anvoy en lalis. Detrwa lalis annefe. Nou'n *update* li o firamezir kot distrik.

E i annan *wayleave* ki nou'n gannyen. E kot nou'n ganny *wayleave*, sanmenm sa rezon annefe kot nou ti deside nou pou komans premye faz lo lot kote. E malerezman i annan en kantite ankor *wayleave* ki nou bezwen, akoz sa semen parey ou konnen i en *secondary road*. E bann later prive i baliz avek semen.

So, anmezir ki nou pe travay lo premye faz, nou'n deza anvoy bann lalis kot distrik osi pou ed nou avek sa travay. E byensir la nou pou bezwen *speed up* sa prosedir.

E menm si nou lentansyon, parey Minis in mansyonnen taler, si tou keksoz i dapre plan, nou pou kapab konmans sa proze *early next year*. Me selman parey zot konnen, *wayleave* i en keksoz ki absoliman nou neseser avan nou konmans en proze.

So, si i annan detrwa *wayleave* ki manke, nou still kapab komans proze kot nou annan *wayleave*. Me selman, i en par ki enportan. Mersi.

MR DEPUTY SPEAKER

Mersi CEO. Ou annan klarifikasyon Onorab?

HON SEBASTIEN PILLAY

Mersi Mr Speaker. Mr Speaker, mon ti a kontan demann avek Minis. An konparezon avek Proze *West Coast* ki ou ti al lo televizyon ou'n koz lo la. Gouvernman ti pran en pozisyon *regarding* bann later ki trouv o bor semen, e ou ti fer serten *statement*.

Me an sa ki konsern semen La Gogue, i paret ou pe fer prosedir ki deza egziste. Mon ti a kontan konnen si *going forward* ou Minister pou annan en Polisi *regarding* bann proze semen, an sa ki konsern bann size *wayleave*?

E ki i ava annan en lenformasyon ki ganny donneen avek manm piblik, pour ki nou pa a konfize. Akoz se sa ki serten zabitan in dir mwan met devan ou *regarding* size *wayleave*. Mersi.

MR DEPUTY SPEAKER

Minister?

MINISTER ANTHONY DERJACQUES

Mr Speaker, preske tou later Sesel i later prive. Savedir i pa pou Gouvernman. Gouvernman i annan en pe. Laplipar, gran mazorite i piblik. Savedir pour bann endividé prive.

Tou devlopman semen, lenfrastriktir, *pavement*, poto elektrik, *crash barrier* i ganny sitye laplipar lo later prive. E si tou dimoun, nou konman en pei, konman en sosyete, nou realize ki tou dimoun pe korpose. Tou dimoun pe ede, akoz semen, trotwar, tou keksoz i dan nou bann lentere pour nou, pour nou fanmir, pour nou zanfan, pour sosyete kontinyen e devlopman arive. Nou tou nou pou sanz sa ki nou pe fer, sa pti minorite e donn *wayleave*.

Wayleave i annan plizyer difikilte. I pa zis i annan dimoun ki pa anvi donnen. Ki pa anvi antre dan kontak. Be i annan osi ki annan bann problemm legal.

Par egzanp, i ankor egzekiter ki *own* sa bann later. I annan ki bann *absentee owners* ki zot in *migrate* depi en kantite letan. Par egzanp zot in al an deor pei. I annan bann problemm i lo zanfan, kot ou bezwen apwent en *guardian*. Savedir i annan en kantite bann problemm *wayleave* kot ou bezwen permisyon.

Par egzanp Onorab, ou'n koz lo *West Coast Road Project*. Nou'n bezwen negosye pandan sa 1 an edmi avek 700 propriyeter. Zis mazinen - 700 propriyeter pour nou kapab ganny permisyon pour nou kapab *encroach*. Savedir servi

zot later. Wi, nou seye e nou negosye. Sa i nimero enn.

Dezyenm, nou'n sanz sa Polisi avan kot nou bezwen tou *wayleave* pour nou konmanse. Mon'n dir non, nou ava konmanse. E sa osi i ava laprev pour tou dimoun konnen ki nou, nou serye. Nou, nou pe travay. E vre sa proze pe ed kominate. E sa i fer zot sanz zot lide. E i vin en nespes *peer pressure* ek levidans kri ki zot vvar ki vre i annan bon semen. I annan agrandisman semen. I annan *pavement* ki pe vini. I annan lalimyer. Alors zot trouve e zot krwar. E zot donn nou.

I annan sa pti minorite ki malerezman Gouvernman pou bezwen konsider *land acquisition*. Pour sa, i vin en lot prosedir ankor. Ou bezwen konn egzakteman ki ou plan. Ou bezwen fer en *provisional subdivision*. Ouswa *demarcate* sa bout later egzakteman pour ou konnen konbyen *square meters*.

Ou bezwen fer evalyasyon pou konnen konbyen son *real value*. E apre ou donn son notifikasyon. Be sa i avek en lot Minister preznan. I sorti kot Transpor. I al kot sa Minister ki otorize anba Lalwa *under the Land Acquisition Act*. E i donn son *30 day notice*. E i antre dan sa dernyen e final negosyasyon.

Se sa ki nou pou bezwen fer ler i arriv sa blokaz total. Alor sa sizesyon i *ok*. Parey Onorab Esparon in dir nou, nou travay. E an menm tan nou kontinyen negosye.

E si finalman ler nou arriv dan sa bout par egzanz dan milye, i napa okenn *choix*, nou pou bezwen *issue* sa *notice* 30 zour. Negosye sa final. E si pa arive ki nou *succeed*, pou bezwen annan en *land acquisition*.

Land acquisition i pa vedir ki nou pe pran tou later. I zis sa pri bout later pou agrandisman semen avek sa *pavement* par egzanz. E sa konpansasyon, i pa baze lo tou later. I baze lo sa pti bout. Par egzanz si i 6 met kare, e sak met kare i vo R700. I vin 6 fwa 7-3 mil 600 aepre.

Alor mon pe sey dir zot ki, annou korpore. Annou travay ansanm. Annou les sa bann devlopman arive. Se sa ki nou pe dir. E si sa i nou Polisi, nou pe repet li ankor enn fwa pour tou dimoun konpran. Mersi Mr Speaker.

MR DEPUTY SPEAKER

Mersi Minister. Nou pou bouz lo lot kestyion. Sa i kestyion 218 ki dan non Manm Elekte pour distrik Takamaka, Onorab Mondon?

HON TERENCE MONDON

Mersi Mr Speaker. "Eski Minis i kapab eksplik Lasanble rezondet pour sa *median strip* dan semen Mont Plaisir, Anse Royale zis an fas avek Liniversite Sesel? Mersi Mr Speaker.

MR DEPUTY SPEAKER

Mersi Onorab. Minister?

MINISTER **ANTONY DERJACQUES**

Mr Speaker, mon ti'n prepar en larepons. Mon krwar mon ava komans son listwar avan. Olye al dan sa larepons direk.

Le 29 Novanm 2010, dan prezans *University of London Chancellor Her Royal Highness Princess Royal Princess Anne*. Ansanm avek Prezidan *then* 2010, Mr James Michel. Ti la ki sa *median strip* ti ganny etablir o bor Liniversite Sesel.

E ti anvizaze ki sa *median strip* pou ganny bann plan Bougainville avek bann plan pye *palm*. E sa ti ganny plante par *LWMA*. E ti pou vin en zoli *strip* byen kolore avek son bann plan. E sa ti pou ede avek sa liniversite ki pe ganny kree. Konmsi en bon lakey dan larantre liniversite.

Malerezman depi 2010 ziskan tou dernyerman, in ganny neglize. E zis zerb in pouse. E mon konnen tanzantan zerb i ganny koupe e in vin en *eyesore*.

Boner sa lannen annefe, mon ti dir ek *CEO* ki nou kapab fer. E *CEO* in monte in vwar ki sa dernyen 15 met ki bord avek semen piblik i vin en *hazard*. E in tir sa premye bout.

Menm sa wikkenn mon'n al get ankor avek konsey plizyer dimoun dan distrik. E finalman mon'n fer desizyon e mon'n dir avek *CEO*; nou pa pou tir zis sa 15 met, nou pou tir li an antye.

E se sa larepons. Byento nou ava retir li net Mr Speaker, e nou a met en *double white line* dan milye. E sa i ava retir sa restriksyon. E i a retir sa bann *barrier* ek sa bout ki ase vilenn.

Mon osi konsyan ki i annan en kantite devlopman kot sa semen. E ki mannyer i ete i en *barrier*, akoz i annan plizyer ouvertir ki pe ganny ouver pou devlopman bann biznes tout o tour.

Nou ava kontinyen *monitor*, menm ler nou'n tire akoz nou reste konsyan ki la i annan en kantite bann zenn. I annan bann etidyan. E si i annan okenn risk, okenn *safety*, nou ava pran bann *safety measures*. Savedir nou retir li. Solman nou pou bezwen *monitor* pou fer sir ki *safety* i reste en konsern osi. Mersi Mr Speaker.

MR DEPUTY SPEAKER

Mersi *Minister*. Onorab Mondon, eski ou annan siplemanter? Non. Manm Elekte distrik Anse Royale i le pran laparol a sa pwen.

HON SYLVANNE LEMIEL

Mersi Mr Speaker. Mon a dir en bonzour spesyal nou bann envite ki dan Galeri. Mon war mon *teacher* – *ex teacher* pe kabannen pe regard mwan. Ms Dinaz, *welcome*. E i ensi enn nou zabitan Anse Royale ki la.

Mr Speaker, mon ti a kontan mon osi tras en pti pe sa zafer *median* avan mon fini demann mon kestyon. Sa letan la mon ti *DA* Anse Royale. E mon ti form parti, mon ti tande letan ti pou annan sa. Ti en diskisyon ki ti ganny diskite ek Lotorite Distrik.

Nou, nou ti annan en pti pe kont sa bann zafer pou met *median* dan sa milye semen. Akoz nou konnen poudir sa semen mannyer i ete i deza etrwat, i ptipti. Pour ou met en *median* dan milye, i ti pou vin difisil pou *obstruct* transpor.

Fini kont, Gouvernman in mete. In ganny *managed* pour en bon pe letan sa *median*. Me apre ki bann travayer ki ti travay dan distrik anba *URS*, *whatever* la, sa bann dimoun ki ti *maintain* sa.

Me apre sa letan in aboli, sa bann dimoun in ale. Vre sa in reste zis – sa bann *palm* in pouz tro long. I annan *palm* ki'n mor. I annan bann feyaz ki'n mor osi e apre i ti konmans vin bann zig dan semen.

Several times Mr Speaker, mwan mon'n ekrir SLTA with regards to the median Anse Royale sa enn dan milye. E i request distrik! Mon rapel i annan 1 an edmi Mr Speaker. Nou'n ekrir nou'n demande pou fer tir sa median. In dir sa i ava ganny fer ler ki Proze Semen Mont Plaisir i ganny aranze. En whole maintenance pe al ganny fer lo sa semen.

Therefore, ti dir ava esper ler the maintenance i ganny fer – “please.” Ler the maintenance i ganny fer zot ava tire. So, i fer ki – mon konpran annandler parfwa nou le kraze or nou le annan serten keksoz pou nou met en dimoun ba.

Me Mr Speaker, i enportan ki tou dimoun i okouran kwa ki'n pase. Akoz Lotorite Distrik in fer en kantite pour sa zafer *median* dan milye semen. Sa bout anba ki'n tire se depi lot lannen pase, COI ti dir ek mwan fodre al kot *Transport Division*.

Transport Division alafendefen apre 1 an, nou'n

tournen. Larzan prezan ki'n available in fer tire. Akoz i ti dir mwan tousala i koute. Zot in tire.

E menm la, nou'n demande pour zot re vin rafin sa travay akoz i en pti pe abos, abos. Nou konnen i en keksoz ki'n ganny fer vitman. Nou apresye SLTA. Nou dir SLTA mersi.

Me, i annan rezon pou vini pou re aranz li, re met li annord. Apre refer son laliny kot pou antre kot dantis. Nou ti dir fer sa akoz pou kapab annan en pli bon akse pou al kot dantis.

Akoz konmela ler pour ou al laba la Mr Speaker, ou bezwen antre kot liniversite, al vire apre tournen, ti pou ou re antre kot dantis. I ti en lenkonvenyans.

So, i byen in tire. E i en *request* Lotorite Distrik ki'n demande pou tir li net. Ansanm avek ou sipor Minis, mersi si ou osi ou'n demande pou tire. Me selman pour ou lenformasyon, lontan Lotorite Distrik osi in demande pou tir sa. Mersi bokou.

(APPLAUSE)

MR DEPUTY SPEAKER

Mersi. Mon pa'n sezi en kestyon. Me mon ti ava envit panel si i annan en komanter – ok, tre byen.

(Interruption)

MR DEPUTY SPEAKER

Nou pou bouz lo kestyon 219.

(Interruption)

MINISTER **ANTONY**
DERJACQUES

Mersi Mr Speaker. Ler en keksoz i vin a nou latansyon. Nou *act e* nou *act* vreman vit.

(Interruption)

MINISTER **ANTONY**
DERJACQUES

E ler nou'n war li, nou'n fer tire. E la nou'n fer dezyenm desizyon pou tir li net. E annandler mon le demande, akoz pou 43 an depi 2010 zot pa'n tire?

(Interruption)

(APPLAUSE)

MR DEPUTY SPEAKER

Mersi. Nou pou bouz lo kestyon...

MINISTER **ANTONY**
DERJACQUES

Mersi Mr Speaker.

MR DEPUTY SPEAKER

Mersi Minister.

(Interruption)

MR DEPUTY SPEAKER

Ou konnen, taler Onorab Lemiel ti pe koze, nou'n tann li dir "please" akoz zot ti pe *disturb* li. Zot kapab reste trankil silvouple? Mersi. Mon pou pas – pardon Onorab Pillay?

Ok. Silvouple, nou annan bann *guest* la. E ladan i annan bann ansenyan ki'n fer nou lekol. Onorab Lemiel fek dir. Mon'n *Polytechnic* menm letan ek li. *NYS* ek li mwan. I annan nou bann ansenyan la anler. Konport nou. Mersi.

219, Onorab Audrey Vidot pa dan Lasanble ozordi. Mon'n ganny enformen ki se Onorab Spiro ki pou demann son kestyon. Onorab Spiro, *please proceed*.

HON RACHEL SPIRO

Mersi Mr Speaker. Bonzour tou manm *panel* ki fek zwenn nou. Kestyon Onorab Vidot Manm Elekte pour distrik Roche Caiman i lir *comme ça*;

"Eski Minis i kapab enform sa Lasanble kan ki Lazans pour Transpor *SLTA* pou adres bann proze *road maintenance, road marking* ek lalimyer dan kominote Roche Caiman dapre lalis priyorite ki distrik in soumet avek sa Lazans pour sa lannen 2024? Mersi.

MR DEPUTY SPEAKER

Mersi Onorab. Mon ava envit *panel* pour larepons. *Minister?*

MINISTER **ANTONY**
DERJACQUES

Mersi Mr Speaker. Mr Speaker, le 12 Zanvye sa lannen, Ladministrasyon Distrik ti *soumet* en lalis proze ki zot ti a swete ki i ganny dil avek, avek SLTA. E SLTA in akonplir pandan sa - pou akonplir dan sa lannen.

Mr Speaker, 18 diferan proze in ganny konplete. E sa i enkli konstriksyon en *bus shelter*. Reparasyon *grill* ek *slab* dan plizyer lokazyon. Lenstalasyon nouvo *grill*. Proze met koltar lo semen e osi dan *parking*. E plizyer lenstalasyon e repas bann lalimyer.

SLTA pe adres bann demann dan en fason sistematik dapre priyorite ki'n ganny endike par distrik. E osi bann resours ki disponib a SLTA.

Mr Speaker, an sa ki konsern lalimyer, SLTA in aranz plizyer lalimyer an plis ki lo sa lalis distrik, depi Zanvye. E in endike ki bann lalimyer ki kot bann *playground* ek *playing field* ki pa lo semen, i pa ganny kouver par SLTA.

Annefe, SLTA pe fer fas avek bann act vandaliz ki pe ganny fer ki i pou bezwen konsider met bann lalimyer soler, pou anpes bann zabitan zwe avek bann *timer* kot bann lalimyer elektrik.

Mr Speaker, tou bann proze i ganny fer dapre priyorite avek bann finans ki SLTA i annan. I annan lalis e lo sa lalis i annan apepre 45 a 50 pti proze ki ti ganny soumet. Dan en fason progresiv nou ava bouze. E an plis ki sa 18, SLTA i a kontinyen konplet bann ki i kapab sa lannen. Mersi Mr Speaker.

MR DEPUTY SPEAKER

Mersi Minister. Eski Onorab Spiro i annan siplemanter?

HON RACHEL SPIRO

Mersi Minis pour larepons. Onorab Vidot, i annan sa bann kestyon siplemanter ki i ti a kontan demann Minis.

Minis, kan eski sirfas ek laglas koltar pou ganny mete kot lafanmir Camille, Didon ek Dine? Sa i swivan bann vizit ki Onorab Vidot in fer avek bann dimoun kot Lazans SLTA.

E i ti pou osi anvi konnen kan eski Lazans i pou dan en pozisyon avan lafen lannen pou adres demann Roche Caiman, prenan kont ki serten sa bann proze ti deza dan Bidze pour sa lannen?

MINISTER **ANTONY**
DERJACQUES

Mr Speaker, eski CEO i kapab reponn? Mersi.

MR DEPUTY SPEAKER

Sertenman. CEO?

**CEO SLTA PARINDA
HERATH**

Mersi Mr Speaker. Onorab, pour bann laglas nou annan nou bann zofisyen ki'n vizite plizyer landrwa. E eksepte enn ou 2 landrwa, lezot landrwa in ganny klasifye koman pa neseserman apropiye pou met laglas.

E osi ti annan en landrwa kot sa laglas ti pe vin lo en propriete prive. So malerezman pour lemoman nou pa pe kapab enstale. Me selman i annan bann lezot vizit ki'n ganny organize avan lannen fini pour nou kapab re vizite pou gete kot bann *traffic mirrors* i apropiye.

Lo kote *road markings*, i annan travay ki pe ganny fer an se moman. E sa travay in komanse apepre 2 semenn pase. E sa nou pou kontinyen kot i neseser. Par egzanp kot bann *speed bumps* i ete. Bann *stop lines*, *centre lines*, eksetera.

Lo kote sa bann drenaz, bann *slabs* i en travay ki kontinyel. E i annan en kantite ankor louvraz pour nou fer dan distrik Roche Caiman *internally*. E sa nou pou kontinyen ziska lannen i fini avek Bidze ki nou annan pou fer sa bann travay anba *road maintenance*. Mersi.

MR DEPUTY SPEAKER

Mersi. Onorab Spiro?

HON RACHEL SPIRO

Mersi CEO. En pti leklersisman. Lefet ki ou pe dir nou ki travay in konmanse, Onorab Vidot ti a kontan dir mersi. Selman i pe osi met devan ki *road markings* ki zot in konmanse, laliny blan dan milye ki separ semen, pa ankor ganny fe,. tenan kont ki i annan bann lekol dan sa kominate; 4 lekol annefe. Sa osi i ti pou kontan si i ti a ganny fer en pti pe vit. Mersi.

MR DEPUTY SPEAKER

Mersi Onorab.

**MINISTER ANTHONY
DERJACQUES**

Mr Speaker, sa travay i *ongoing*. Annefe i pe ganny fer la kommela la. Mersi Mr Speaker.

MR DEPUTY SPEAKER

Mersi. Mon war lentere bann Manm lo sa size. Mon en pe enkyet letan mon war sa mwan, akoz la nou pe koz SLTA la. *Be mindful the question* i spesifikman lo Roche Caiman. Onorab Aglae.

HON EGBERT AGLAE

Mersi Mr Speaker. Bonzour Minis, CEOs ek ou *panel*. Minis, ouswa CEO. Kot i konsern lalimyer, ok. Mon

kestyon i lo lalimyer osi; eski zot in ganny tou bann konponan ki neseser pou fer bann *maintenance* lo lalimyer, anvi ki ti annan serten keksoz ki *SLTA* ti pe espere?

Dezyenmman, i konsern *oversight*. Letan i annan bann *road maintenance* ki ganny fer, ok, sirtou kot i konsern *asphalting*; eski i annan verifikasyon ki ler kontrakter in fini, pou dir zot satisfe avek bann travay ki ganny fer?

Anvi ki i annan serten landrwa ou war ou pase ou war in byen ganny mete. I annan landrwa i pa lo sa standar ki nou ti a swete i parey en pti pe partou. Mersi.

MR DEPUTY SPEAKER

Sa bann landrwa ki pa lo standar, ou pe dir Roche Caiman la ou? Ok. Nou pe kit sa kestyon lo Roche Caiman, enkli si in ganny bann konponan pou met lalimyer Roche Caiman? Mersi.

MINISTER ANTONY DERJACQUES

Mersi Mr Speaker. Zis mon oule *remind* tou bann kontrakter, ki avek sa *West Coast Road Project*, nou'n entrodwir en nouveau laboratwar kot *SLTA* li menm li Providence.

E parey *CEO* ti dir dernyen fwa nou ti dan Lasanble aepre detrwa mwan

pase, nou pe envit tou bann kontrakter pou vin sa bann *training*. E osi pou anmenn bann materyo ki kapab ganny teste. Sa i anliny avek ou larepons osi.

Apre mon oule osi fer tou dimoun konnen ki i annan en kantite travay ki *ongoing*. Par egzanp bann *railing* kot *zebra crossing* ki anpes bann dimoun Roche Caiman ouswa piblik zis sot dan semen pou al across kot Eden Island. Zot war sa bann nouveau *railing* ki'n ganny penn an ver byen.

Savedir mon pe sey dir zot ki i pa annan zis sa bann proze ki pe ganny fer. I annan travay ki *ongoing* la konmela la Roche Caiman. Mr Speaker, eski *CEO* i kapab reponn osi?

MR DEPUTY SPEAKER

Wi, lo sa zafer konponan lalimyer.

CEO SLTA PARINDA HERATH

Mersi Mr Speaker. Lo kote bann konponan oubyen bann materyo ki bezwen pou enstal nouveau lalimyer Onorab, non, nou pa ankor ganny nou bann *consignment* ki nou bezwen.

Annefe dan lepase *PUC* ki ti pe fer vini bokou sa bann konponan. E dapre diskisyon ki nou'n annan avek *PUC*, zot oule ki *SLTA* i konmans fer vini sa bann keksoz *from now on*.

E zot in ed nou avek bann spesifikasyon sa bann konponan. E osi bann lakonpannyen ki zot servi pou fer sir ki standar i ganny mentenir pour nou rod bann kotasyon, eksetera.

Sa annefe i dan prosedir, pe ganny fer. Alors definitivman i pou pran en pe letan. Akoz enn bann kotasyon ki nou'n gannyen, *timeframe* ki zot in donn nou i *14 weeks from the time of the quotation*. So nou pe koz ankor 3 mwan *from now*.

E me selman *in the meantime*, nou annan serten lalimyer ki nou'n gannyen dan nou stok. E nou pou kontinyen ranplas bann lalimyer ki'n brile par egzanp. E osi nou kapab kontinyen met bann lalimyer kot poto avek laliny i deza la. So travay pou met novo lalimyer avek fer bann reparasyon i pou kontinyen.

Me selman, i annan serten lenstans mon krwar zot deza dan bann demann ki zot fer, nou bann zofisyen pe enform zot, i annan serten mankman dan serten konponan ki nou pe espere.

So as soon as ki nou ganny sa bann konponan ki neseser, *hopefully* annou dir *early next year*, nou kapab *speed up* avek sa proze ki nou'n konmanse. Mersi.

MR DEPUTY SPEAKER

Mersi CEO. Onorab Roucou?

HON MICHEL ROUCOU

Mersi Mr Speaker. Bonzour zot tou. Minis, mon konnen ou'n koz en pti pe lo sa bout *crossing Roche Caiman* ki baliz avek Eden oubyen kot bann fasilite *sport* i ete.

Eski *SLTA* i annan nide pour zot entrodwir fasilite *overhead crossing* la, akoz nou war poudir i annan bokou dimoun ki deservi sa bout semen *highway* ki baliz avek distrik Roche Caiman? Mersi.

MR DEPUTY SPEAKER

Mersi Onorab.

MINISTER ANTHONY DERJACQUES

Mersi Mr Speaker. Sa bann *overhead-pass* depi mon premye lannen dan sa Lasanble nou'n koz lo la. E a sa moman la mon ti estimen ki enn i kout apepre R5 milyon. Mon pa konnen si preznan i bokou plis.

E mon ti dir zot i annan 5 landrwa ki mwan mon ti a voudre konman transpor, pou entrodwir. Nou pa ankor ganny sa larzan dan Bidze. Nou'n ganny zis R1 milyon pou fer en letid. E nou pa ankor ganny sa larzan.

Mr Speaker, i enn bann rezon akoz nou pe met sa bann *railing* a sa moman la, ki

mon'n dir ki anpes bann dimoun koup nenport landrwa eksepte lo *zebra crossing*.

Sa i en mezir ki nou'n pran. An menm tan nou a servi sa R1 milyon pour nou kontinyen bann letid lo ki mannyer nou pou fer bann *overhead-pass*.

Mon ti a voudre a lavenir ki mon kapab fer li, ouswa lot Minis byento i a fer li. E nou kapab bouze enn fwa pour tou. Mersi Mr Speaker.

MR DEPUTY SPEAKER

Mersi *Minister*. Onorab Pillay?

HON SEBASTIEN PILLAY

Mersi Mr Speaker. I annan en pwen ki'n ganny souleve. Akoz dan larepons Minis, Minis pa ti'n met sa an konteks.

Vi ki Roch Caiman i annan sa size lalimyer, mon krwar i afekte tou distrik. E la ou'n dir nou poudir i annan sa *issue PUC* pa pe fer vini sa bann lalimyer. Ki se sa ki mon ti le demann Minis lo la.

E prenan kont ki Onorab Vidot in fer referans avek larzan ki ti'n ganny bidzete pour sa bann konponan proze. Lefe ki *timeframe* pou ganny sa bann lalimyer, *regarding* an relasyon ek larzan ki'n ganny bidzete, i pou dekale, eski ou pe dir ek nou ki sa larzan ki'n ganny bidzete sa lannen pou *rollover*, oubyen pou al dan en *suspense account* pour zot

kapab kontinyen e fini sa bann proze ki'n *earmark* pour sa lannen -pour ki i pa ava ganny afekte, oubyen ki i pa ava afekte lot preparasyon Bidze ki pou annan lezot demann lo la? Oubyen ou pou remet tou ansanm e re fer en soz lo la? Sa i mon premye kestyon.

Mon dezyenm kestyon pour Minis, *regarding* sa size *overhead-pass*, Onorab Vidot in anmenn pa mwens ki mon krwar 2 kestyon dan Lasamble. Ou ti vin reponn e ou ti dir *cost* i en *issue*. E ou'n dir poudir lot Minis i ava fer. Mon garanti ou 2025 pou annan en lot.

MR DEPUTY SPEAKER

Mersi. *Panel?* Zis premye kestyon, eski pou annan en *rollover* an term larzan?

MINISTER ANTHONY DERJACQUES

Mr Speaker, eski *CEO* i kapab reponn? E dan lavi, fodre toulstan ou annan imilite. Ou konnen ki en eleksyon i dan lanmen pep Seselwa e pep Seselwa ki pou deside lekel ki pou vin nouvo Minis. Mersi.

(APPLAUSE)

(Interruption)

MR DEPUTY SPEAKER

Rollover larzan?

**CEO SLTA PARINDA
HERATH**

Mersi Mr Speaker. Onorab, annefe Bidze ki nou ti annan. *Initially the Bidze pour streetlight – new streetlights in almost exhausted.* E nou kontan nou'n ganny en pti larzan an plis dan *Mid-Year Review*.

So, tou sa bann kotasyon ki mon'n eksplike taler ki nou pe rode. Byensir avan lannen i fini nou pou annan bann peyman ki nou pou bezwen fer pour sa bann konponan. So, mon pa ekspekte ki pou annan okenn larzan ki reste. So, nou travay pou kontinyen avek Bidze lannen prosenn. Mersi.

MR DEPUTY SPEAKER

Mersi. Nou ava aprezan apel Manm Elekte distrik Pointe Larue, Onorab Gabriel pour kestyon 220.

HON CONRAD GABRIEL

Mersi Mr Speaker. Mon a dir bonzour tou dimoun a lekout. Espesyalman zabitant Point Larue. *Welcome* bann envite dan *gallery*. *Welcome* Minis ek ou *panel*. Kestyon i al koumsa;

Eski Minis i kapab donn sa Lasanble plis detay lo Proze *3rd Lane* dan rezyon lakot Pointe Larue, ki ti pou konmans kot *airport* e al fini kot *Police Academy*. Konbyen nou'n depanse ziska la e kan

ki sa proze i ekspekte konplete? Mersi.

MR DEPUTY SPEAKER

Mersi Onorab. Mon ava envit *panel* pour larepons.

**MINISTER ANTHONY
DERJACQUES**

Mersi Mr Speaker. Proze *3rd Lane* Pointe Larue ti konmans an Desanm 2023. E son premye faz i ankor pe kontinyen avek lentansyon pou konplete finisyon sa lannen. Proze i a en kou 5.7 milyon. E nou'n depans apepre 2.3 milyon ziskan la aprezan.

An se moman, dezyenm faz ki konmans kot premye faz i fini o bor *Cargo Terminal*. E li i pou fini kot *Amalgamated Tobacco*, pe pas dan prosedir *tender*. E i ekspekte konmanse mwan prosenn an Novanm sa lannen.

Trwazyenm faz pou komans kot *Amalgamated Tobacco* ziska Anse Faure e konekte avek Ile Soleil. E a sa moman nou pe mazin e nou pe diskite pour nou fer en prosedir e en metod *design and build* ki bokou pli vit ki nou, nou fer tou plan. E apre nou *tender*.

Devan zot dan Bidze byento dan detrwa zour, pou annan 3 *chiffre* ki pou vin a zot latansyon. Pour lannen 2025 pour Point Larue *3rd lane*,

nou'n fer en *request*. In ganny met dan *proposed budget* pour zot vot lo la. R13.6 milyon.

Pour 2026, R17.9 milyon. E 2026, R17.9 milyon. E 2027, R17.9 milyon. Mon a repete.

Lannen prosenn R13.6 milyon. Lannen 26 – 2026, R17.9 milyon. Lannen 2027, R17.9 milyon.

Nou ekspekte avek sa bann sonm ki nou pou kapab akonplir finalman sa *3rd lane* Pointe Larue ziska Anse Faure. Mersi Mr Speaker.

MR DEPUTY SPEAKER

Mersi *Minister*. Mon pou envit Onorab Gabriel pour siplemanter.

HON CONRAD GABRIEL

Mersi Mr Speaker. Eski Minis i kapab dir nou si sa Proze *3rd Lane* i pou mars paralelman ek sa proze *master plan* pou amelyor drenaz, e osi sa *master plan* pour redevelopman *airport*?

E Minis, ki garanti ki sa proze pou ganny konplete lo en standar ase o nivo? Akoz tou dernyerman nou pe war sa bann proze parey *track* sentetik ki pe zis monte...

(Interruption)

MR DEPUTY SPEAKER

Mon ava envit *panel* pou reponn sa 2 kestyon.

MINISTER **ANTONY DERJACQUES**

Mr Speaker, *master plan airport* i pa tous lo drenaz. Solman *of course*, ler i ganny enplimante, i pou tous en pe lo semen. Akoz pou bezwen annan bann semen ki konekte nouveau terminal avek *highway*.

Lo sa ki konsern drenaz e pou amelyor drenaz Pointe Larue, wi, SLTA ler i *design ouswa* ler i fer sa *concept* pour *design and build*, i pou pran kont sa problem drenaz.

Mr Speaker, eski *CEO* i kapab kontinyen e i kapab azout lo la? Mersi.

MR DEPUTY SPEAKER

Mersi. *CEO*?

CEO **SLTA** **PARINDA HERATH**

Mersi Mr Speaker. Proze *3rd Lane* Pointe Larue, enn bann konponan pli enportan ladan se sa konponan drenaz. Parey nou tou nou konnen, i en landrwa ki *flood*. E nou *design* ki nou'n fer in enkorpor drenaz kot nou pe fer bann drenaz vin en pe pli larz posib, e osi pli fon, kot i posib.

Me selman Pointe Larue son topografi i en pe difisil pour nou fer li vin pli dan fon, akoz i en landrwa ki plat. E osi bann pwen desarz i limite. Me selman avek nou proze kot nou pe agrandi semen, nou pe sey met bann drenaz anba

trotwar e i pou vin menm larzer kot i posib avek trotwar, pou fer sir ki nou pe donn li son *maximum capacity* parey nou dir.

Me mon krwar i enportan pou note ki, ki mannyer Pointe Larue i ete avek gro lapli, e sirtou si i koensid avek *high tide*. Definitivman dan sa bann levennman koumsa i pou kontinyen annan bann *flooding*. Me selman i pou ganny *minimize*. E nou pe travay lo sa bann proze pour nou kapab evakye delo o pli vit posib. Mersi.

MR DEPUTY SPEAKER

Mersi CEO.

MINISTER ANTHONY DERJACQUES

Mr Speaker, Pointe Larue i parey en soukoup. Lo en kote ou annan montanny. Apre ou annan bann rezidans. Lo lot kote ou annan *runway* avek konstriksyon. Li sa semen i dan son fon. Prezan tou delo, tou lede kote i vin dan milye. Prezan ou bezwen fer bann drenaz ki li i fer delo al dan lanmar. Apre anba *runway* i al dan delo sale.

Be ler prezan i annan en kantite lapli. Savedir en kantite lapli i ranpli drenaz. E an menm tan lanmer i mont, sa delo pa kapab al ase vit. Alor i fer *flooding*.

Alor nou, nou pe sey *design* sa drenaz pou vin pli *angled*, pli larz pour li kapab maksimiz lavites ki delo lapli avek delo sale ki antre, ki ranpli bann lanmar lot kote semen, i kapab evakye pli vit posib ler natir i permet.

Se pour sa rezon ki CEO in dir ki i difisil. Wi i difisil. Solman nou pou fer sa ki pli mye ki nou kapab. I annan ki'n dir mwan akoz nou pa zis lev semen. Si ou lev semen, tou sa delo pou al dan sa bann lakaz o bor li. Alor *flooding* pou dan son laplenn kot Pointe Larue i ete.

Alor i en problem ki pou reste avek nou. Solman nou bezwen, parey nou dir an Angle, *mitigate and engineer our way out of it*. Mersi Mr Speaker.

MR DEPUTY SPEAKER

Mersi Minister. Onorab ti'n demann en garanti lo kalite travay i ava lo sa nivo ki li e zabitant Pointe Larue i ekspekte.

MINISTER ANTHONY DERJACQUES

Mr Speaker, ou'n demann en kestyon lo bann kontrakter?

MR DEPUTY SPEAKER

Non. Onorab ti le en garanti ki travay i ava lo sa nivo ki li avek kominote Pointe Larue i lo en

standar ki zot pou aksepte. I ti le en garanti lo la.

MINISTER ANTHONY DERJACQUES

Mr Speaker, nou sey mye posib ler nou met bann plan devan, pour nou konnen lekel. E nou fer nou *due diligence* nou bann kontrakter.

E nou ekspekte osi ki *Procurement Board* avek *Tender Board* ler zot annan bann *bid* devan zot, zot osi zot egzamin byen rikord sa bann kontrakter, klasifikasyon sa bann kontrakter. E travay ki sa bann kontrakter pe fer, pou fer sir ki zot annan travay ek masin, avek lekipman, avek materyo pour zot akonplir zot bann kontra.

Alor wi, i annan bout dan nou lanmen. Solman laplipar nou pa enterfer avek, akoz i al anba *Procurement Act* kot bann lot komite ki endepandan avek transpor avek *SLTA*. Alor nou bezwen *trust the system*. E nou bezwen aplik Lalwa *Procurement Act*. Mersi Mr Speaker.

MR DEPUTY SPEAKER

Mersi Minister. Mon pou donn laparol Onorab Larue.

HON FLORY LARUE

Mersi Mr Speaker. Bonzour Minis avek ou delegasyon. Mr Speaker, mon ti a kontan profit sa lokazyon pou felisit

Minis avek sa travay ki i pe fer lo sa proze sid Mahe. Kot avek en standar tre eleve zot pe elarzi semen.

Apre tou sa lannen ki nou ti anvi sa bann semen ganny elarzi, ozordi nou war li pe ganny arive anba en *Minister LDS*. Mersi Minis ek ou tim.

(APPLAUSE)

HON FLORY LARUE

Mr Speaker, proze in ariv kot *Cargo Terminal*. E dan sa dezyenm faz nou vwar ki anmezir ki larzan pe ganny mete pou fer sa *3 lane*, rezon prensipal se pou fer mouvman trafik *flow* pli byen dan sid Mahe.

Alor mon ti a kontan demann Minis, dan sa dezyenm faz letan zot pe fer bann drenaz, eski i annan bann facilite tel ki retir sa bann *speed bump*, ouswa refer li vin pli pt, akoz i koz en ralantisman trafik? E met en *traffic light* kot *Cargo Terminal* i ete pou *limit* kantite fwa ki transpor i arete letan dimoun pe travers semen pou al travay, ouswa pou al aste en snak. Mersi.

MR DEPUTY SPEAKER

Mersi Onorab. *Panel?*

MINISTER ANTHONY DERJACQUES

Mersi Mr Speaker. *Traffic lights* kot *Cargo Terminal* mon krwar i en nesesite. Akoz pou annan en *extra lane* la osi. Ler i zis *2 lanes - one going up*, enn pe *go down*. Wi i annan danze.

Solman ler i annan *3 lane*, i ogmant sa danze pour bann pyeton ki pe koup semen, akoz prezan i annan *3 lane* trafik. Alor nou pou vreman konsider e aprouv en *traffic light*.

Lo bann *speed bump* nou pou bezwen fer en letid, nou bezwen fer en *mapping*. Nou bezwen get son lefe lo trafik avek ki mannyer trafik pou ete avek sa *3rd lane*. Savedir lo la nou pa ankor fer en desizyon final Mr Speaker. Solman nou pou fer tou pour nou asir ki enn ;- *traffic* i bouze.

E i pour sa rezon prensipal ki nou pe fer sa *3rd lane*. Akoz nou konsyan ki dan bomaten nou perdi 1 erdtan, 1 erdtan en kar pour nou desann anvil pou al travay. E dan aswar pour nou ariv kot nou.

Nou osi 4 er nou perdi en kantite letan dan bann *road jams*, dan bann *traffic jams*. Espesyalman kot sa *roundabout* kot *airport*. Nou pe sey fer tou sa ki nou kapab pour nou amelyor sityasyon.

E parey zot in *notice*, nou'n fini konmans sa *layby* kot lekol Pointe Larue. Kot nou'n fini konmans sa

konstriksyon zot ava vvar. Kot pou annan en gran *layby* kot bann paran ki pe al *drop bann* marmay kot lekol.

I kapab antre dan sa *layby* parey nou'n fini fer konmansman sa lannen Anse Aux Pins. Zot *drop-off* apre zot *join the traffic*. Parey osi nou'n fini fer e nou'n akonplir kot Mont Fleuri. Alor pour Pointe Larue, in fini konmans ganny konstrir e zot ava war li pe arive la konmela.

Mr Speaker, nou konsyan alor e nou pou sey fer li. Pa zis pour sirkilasyon trafik, be osi pour *safety* ek sekirite pour tou bann pyeton. Mersi Mr Speaker.

MR DEPUTY SPEAKER

Mersi Minister. Onorab Pillay?

HON SEBASTIEN PILLAY

Mersi Mr Speaker. *Minister*, mon'n ekout ou nonm serten sonm. Mon pe regard bann dokiman Bidze ki nou ti aprouve pou sa lannen. 2023, ti annan R3.5 milyon ki ti ganny bidzete pou proze *3rd lane*. An 2024 ti 7 milyon. *Forecast* 2025 i 5 milyon e *forecast* 2026 i 2.5 milyon.

Eski ou pe dir ek Lasamble ki *on top of* sa ki'n ganny *forecast*, sa larzan pou vin anba en *PSIP* savedir en *Public Sector Investment Program*. E therefore, eski i pou ganny kontrole par *SLTA*

oubyen par SIA? Or eski sa larzan 7 milyon zot pa'n servi. E ki sa aprezan pe al sanze zot pe sanze konponan. Akoz i pa kler baze lo bann sif ki ou'n donn nou konbyen egzakteman ki'n ganny depanse e konbyen ki mwan mon pe lir la pou le moman?

E si ou kapab konfirmen Minis pou nou, si se SLTA ki pou *lead* sa proze oubyen si se SIA ki pou *lead* sa proze? Akoz ler nou pe regard konpetans pou dil ek semen se SLTA ki annan plis. So, nou ti a kontan konnen ki mannyer sa pou ganny fer Mr Speaker? Mersi.

MR DEPUTY SPEAKER

Mersi. Minis, larepons?

MINISTER ANTHONY DERJACQUES

Mersi Mr Speaker. Bann propozisyon pou sa larzan pou *3rd lane* ki mon'n fini nonmen sa 13.6 pou lannen prosenn avek sa 17.9 pou 2026, ek en lot 17.9 pou 2027 pe vin dan en *Bill* devan zot, kot zot, zot pou debat byento. E Minister Minis Hassan, Naadir Hassan pou la devan zot.

E zot ava diskite egzakteman kote i pe ganny plase. Solman yer swar mon'n koz avek li ankor e in dir mwan sa larzan pou dan Bidze. *Of course*, Mr Speaker, mon reasir Lasanble Nasyonal ki *3rd lane* pou reste anba *purview*

SLTA. SLTA ki pou enplimant li, se li ki spesyalis lo semen; *of course* i travay kot a kot avek Departman *Land Transport* avek PS Andre.

E sa *3rd lane* pou reste avek SLTA. Egzakteman dan legalman, sa diskisyon i avek zot komansman le 31. E zot pwennvi pou ganny pran kont par Minis Finans ler i vin devan zot dan detrwa zour. Mersi Mr Speaker.

MR DEPUTY SPEAKER

Mersi Minister. Dernyen entervenan lo sa pwen, Onorab Adelaide.

HON FRANCOIS ADELAIDE

Mersi Mr Speaker. Bonzour Minis avek ou delegasyon. Bonzour bann envite dan galeri, e tou dimoun ki a lekout. Minis pou kontinyen en pti gin lo kestyon Onorab Larue, petet mon ti ava demann ou. Dabor mon bezwen remersi lapolis pou zot 2 zofisyen zot mete ki vreman de konteste semen bomaten ek aswar, kontinyen sa bon travay.

Petet zis pou kontinyen lo kestyon Onorab Larue, eski dan lentermedyer tanporer ti annan en diskisyon ki ti pe diskite pou *at least* met en *traffic light* tanporer sirtou al kot *airport* la. Akoz nou trouve poudir *anyway*, sa nou konstate ki dimoun i koup

semen mannyer zot anvi. E petet si i annan en pe plis lord mon krwar petet i ava ed en pe parey bann lapolis pe ede.

Eski petet i enkli konsiderasyon ki ou Minister i kapab pran an kont? Mersi.

MR DEPUTY SPEAKER

Mon krwar Onorab, Minis in fini donn son garanti lo la poudir wi i en nesesite. In fini reponn, koumsa...

HON FRANCOIS ADELAIDE

Minis, in dir pou dir ler pou fer *3rd lane* zot pou mete en *traffic light*. Nou pe dir tanporerman, akoz la definitivman i bezwen, *thank you*.

MR DEPUTY SPEAKER

Ok, mon ganny ou. Zot le en lalimyer tanporer Minis.

MINISTER ANTHONY DERJACQUES

Mr Speaker, nou'n fini aste sa *traffic light*, i la. Nou pa ankor fini lot kote semen lo *mountain side* kot *pavement* pou ete. Tou keksoz pou bouze, nou pa oule al fikse en *traffic light* ler kontrakter i ankor la, travayer i ankor la, *working site* i ankor lanmenm la o bor. Keksoz pa ankor *clearly demarcated* lo semen, akoz tou sa bann *marking* pou sanze parey ou vvar.

E kontrakter i la, nou pa kapab al enterfer a sa moman

la avek lalimyer. Ki nou'n fer i annan lapolis la toulezour, i annan 2 zot ki la toulezour. E zot ed nou pou *manage* sityasyon ziska ler sa proze i konplete. *Traffic light* i vin enn bann dernyen enstalasyon ler ou'n fini fikse ou semen, ou *pavement* e tou keksoz i annord. E i al ansanm avek *Zebra crossing* ki pou bouze. Bann laliny ek bann *lane* ki pou ganny re entrodwir pou annan *3rd lane* la.

Alor, tousala pou sanze. Alor pou le moman i en *track construction site* li nou pa anvi al entrodwir sa novo *traffic light* ek pas bann laliny anba semen e par egzamp ouswa dan bann *duct* dan bann rigol kot tousala pe al ganny sanze, akoz nou pou bouz lot kote ler nou fer novo *pavement* lot kote. Mersi Mr Speaker.

MR DEPUTY SPEAKER

Mersi Minister. *We'll take a final one and quick one* dan 3 minit. Onorab Romain avan ki nou bouz lo lot kestyion nou fini midi edmi.

HON GEORGES ROMAIN

Mersi Mr Speaker, pou donn mwan sa letan pou demann sa kestyion. Minis, letan nou ep koz sa *3rd lane*, nou konnen Pointe Larue i annan gran *open drainage* ki son drenaz i vreman gran i ouver en kantite, e sak fwa i annan

bokou lapli, ler i *flood* parey Minis in dir sa problem pa pou kapab zanmen rezourd 100 poursan. Akoz sityasyon landrwa ki mannyer i ete.

E ler delo i monte byensir ou pa war sa drenaz e delo i tonm ladan. Ki provizyon zot pe fer, si sa *3rd lane*, sa semen pa pou kouver sa drenaz? Si non, ki provizyon zot pou fer pou evite ki si sa i arive ki transpor pa tonm dan sa bann drenaz. Mersi Mr Speaker.

MR DEPUTY SPEAKER

Mersi Onorab. *Panel?*

MINISTER ANTHONY DERJACQUES

Eski CEO Parinda, i kapab reponn Mr Speaker?

MR DEPUTY SPEAKER

Sertennman Mr Speaker.

CEO SLTA PARINDA HERATH

Mersi Mr Speaker. Onorab, annefe letan sa proze i ganny enplimante, i pou napa sa bann *open drains* i pou ganny kouver par bann slab. E i pou annan bann *channel* ki delo pou antre ladan. So, sa risk kot transpor i pou tonm dan drenaz i pou ganny tire.

Me selman byensir i annan posibilite ki landrwa pou *flood* avan delo i desann. So, nou pou kontinyen enstal serten sa bann *bollards* parey

nou dir, zis pou endik bor semen avek kot trotwar i ete. Me selman i pou napa sa risk transpor pou tonm dan rigol. Mersi.

MR DEPUTY SPEAKER

Mersi CEO. Dernyen kestyion lo nou *Order Paper* ozordi dan sa sesyon. Kestyon 221 dan non Manm Elekte distrik Takamaka Onorab Mondon.

HON TERENCE MONDON

Mersi Mr Speaker. Mon kestyion i lir koumsa; Eski Minis i kapab eksplik nou Lasanble ki rezon sa proze *southwest coast* in arete Anse Forban? E ki demars ki pe ganny fer pou sa proze reoran? Mersi Mr Speaker.

MR DEPUTY SPEAKER

Mersi Onorab. Mon envit *panel* pou larepons.

MINISTER ANTHONY DERJACQUES

Mr Speaker, i vre ki nou'n lanse, nou'n komanse e nou'n fer bon longer par egzanp *pavement* Ans Forban. A en moman nou'n arete, sa i en problem *wayleave* kot nou pa'n ganny permisyon *the owner* pou nou kapab kontinyen avek en pe rod *widening*, selman espesyalman avek *pavement*.

An menm tan a lantour *land title T1731* avek *T2877* i

annan problem drenaz ki nou pe analize. Ki nou pe fer? Nou konsyan ki letan pe pase, i annan diskisyon pe ganny fer avek kontrakter ki mannyer nou pou *tackle* sa problem. Mon'n re anvoy nou bann Zofisyen *Land Transport* pou apros ankor bann propriyeter.

Mon asire ki si propriyeter pe ekout nou in tann mon lapel, ki sa bann proze i dan lentere nasyon, i dan lentere piblik, i dan lentere tou. E an menm tan i ogmant valer zot propriyete. Nou pa kapab komans en *pavement* en bout, apre i vin ou propriyete *pavement* i reste lanmenm, rigol i reste lanmenm, delo sorti dan sa rigol i riske *flood* ou *property*.

Apre nou sot ou propriyete, nou al kot en lot propriyete nou kontinyen. Delo i riske tou lede kote antre lo ou propriyete. Alors silvouple ekout nou, negosye avek nou, donn nou *wayleave* pou nou kapab akonpli sa bann proze.

Mr Speaker, parey mon ti dir dan dernyen sesyon dernyen fwa dan zot lot term annefe mon krwar mon ki ti dernyen e mon ti koz lo la. E la ankor enn fwa mon dernyen avan zot antre dan Bidze. E mon tous lo menm problem.

Problém se nou bezwen *wayleave*, nou bezwen

permision bann propriyete. I annan bann landrwa dan *phase 1, 2,3,4* kot i annan bann *gaps*. Ler zot fer letour dan *weekends* zot vvar, i annan en kantite landrwa ou kapab ale pou lanmwatye en kilomet, apre en sel kou i annan en trou. I annan en landrwa kot napa *pavement*, apre ou sote i kontinyen lot kote.

I vilenn, i pa bon menm pou bann touris. Enn mon bann lentansyon se *echo tourism*. En touris i debarke pou li kapab vizit nou pei, nou zenn pou zot *hike* espesyalman dan *south* i annan bann *pavements* ki zot kapab tay lo la, zot a mars lo la. Zot kapab vizit nou pei.

E ansanm avek sa bann *pavement* pou annan tou. Tou annan *crash barriers*, pou annan *capsized* dan milye, pou annan bann laliny ki pou desinen. Pou annan tou bann lenfrastiktir neseser. Sel keksoz ki nou pa'n kapab fer malerezman se en *bicycle lane*.

Si mon ti annan plis *wayleave*, mon ti pou fer *bicycle lane* kot en dimoun i kapab *circle the whole of Seychelles*. Alor sa i preske mon dernyen demann ankor pou nou tou, annou donn permision, annou donn *wayleave*.

Sa pti bout later o bor semen ou pa pe al konstri en

lakaz la. Ou pa pe al met en lotel o bor semen. Sa *pavement* i vin pou ou kot ou mont lo la. E ou zanfan e ou bann viziter i antre kot ou dan en fason ki byen, ki an sekirite, ki *safe*. Alors, silvouple donn nou *wayleave*. Mersi Mr Speaker.

MR DEPUTY SPEAKER

Mersi Minister. Onorab Mondon Siplementer.

HON TERENCE MONDON

Mersi Mr Speaker. Minis, in mansyonnen ki la kot proze in arete vizavi *Allamanda* i annan en gro problem delo monte. E sa drenaz ki'n komans fer ki pa apropriye, eski sa pou kapab ganny rektifye avan lannen fini, avan ki nou al dan sezou lapli?

E Minis in osi mansyonn *wayleave*, petet eski zot pe mazin deza parey in mansyonnen pli boner pou al lo en lot letap, pou nou kapab fer sir ki sa proze i kapab kontinyen.

Petet ver *compulsory acquisition*. Eski zot pe mazin sa pou nou kapab fer bouze?

MR DEPUTY SPEAKER

Mersi Onorab.

MINISTER ANTHONY DERJACQUES

Mr Speaker, koman en Polisi Gouvernman. E mon'n osi koz avek sa Minister ki annan sa

lotorite legal *Minister of Lands and Housing*, nou pe bouz dan direksyon *land acquisition*, akoz nou vwar ki i dan lentere piblik ki bann lenfrastruktir parey semen, *pavement*, met lalimyer o bor semen lo later prive i strikteman neseser.

San bon semen, san bon *pavement* pou napa devlopman, pou napa sekirite, pou napa *safety*, pa zis pou sa propriyeter, me pou tou Manm piblik pou ou zanfan, mon zanfan. Ler i al lekol, ler i al legliz pou bann tantin ki pa bezwen sot dan rigol ler bis tata i pas o bor zot.

Pou 2 loto kapab pas o bor kanmarad san enn rod en *reverse*, rod en nespes landrwa, en trou pou li antre ladan pou les en bis tata pase. Nou pou bezwen fer *land acquisition*. Alor, i kler ki mon repet ankor, silvouple donn *wayleave* sansan Gouvernman pou bezwen regard pou fer *land acquisition*. Mersi Mr Speaker.

MR DEPUTY SPEAKER

Mersi Minister. Onorab Adelaide.

HON FRANCOIS ADELAIDE

Minister, petet mon a ed ou en pti gin, akoz mon osi mon'n an kontak avek sa bann propriyeter. Ou konnen Minis ki arive, dan lepase tro bokou bann dimoun ler zot in donn

later la zot in sipoze ganny en keksoz avek Gouvernman ki'n promet zot. E promes pa'n kite e bann dimoun i ankor per ziska konmela.

Minis, petet mon ava demann ou mon konnen ou en *gentlemen* e ou gard ou parol, akoz nou'n fer en bon pe keksoz Baie Lazare dabor mersi. Petet ki bann dimoun i kapab ekspekte sirtou par egzanp letan zot pe donn en pti bout later o bor semen.

E petet donn nou en garanti Minis poudir tou bann kondisyon ki favorab ki akseptab, sa bann dimoun ki'n demande Gouvernman pou onor zot promes e zot pou delivre parey nou Gouvernman i abitye fer. Mersi Mr Speaker.

MR DEPUTY SPEAKER

Mersi Onorab. Panel larepons?

MINISTER ANTHONY DERJACQUES

Mr Speaker, parey zot in trouve zot menm ler zot fer letour dan *west* ek dan *south*, i annan plizyer landrwa kot nou'n fer pon pa neseserman *the main road*, me lo *the side roads* pou ed bann dimoun.

Nou'n fer *boundary wall* detrwa landrwa. Par egzanp imedyatman apre Anse La Mouche kot ou kit lans ou kontinyen, ou war en *boundary wall* pe monte. Ler

ou ariv Takamaka ou war *boundary wall*. Nou'n osi fer bann miray pou ed *privacy* kot semen i koste kot ou salon kot en dimoun ki dan en transpor i pa get direkteman dan ou salon. Nou'n fer en miray pou ed *privacy*.

Nou'n fer enn de bann pti proze kot i permet. Ki mon pe sey dir zot, pou sa gran proze 19.7 kilomet semen dan Bidze 2024 ki nou ankor ladan nou ti annan zis apepre R10 milyon. E nou pe sey servi sa R10 milyon pou fer sa bann pti proze. E partou kot nou'n promet nou pe fer li. E nou'n delivre akoz levidans i la, zis fer letour partou kot ou war sa bann pti miray, bann pti rigol ki'n ganny fer, bann *boundary wall* ki'n fer se nou.

E nou'n pey sa e nou pe pey sa pa zi atraver sa fon be avek nou prop fon sa ki zot ti vot lo la, zot ti met anba *Lands* sa 15 milyon. Ladan nou'n dedye 10 milyon ladan pou nou fer sa bann pti proze ki ankor *on going*. E bomaten koman mon'n ariv dan biro ankor en lot dimoun in sinyen.

E pou li i ti annan zis en pti drenaz pou fer ki pa ariv plis ki apepre en 80 a 100 mil. Me selman se enzenyer Mr Rose ki fer sa bann *estimate*, e se li ki finalman ki pou deside apepre konbyen i arive e apre i anvoy sa bann *concept drawing* apre i diskit avek

kontrakter. Savedir bann teknisyen ki desid lo la. Zot fer rekomandasyon, zot ki travay dir lannwit lizour.

E se zot ki lo teren, e mon anvi remersi zot pou tou zot letan ki zot in dedye an plis ki sa travay 8 er/4 er. Zot travay ziska aswar, zot travay dan Sanmdi dan Dimans dan *public holidays*. Ou konnen akoz? Akoz bann propriyeter i travay 8 er/4 er. Alor nou bezwen annan bann tim sorti kot *Land Transport* e osi dan mon *Secretariat*, bann zenn, bann zenn.

E zot al laba lo site apre ler travay, akoz bann propriyeter i ariv kot zot espesyalman ler ou dan *south* ou ariv kot ou 5 er, 5 er edmi, 6 er. E alors zot pe travay ziska 7 er edmi, 8 er diswar toulezour pou tou sa bann letan. E zot in donn tou zot zefor, pou sa proze vin en sikse. E mon anvi remersi zot. Mersi Mr Speaker.

MR DEPUTY SPEAKER

Mersi Minister. Mon krwar nou'n byen zer letan pou nou kapab pran nou *break* aprezan. E rann lantern SBC avan midi edmi. Nou ava remersi *panel* ki'n zwenn Minis pou sa dezyenm parti kestyon. Ozordi ti annan Sef Egzekitiv Lazans Transpor lo Later Mr Parinda Herath. Ti osi annan *Principal Engineer*

avek *Chief Policy Analyst* sorti kot Minister Transpor sa i Mr Carl Rose avek Manmzel Veronique Nibourette.

E byensir delegasyon ti pe ganny dirize par Minis pou Transpor Mr Antony Derjacques. Nou remersi zot pou zot partisipasyon avek nou. Nou pou *adjourn* la pou nou repran travay 2 er avek en Mosyon. E *Chairperson Women Caucus*, in enform nou e envit nou i annan en prezantasyon pe fer dan *Members Lounge*, par bann travayer Minister Lasante. E Komite FSSD i annan miting, zot annan en miting avek LWMA sa osi zot pe envit Manm? Sa ki anvi vini, donk, i annan keksoz pou fer avan nou zwenn 2 er. Donk, bon apeti nou a repran travay taler.

(BREAK)

MR DEPUTY SPEAKER

Bon apre midi tou Manm Onorab. *Welcome back*. E pou piblik i pe ekout nou byenveni pou nou kontinyasyon travay pou sa Mardi. E nou prosen *item* lo *Order Paper*, se en Mosyon ki dan non Manm Elekte pou Distrik Grand Anse Praslin Onorab Wavel Woodcock. Donk, mon ti ava envit Onorab pou prezant ou Mosyon. En Manm ava

segonde avan ki nou al lo lenthervansyon. Onorab.

HON WAVEL WOODCOCK

Mersi Mr Speaker. Bonn apre midi tou dimoun a lekout, espesyalman tou zabitant Grand Anse Praslin, lo Praslin e Zil Pros. E osi en bonn apre midi pou tou mon bann koleg dan Lasanble. Mr Speaker, mon Mosyon i lir *comme suivant*:

Sa Lasanble i demann Gouvernman pou kontinyen sa travay pou met an plas bann facilite ki manke lo Zil Pros parey *indoor gymnasium, judo, dojo, micro enterprise center* e *track sentetik* ki pou anmenn plis devlopman lo Praslin avek La Digue. Mersi.

MR DEPUTY SPEAKER

Mersi Onorab. E Mosyon Onorab Porice.

HON DOYACE PORICE

Mersi Mr Speaker. Bonn apre midi tou dimoun. Mon pe segonn sa Mosyon. Mersi.

MR DEPUTY SPEAKER

Mersi Onorab. La ki Mosyon in ganny segonde, mon ava envit ou pou fer ou largiman prensipal.

HON WAVEL WOODCOCK

Mersi Mr Speaker. Parey Lasanble i lir pe demann Gouvernman pou kontinyen

sa travay pou met an plas sa bann facilite ki manke lo Zil Pros parey mon'n mansyonnen, *indoor gymnasium, judo dojo, micro enterprise center, track sentetik* e bann lezot proze ki pou anmenn plis devlopman lo Praslin avek La Digue.

Mr Speaker, mon'n fer kler dan mon Mosyon ki prezante, ki sa Mosyon pe demann Gouvernman pou kontinyen sa travay. Ki vedir poudir i annan serten travay ki'n deza komanse Mr Speaker. E parey travay i pou toulstan annan, i pou toulstan annan travay pou fer. Parey en tonton ki mon konnen in toulstan dir i dir mwan i annan lanmor dimoun, me selman zanmen i annan lanmor travay. E travay i pou toulstan annan travay i kontinyen.

Mr Speaker, bokou travay in ganny fer deza pandan sa dernyen 4an pandan ladministrasyon ozordi. E menm anba lepase, e menm prenon kont Mr Speaker ki sa ladministrasyon dizour in fer fas avek bokou bann sityasyon ekonomik anmennen par kriz ekonomik Mr Speaker pandan 2an kot nou tou nou konnen sityasyon ki pei ti ladan.

Sa ladministrasyon Mr Speaker, in kapab akonplir e fer bokou, bokou proze. E nou bezwen admet poudir i annan

bokou travay ki'n ganny fer. E sa Mosyon ki devan nou Mr Speaker, pa pe get zis kour term me i pe osi mazin lonterm. E mwan mon en dimoun ki krwar pa zis mwan mon prezimen tou bann MNA lo Zil Pros, lo Praslin/ La Digue. Nou krwar ki met an plas bann fasilité i en lakle ki nou anvi war devlopman lo nou zil.

E parey mon'n dir i annan bokou proze ki'n ganny fer ase resaman. E i annan bann proze ki'n ganny antreprann dan lepase anba tou bann ladministrasyon ki'n la dan lepase. E mon bezwen dir Mr Speaker, i annan bann proze osi diskisyon dan lepase in ganny fer bann diskisyon ki anba ladministrasyon avan i annan bann diskisyon ki ti ganny fer. Bann *time* ki mon dan 6enm Lasanble Onorab Gill i la e nou'n kontinyen plizyer sa bann diskisyon ozordi avek bann nouvo Onorab lo Zil Pros ki'n vini, Onorab Uranie, Onorab Porice.

E i annan bann proze ki'n ganny materyalize. Oparavan, i annan bann proze ki pa'n materyalize, i annan proze ki'n materyalize anba ladministrasyon avan, i annan ki pa'n materyalize. E bann proze ki'n materyalize anba nou ladministrasyon. E i annan ankor plizyer proze ki

in materyalize. E i annan bann proze ankor ki nou ti a kontan war koman zabitan Zil Pros ganny fer, ganny materyalize lo nou bann zil lo Praslin avek La Digue.

So, Mr Speaker, bi mon Mosyon se pa pou lager ant sa 2 ladministrasyon lekel ki'n fer plis ou mwens. Bi mon Mosyon se pou nou get a kour term, *mid-term*, long-term ansanm pou nou kapab fer bann propozisyon annou regarde, annou fer en analiz lo ki bann devlopman ki'n arrive lo nou zil, kwa ki nou zabitan pe demande, kwa ki nou annan ozordi, kwa ki nou kapab amelyor lo la, kwa ki nou kapab *improve* lo la, kwa ki nou bezwen fer travay lo la. E ki bann nouvo proze ki nou kapab fer pou benefis zabitan nou zil, sirtou prenon kont sa ki nou zabitan in koz avek nou, nou bann Manm Elekte ouswa Proporsyonnel lo Praslin avek La Digue.

I enportan pou nou get lepase; i enportan kot nou ete la e i enportan ki nou get laspirasyon zabitan nou zil, nou distrik, sa 2 Zil Pros kwa ki nou dimoun i anvi war. Eski zot satisfe avek sa ki'n ganny fer pandan sa bann dernyen 10 an, 20 an 1 an, 5 an e kwa ki zot anvi war *going forward*.

E mwan menm a plizyer repriz Mr Speaker, pa zis mwan plizyer mon bann koleg,

nou'n anmenn Mosyon kestyon e mon'n adres lo bann size parey mon'n dir konsernen laspirasyon mon zil. Mon zil ki mon'n ne Praslin e osi Mr Speaker, mon'n osi koz lo La Digue. Parey mon dir mon pa mon tousel. Me a plizyer repriz diskit lo bann size pertinan ki konsern sa 2 zil Mr Speaker.

Mr Speaker, mon bezwen dir pou dir Praslin avek La Digue nou zabitan i annan en kantite pou zot donnen. I annan en kantite potansyel dan plizyer domenn, dan *sport* i annan plizyer potansyel dan plizyer sekter, tourism, *you name it across sectorial* nou'n ede lev bokou bann profesyonnel ozordi ki pe kontribye dan lekonomi nou pei Mr Speaker.

E mon santi poudir si nou anvi kontinyen war lepanouisman nou zil, lakle se fer bann facilite ki nou zabitan i bezwen pou ankouraz e ed zot dan zot devlopman. So, far in annan i annan bokou facilite ki'n ganny fer lo zil. E parey mon'n dir i annan bann facilite ki'n ganny fer avan.

E osi i annan bann facilite ki resaman in ganny enplimante, in ganny fer bann novo proze ki'n ganny fer lo zil lo Praslin avek La Digue. Zisteman Mr Speaker, zis pou donn en pe legzanz lo bann facilite ki nou'n war ase

resaman Mr Speaker, lo zil ki'n ganny fer e i annan bokou diskisyon lo sa bann diferan proze. Lopital La Digue i enn. Lopital La Digue Mr Speaker, annefe i fek annan en kestyon lo size kou elektrisite ki annan sizesyon ki'n sorti ki petet nou kapab konsider met pano soler lo la pou ede koup sa kou elektrisite.

So, sa i en size ki'n ganny enplimante ki pe benefisyen zabitan La Digue. Nou annan bann proze Por ki'n ganny fer lo Praslin, lo La Digue osi, *Passenger Terminal* Ero ki'n ganny fer Baie Ste Anne avek tou bann facilite e bann *amenities* neseser. I annan serten travay ki ti'n komanse anba ladministrasyon avan.

E apre bann novo facilite in ganny konstri anba ladministrasyon Mr Speaker e plizyer lezot proze ankor Mr Speaker parey Proze Baz *Coast Guard*. Le moman ki *passenger terminal* in sorti kot i ti ete avan in bouz la dan sant Baie Ste Anne deswit sa vye *passenger terminal* ozordi in vin en baz *Coast Guard* ki pou ede dan lalit kont drog.

E ase resaman mon krwar tanzantan dan nouvel nou pe tande ki bokou bann bato pe ganny entersepte dan lanmer Sesel par selman bann bato ki sorti aletranze. Me osi bann bato ki malerezman se

bann Seselwa ki pe *involved* dan trafik drog.

Nou'n war bokou devlopman Mr Speaker, resaman Ile Eve e zisteman i annan plizyer diskisyon ki'n deroule depi dan 6enm Lasanble avek Onorab Gill i ti preznan. E ozordi Onorab, Onorab Porice osi, nou diskit li sityasyon Ile Eve bann *issue* ki ti annan dan lepase. E ansanm ozordi nou pe war poudir i annan bann travay ki'n ganny fer Ile Eve pou deblok bann later. Kot later 25 later in ganny *allocate*.

I annan ankor en pe later ki pe al ganny *allocate* byento. E bokou bann fasilite semen, drenaz, in ganny enstale Ile Eve. E en lord in ganny mete, ti annan en pe *issue*, en pe dezord lo zil. E la nou war keksoz ozordi lord in ganny mete. E bokou nou bann frer bann biznesmenn lo Praslin pe ganny akse avek later. So, nou vvar sa bann keksoz ki pe ganny fer ki pe benefisye plizyer sekter lo sa kote Ile Eve, sirtou pou benefisye bann biznes lo Praslin.

Mr Speaker, en keksoz ki tou MNA Praslin in adres sa Mr Speaker. VTS *Vehicle Testing Station* Mr Speaker, i ti en konzesyon kot SPTC pou fer tes transpor laba.

E la ozordi en nouveau stasyon en *Vehicle Testing Station* pe ganny fer Ile Eve ki

byento pou konplete. E ki bokou nou bann zabitan pou benefisye. Mr Speaker, semen segonder e semen primer Mr Speaker. Ozordi nou war bokou plis semen pe ganny fer, annefe dan mon distrik Grand Anse. E mon konnen Baie Ste Anne osi, i annan en kantite semen pe ganny fer semen primer ki pou de bokou nou bann zabitan sirtou kot bann landrwa kot i annan 5/6 lakaz an montan.

E osi bann semen segonder ki pou en pe lannen ti demann fer en pe travay re sirfas Konsolasyon mon fek fer en letour Praslin *weekend* pase mon'n al gete kot travay in arive. E la in arive Anse Possession en byento mon konnen i pou kontinyen Anse Boudin ziska Anse Lazio.

So, i annan bann travay ki pe ganny fer. E partou kot ou pase resaman mon ti ansanm avek Minis Derjacques nou ti donn en *interview* lo SBC, kot nou ti pe koz lo bann pti semen ki pou benefisye nou kominote. I annan bokou pti semen ki pe ganny fer partou dan bann diferan trou ou kapab dir dan Grand Anse Praslin pou benefisye bann zabitan. E osi lo kote Baie Ste Anne en kantite sa bann pti semen pe ganny fer en pe partou. E pe al ganny fer parey Salazi e lezot landrwa ankor.

So, Mr Speaker, e menm Praslin mon bezwen dir en gran mersi *SLTA*. Nou'n benefisyé avek en bon pe lalimyer Praslin. Annefe nou'n ganny nou 200 lalimyer. 100 Grand Anse e 100 Baie Ste Anne, e mwan menm avek mon zanmi mon defen koleg *DA* Michael Jean-Louis avan ler i ti mor nou ti fer en legzersis pou fer letour Grand Anse pou idantifye bann landrwa.

E menm apre ki in kit nou, sa legzersis in kontinyen ansanm avek nouvo *DA*, avek Terry Volcere ki ansarz *SLTA* Praslin. E la dan tou bann landrwa nou pe met plis lalimyer, e bann dimoun ki bezwen i santi i bezwen lalimyer dan zot *zone* zot pe pran kontak avek Ladministrasyon Distrik. E nou'n fer nou mye pou nou enstal kantite plis lalimyer ki ti vreman neseser dan nou distrik. Sirtou pou benefisyé bann touris ki servi nou larout ki pe marse dan sant Grand Anse Mr Speaker, pou akse ek bann facilite, bann servis dan sant Grand Anse.

Mr Speaker, proze Stad Amitié annefe i annan en pe *issue* konsern lo sa stad ki mwan personnelman mon annan en konversasyon avek Minis Zialor. E mon ti osi koz avek *CEO NSC*, i annan bokou bann travay *maintenance* ki

bezwen ganny fer lo stad. Annefe dan Bidze sa lannen i annan R4.35 milyon dan Bidze, pou nou *sort out* en pe bann *issue* parey drenaz e apre *fencing* e baraz sa stad.

So, i annan enn de bann travay ki bezwen ganny fer lo sa stad Mr Speaker. E ki i annan larzan dan Bidze. En lot konversasyon ki'n deroule a plizyer repriz menm si plan orizinal sa stad ti pou enkli *track* sentetik ki pa'n ganny fer. Me selman sa i en keksosz ki nou ankor bezwen lo Praslin *track* sentetik pou bann atlet servi. Sa mon pou al en pti pe pli an detay lo la pli tar.

Annefe Praslin/La Digue nou 2 zil ki prodwir bokou bann atlet, tou bann Sanpyonna Atletik Enter skoler nou fer vreman byen. *More a less* ozordi nou pe get tou bann *sports*, nou premye atletik e *volleyball*. *Volleyball* la konpetisyon *weekend* si i pa Praslin i La Digue Mr Speaker. E i annan bann facilite ki enportan pou nou gannyen, akoz bokou sa bann facilite pou plizyer lannen in plito konsantre lo Mahe. E nou bezwen desantraliz sa bann facilite e anmenn li lo Praslin.

Me nou konpran sirkonstans Mr Speaker, nou konpran akoz en pe lanfaz sa 2 dernyen lannen pe ganny mete sirtou lo Mahe akoz i annan konpetisyon *CJSOI*. E

en kantite larzan de milyon, de milyon pe ganny depanse pou met annord *Sport Complex Roche Caiman*.

Nou'n ale, nou'n vizite menm Komite Medya, Lazenes, Spor avek Kiltir ki mon osi *Chairman* nou'n vizite. Onorab Uranie osi in akonpanny nou dan enn de bann vizit ki nou'n fer lo La Digue Mr Speaker, kot i annan plizyer bann facilite ki nou bezwen Mr Speaker lo Praslin.

Me akoz nou konpran poudir i annan sa *CJSOI*, e nou bezwen met bann facilite ki nou annan lo Mahe lo standar parey stad, *track, tennis court e gymnasium*. Nou bezwen annan bokou larzan ki'n ganny depanse pou met annord sa bann facilite an preparasyon pou *CJSOI*.

Mr Speaker, in annan en *master plan* pou *sport complex* Ile Eve. Dan lepase - annefe mon'n annan sa loportinite ler mon ti dan 6enm Lasanble ansanm avek Onorab Gill, nou ti zwenn avek Minis Larue.

Annefe ti annan en *interview* ki i ti donnent le 22 Out an 2017 lo *SBC*, kot i ti pe koz lo sa *Sport Complex* Ile Eve. E zisteman apre son *interview* ki i ti donnent ti annan en vizit ki ti ganny fer le 2 Septanm an 2017, kot nou ti get en sa plan annefe Mr Speaker sa *master plan*. E nou ti ganny dir poudir sa proze

pou kout environ R50 milyon ki ti pou en *foreign funding*.

Me i malere sa proze i pa'n materyalize akoz son kou. Me selman ti annan diskisyon pou *scale down* sa *project*. Lalis pou met an plas enn de facilite ki nou pli bezwen parey *indoor gymnasium*. Me menm si i pa'n materyalize Mr Speaker, nou ankor bezwen en tel facilite lo Praslin. E dan Bidze pou 2026, i pa pou malerezman i pa pou 2025.

Me pou 2026, i annan en alokasyon pou en mini *Palais de Sport* pou R7.5 milyon ki'n ganny bidzete pou 2026. Sa i en keksoz ki byen, mon ti a voudre i vin pli boner ki sa. Me selman mon'n ganny en konpran leksplikasyon ki mon'n gannyen se ki i annan en kantite larzan deza pe ganny depanse. E i annan lezot facilite ankor ki pe al ganny fer lo Praslin - sport.

E alor mon ganny dir poudir nou bezwen koud nou lenz dapre nou latwal. Me sa ki mon konnen nou lo Zil Pros Praslin la Gogue nou pou kontinyen met lanfaz lo sa bann facilite. Sirtou lo *sport* Mr Speaker, akoz *sport* i lakle Mr Speaker pou anpes nou bann zenn tonm dan bann move lenfliyans.

E la mon konnen poudir en *indoor gymnasium* osi Mr Speaker, mon krwar i annan en diskisyon pe deroule la pou

nou idantifye sa sit pou nou fer sa parey mon'n dir sa *mini Palais de Sport*, sa *indoor gymnasium* parey mon kapab dir. E i annan detrwa sit pe ganny diskite la, mon konnen i annan Marie-Jeanne i enn, i annan kot laplenn Grand Anse Praslin en morso sa laplenn.

E nou annan bokou bann klib ozordi ki bezwen al Mahe pou zot *compete*. E bann klib Mahe pa desann Praslin, e sa i fer ki i annan en kou adisyonnel lo bann klib Praslin ki toultan i bezwen deplase pou al tou *match* Mahe. E i annan bann klib ki fer vreman byen, nou annan *Praslin Boys*, nou annan *basketball team* ki fek ganny promosyon dan premye divizyon *by the way*.

E osi nou annan bann tim *volleyball* parey *Brotherhood, Praslin girls*. E nou annan bokou bann klib ki pe fer sitan byen ki bezwen al *compete* Mahe. E sa bann facilite pou ede devlop plis ankadre nou bann atlet lo zil.

Zisteman nou fek annan en konversasyon avek *CEO NSC* pa bokou letan pase. En detrwa mwan pase, kot in dir mwan ki lo size *fencing* lo laplenn Grand Anse Praslin e *fence in ganny order from Dubai*.

Deza travay in komanse lo laplenn Grand Anse Praslin pou fer novo *fencing*, bann

veye *fence* in ganny tire, byento nouvo *fencing* pou vini. E nou pou met nou *fencing* kot sa laplenn. E zisteman mon osi remersi brigad *DA* pou sa aktivite ki zot ti organize pou *clean up the world*. Zot ti vin ansanm kot zot ti netway deryer nou stad, en keksoz ki mon ti inifye.

Annefe mon ti koz avek *DA* pou nou fer sa pou netway par deryer stad, par deryer *stand - sorry* par deryer *stand* laplenn Grand Anse Praslin. E la nou pe gete ki mannyer nou kapab anbelir sa landrwa, akoz i annan en zoli site par deryer sa *stand*.

So, Mr Speaker, i annan bokou keksoz proze ki'n ganny enplimante lo Praslin pandan sa bann dernyen lannen. E menm parey mon'n dir i annan bann proze ki'n ganny fer avan. I annan serten bann facilite parey mon'n dir nou bezwen ankor travay lo la pou amelyore pou fer *maintenance* lo la, zis parey lo bazar Grand Anse Praslin ki nou ti bezwen fer en gro *maintenance* lo la.

E i annan lezot bann proze lapes ki'n ganny fer lo kote Grand Anse avek Baie Ste Anne, ki mon konnen tou bann *MNAs* i apresye. Zoli facilite lapes Baie Ste Anne in ganny fer e lo Grand Anse osi nou'n ganny nou *gear store*, nou'n ganny nou *ice plant*. E la i annan diskisyon pou nou

aranz e *extend* sa lasose Grand Anse. Annefe mon an konversasyon avek SFA pou sa proze.

Water Sport Center Grand Anse Praslin, proze in ariv staz *planning*. Dernyen komunikasyon ki mon'n gannyen avek CEO NSC, proze i sipoze komanse an Novanm. So, hopefully keksoz i ava annord ki sa facilite ki en pe letan bann zenn *Water Sport Praslin* pe demande zot ti a kontan. Akoz i mank serten keksoz, *changing room, toilet* pou bann fiy e lezot facilite ankor.

So Mr Speaker, kekfwa pli gro proze ki pe al ganny enplimante ti annan bann *remedial work* ki ti'n ganny fer lo enn de landrwa, enn de lo Grand Anse avek Baie Ste Anne akoz sirtou pandan letan vann swet. Akoz nou annan en proze mazer en gran proze kapital ki pe vini kot i konsern *coastal management*. E annefe lo sa *coastal management* mon rapel Mr Speaker, bann *time* ki Minis Cosgrow ti Minis pou lanvironnman dan 6enm Lasanble mon'n al avek li lo sa bann sit.

Nou'n diskit sa bann size, nou'n vizit plizyer landrwa, plizyer lakot kot nou'n vwar bann landrwa nou bezwen enplimant bann proze. E zisteman dan sa Bidze sa lannen i annan R 29.3 milyon

pou *coastal management project* Ros Korbizo, Amitié. E mon kontan poudir ki sa proze in fini ganny *awarded* kontra in fini ganny *awarded* avek lakonpannyen UCPS. Nou pa'n kapab fer li pandan letan vann swet.

Me sa ki mon'n ganny dir se ki proze pou al komanse lafen Oktob ouswa komansman Novanm. I pou en gran proze, en gro proze ki pou kout en kantite larzan. E mon asire ki i pou rezourd sa problem kot lanmer pe mont pe kas semen, kas semen Ros Korbizo, Amitié.

E sa i en proze ki bokou zabitan Praslin pou vreman, vreman apresye. Mr Speaker, kot i konsern sa *Micro-enterprise Center* zisteman i annan en alokasyon R3.685 milyon pou en proze *15-unit* Mr Speaker, sa i baze kot *ex STC* Grand Anse Mr Speaker ki i pou benefisy bann *SMEs*.

Sa proze osi konversasyon ki mon ti annan avek Minis Devika se ki sa proze i lo staz, lo staz *planning* kot *15-unit* pou ganny fer pou bann parey mon'n dir bann *light industrial*, bann pti *SMEs* i kapab benefisy avek lespas Mr Speaker ki pa mal lannen pe demande Mr Speaker.

Judo dojo, sa i en keksoz ki mon'n perdi kont kantite fwa mon'n koz lo la 6enm Lasanble la. E lot Onorab osi

in koz lo la, kot Grand Anse nou annan nou environ en 50 atlet *judo*, Baie Ste Anne environ en 60enm. Nou napa fasilite, Baie Ste Anne i kot Vye Carnegie, Grand Anse Praslin nou kot vye *library*.

E mon kontan ki nou'n idantife en sit ki diskisyon. Me proze, sa proze in ganny mete dan Bidze pou 2026. Parey mon'n dir mon ti a vreman kontan sa proze i vin pli boner. Me mon pou kontinyen pouse, akoz mon konnen poudir zabitant Praslin sirtou bann *judoka* Praslin ki'n nou'n prodwir en kantite zot pe vreman *look forward* pou en tel fasilite lo Praslin.

E mon pou kontinyen apiye demann sa ladministrasyon ki la pou get ladan, si nou kapab fer li en pti pe pli boner nou pa prese. Me selman nou konpran kontrent bidzeter. Me nou la touzour pou nou met nou lavwa, fer nou lavwa tande pou nou kontinyen demande sa ki byen e sa ki neseser pou nou zil.

Proze lakaz *land bank* Praslin, pti lavil dan Distrik Baie Ste Anne, Marie Jeanne pou proze lakaz tousala i bann proze ki'n ganny bidzete. Mont Plaisir ti annan sa proze ti annan R17 milyon ki ti'n ganny aprouve. Annefe mon ti demann en kestyon dan sa Lasanble, e mon rapel sa letan ler mon ti demann sa kestyon

Onorab Sebastien Pillay ti dir koumsa ki sa proze i en proze politik, nou pe fer politik.

Mr Speaker, si vreman nou ti pe fer politik sa ladministrasyon nou ti pe fer politik, nou ti a zis dir *go ahead* kontinyen fer sa proze pou R17 milyon. Menm si avek sa 17 milyon nou ti kapab ganny nou *8 unit* an plis ki nou ti pou gannyen Mont Plaisir. Me apre ki *site* in ganny *clear*, bann teknisyen in vwar ki sa teren i vreman, vreman difisil alor ti annan en delegasyon ki ti monte pou zot al reget sa teren. E apre diskisyon ki'n ganny diskite, e zisteman akoz ti annan en proze *STP* ki ti pe al ganny fer kot *ex-Teachers Estate* Praslin.

E apre diskisyon avek Minister Lagrikiltir nou'n ganny *allocate* avek en morso later pou *STP*. E i en gran bout later ki annan lespas pou nou kapab fer plizyer *unit, at least* ankor en *16 unit*. Alor desizyon ti ganny fer pou nou dan plas fer *8 unit* Mont Plaisir, nou kapab servi sa larzan pou nou fer *16 unit*. Pou nou fer *16 unit* o bor *ex-Teachers Estate* kot sa novo *STP* pe al ganny fer Mr Speaker.

E ki preznan lo kote Mont Plaisir nou pe get posibilite, nou diskite ki dan plas fer sa *8 unit*, nou a fer *4 unit*. Akoz dapre lalis bann dimoun ki pe kontribye dan *Home Saving*

Scheme i annan zis 2 dimoun Mont Plaisir ki azour avek zot peyman Home Savings Schemes. E sa STP Mr Speaker ki mon'n koz lo la, ki pe al ganny fer *ex-Teachers Estate* Mr Speaker, i en konsern reel akoz pi perdi lafason ki in ganny fer ti napa lespas.

Pi perdi in ganny fer devan larantre lakour bann dimoun devan zot lavarang ou bezwen park lo STP. E sak fwa gro lapli ouswa mare o STP i refoule, ou bezwen ponp sa STP tou lazournen i pe kout Gouvernman plizyer milyon Mr Speaker par lannen. E sa STP pe al ganny fer, in fer *order* Mr Speaker. I pou antre dan pei byento, e ansanm avek sa novo proze lakaz ki nou pou fer Mr Speaker, mon asire ki i pou benefisyé bann zabitan ki baze lo dan sa *housing estate ex teacher's estate*.

E larzan Mr Speaker, anefe i la pou sa proze STP. STP demars in ganny fer pou rod en STP Mr Speaker. So, i annan bann lezot facilite ankor ki mon'n ganny demande an konversasyon avek *headteacher*, bann *teacher* lakres lo kote kot Lakres Grand Anse Praslin i baze, kot primer i annan diskisyon ki i deza pe deroule lo en lot lespas pou nou fer en lakres separe avek kot Primer Grand Anse Praslin i ete.

Lezot proze ki'n ganny enplimante resaman ki ti vreman neseser Mr Speaker, renovasyon lo Sant Kominoter Grand Anse Praslin *complete renovation* in ganny fer. In fact, sa semenn la, nou pe fer demars pou nou retourn dan Sant Kominoter Grand Anse Praslin. E Baie Ste Anne osi en gro travay renovasyon in ganny fer lo Ladministrasyon Baie Ste Anne.

Savedir la Mr Speaker, dan sa dernyen detrwa lannen dernyen 2 an i annan 2 Ladministrasyon Distrik ki renovasyon konplet in ganny fer lo la ek Grand Anse avek Baie Ste Anne. Nou annan novo Biro SNYC ki mon'n pouse, mon'n par deryer pou ki i ganny renoukle. Ti annan en vye *building* par deryer kot Sant Kominoter Grand Anse Praslin ti annan en pe travay ki ti merit ganny fer lo la.

E lokasyon kot sa biro SNYC ti ete Baie Ste Anne pa ti ideal akoz i ti lwen avek bann zanfan avek bann zelev. Alor, mon ti fer en demars ansanm avek SNYC ki sa biro i bouz la deryer kot par deryer Ladministrasyon Distrik Grand Anse Praslin ki pre avek lekol Grand Anse Praslin Primer e pa lwen avek Grand Anse Praslin Segonder.

E ozordi nou annan en novo biro SNYC ki pe fonksyonnen avek 6 group

lentere. E i gou e i en mervey pou get pandan vakans e sirtou apre lekol ki kantite zanfan ki al laba pou partisip dan bann diferan programm ki SNYC pe ofer.

Mr Speaker, La Digue osi i bezwen en bon lokasyon, annefe visit MYSCC ti al fer La Digue Mr Speaker, nou ti diskite e nou ti met devan nou koman en komite nou ti anvoy kot Minis responsab pou lazernes Mr Speaker kot nou ti diskit nesesite pou tir ki sa Biro SNYC kot i ete fodre *relocate* li dan en plas en pti pe pli ideal.

Akoz kot i ete dan sa *attic* avan pa en landrwa ideal. E dan Bidze aktyel la i annan en alokasyon 6 milyon, 6 milyon pou sa *Youth Service Bureau* La Digue. E sa i en keksoz ki mwan mon santi poudir i bezwen ganny fer, i enportan pou ganny fer ki pou dan lentere bann zenn dan lo La Digue Mr Speaker.

So, laplenn foutbol La Digue, twatir in ganny sanze. I annan travay ankor ki bezwen ganny fer dan lo sa laplenn. Nou ti fer en vizit ansanm Onorab Uranie ti akonpanny nou pou nou al get sa laplenn. E mon bezwen admet poudir i annan travay ki bezwen ganny fer lo sa laplenn. E sa i en lanfaz ki nou bezwen kontinyen mete siport

kanmarad pou met sa bann facilite an plas lo La Digue.

Parey mon dir focus la i lo CJSOI, me *as soon as* sa i fini, anmezir lekonomi i aranze, anmezir ki larzan i antre tou kou annou met en pti larzan akote pou nou kapab amelyor sa bann facilite ki nou annan La Digue. E La Digue osi parey mon'n dir i prodwir bokou atlet ekselan, zot bezwen en *track* sentetik.

E *going forward* mon krwar i pou enportan osi pou La Digue osi ganny en *indoor gymnasium* ki pou ed zot, akoz zot annan bokou bann klib ki fer vreman byen lo foutbol e lezot *sport* osi Mr Speaker nou annan bokou bann atlet ki'n fer telman byen sirtou lo kote atletik.

So, Mr Speaker, prenon kont kou bidzeter reveni ki pei i kolekte, nou konnen poudir i pa en larzan ki *unlimited*. I annan en Bidze tou le lannen ki vini. E i bezwen ganny partaze parmi tou bann sekter, tou bann lendistri, tou bann MDAs.

Me selman parey mon'n dir i toultan enportan ki Gouvernman i mazin sa 2 zil e mon bezwen dir mersi Gouvernman osi pou deza en kantite proze in ganny enplimante. Me selman annou kontinyen mazin pa zis demen, pa zis kour term, *mid-term*, lonterm ou bezwen

annan en plan stratezik pou bann lannen ki pou vini pou prosen 5 an, 10 an, 15 an, 20 an pou devlopman nou zil Praslin avek La Digue.

Annou pa mazin ozordi pou demen, annou kontinyen koz ek nou zabitan. Sa ki zot pe demande i enportan Mr Speaker, kot ansanm bann Onorab, Onorab Gill mwan menm Onorab Porice, Onorab Uranie nou kontinyen vin ansanm, nou kontinyen koze pou byennet bann zabitan nou 2 zil.

En keksoz enportan osi ki nou bann *MNA* lo zil in koze se desantralizasyon bann servis. Ozordi parey mon'n dir depi 6enm Lasamble, en keksoz ki mwan avek bann lezot Onorab Zil Pros in demande. E ozordi tou bann Onorab Zil Pros nou ankor pe demann sa bann keksoz desantralizasyon bann servis.

Ozordi *Registrar Land and Business* in ganny en lofis Praslin, nou annan en Biro *Survey* Praslin. Travay in komanse pou tir later lo vye *land system* pou *move* li pou met li lo sa novo *land system*. E travay in komanse Baie Ste Anne, byento i pou desann lo Grand Anse en proze ki i pou kout en pe larzan. Me i en proze ki neseser Mr Speaker, pou fasilit bann zabitan lo zil.

Lezot servis in ganny desantralize, *Civil Status*

ozordi *driving license* i ganny *print* lo Praslin. E Mr Speaker, i annan ankor bann lezot servis ki ankor pe ganny ofer lo Mahe ki mon santi sa bann servis osi Mr Speaker, i enportan pou ganny desantralize pou vin lo Praslin, ki pou koup nesesite pou nou bann zabitan ki bezwen sorti Mahe pou depanse *sorry* pou sorti Praslin ki depanse pou al Mahe.

Mr Speaker, devlopman Fon Ferdinand osi i en keksoz ki mon'n koz lo la. Onorab Gill fek demann en kestyon lo la pou annan plis valer azoute pou Fon Ferdinand kot nou annan bann facilite an plas pou fer sa landrwa Mr Speaker an dire plis larzan, ki pou osi benefisyé bann pti biznes kominate Grand Anse avek Baie Ste Anne osi. Nou bann *bin site*, nouveau *bin site* ki'n ganny fer partou lo Baie Ste Anne e Grand Anse.

Raised crossing in ganny met an plas, e mon byen konplent dan bomaten kot i annan serten landrwa kot i annan bann *racing* en pe *disturbance* aswar ki disturb bann lotel, bann touris aswar.

Mon *happy* ki i annan en tel proze parey pe ganny fer lo Mahe. Me Praslin mon santi ki i annan serten landrwa ki annan bann *speeding* ki pe ganny fer ki vreman en pe danzere Mr Speaker. E i

enportan pou nou get sa vreman byen akoz mon vreman sagren Mr Speaker, dan sa bann dernyen detrwa lannen bokou zenn in mor dan aksidan *scooter* e aksidan transpor akoz sa bann fer bokou vites.

E sa i en keksoz ki nou bezwen met en bon pe lanfaz lo la. En diskisyon ki nou bezwen annan koman en kominote pou rod en fason pou nou dil avek sa sityasyon.

Mr Speaker, *management* bann lanmar *armorizing* in ganny fer dan plizyer landrwa. *Coco Rouge desilting*, Nouvelle Dekouvert *desilting* avek *armorizing*, Lablache Estate, Tamatave estate fek fer zoli travay *desilting*, Moulinier Baie Ste Anne en gro travay *desilting* e *armorizing* in ganny fer Mr Speaker.

So, ou vvar poudir sa ladministrasyon ki la in fer en kantite pandan sa dernyen 4 an. Parey mon dir Mr Speaker, i annan bokou ki'n ganny fer anba ladministrasyon avan. E nou, nou pe kontinyen sa travay Mr Speaker. E ladministrasyon ki pou vini 20 an, 30 an *from now* Mr Speaker. I pou bezwen osi kontribye kontinyen sa travay ki'n komanse pa tou bann ladministrasyon ki'n la depi oparavan.

Akoz nou bezwen get sa bann keksoz, nou bezwen get Praslin/ La Digue dan en lot loptik. Akoz parey mon'n dir i annan plizyer bann servis, bann facilite ki nou bezwen ki napa lo Praslin ki parey mon'n dir i enportan desantraliz sa bann facilite, e sa bann servis.

Mr Speaker, proze renovasyon bann blok *flat PMC* lo Praslin i annan 2 gran proze in ganny antreprann enn Moulinier ki'n konplete, in ganny *completely renovated*.

E osi Tamatave Estate 1, gro travay in ganny fer. E mwan ki ti inisyé sa atraver *meeting* ki ti organize avek tou bann zabitan sa *estate*, kot nou ti zwenn nou ti diskite e mon ti pouse. E mon'n apresye sipor ki nou'n gannyen avek Steve Mussard avek ansyen *CEO* kot zot in aprouv sa proze. En gro travay in ganny fer lo tou sa bann blok - tou sa bann blok Tamatave Estate 1 in ganny *completely renovated*.

E byento si pa lafen sa lannen *by first quarter next year* Mr Speaker, travay pou komanse lo *ex-Teachers Estate* Mr Speaker apre vizit ki mon ti fer laba avek Minis pou *MLH*, Minis Billy Rangasamy osi avek bann zofisyé *SIA* e osi zofisyé *PMC*. So, finalman Mr Speaker, byento i annan plizyer lezot travay ankor ki pou ganny antreprann.

Kekfwa i annan ki mon pa ankor mansyonnen. Kekfwa dan mon konklizyon taler ler mon ganny mon *right of reply* si mon'n mank okenn keksoz, mon ava kontinyen koz lo la.

Me selman mon pou bezwen Mr Speaker, remersye tou bann zofisyen tou Lotorite Distrik pou sa sipor ki zot in donn nou bann MNAs lo Praslin/La Digue. Mon pou remersi bann DAs Betty Cedras lo kote Baie Ste Anne, Barbara La Digue, Chantal Laure Grand Anse. Bann *liaison officer*, Loncey Micock La Digue, Vincent Cedras Grand Anse e tou bann zofisyen bann *heads of* bann diferan departman lo Praslin e La Digue ki'n ede pou nou kapab enplimant sa bann proze ki pe benefisyen zabitan nou zil.

Parey mon'n dir i annan en kantite ankor pou fer me selman nou bezwen vin ansanm pou nou kontinyen koz ansanm pou nou war plis amelyorasyon lo nou 2 Zil Praslin avek La Digue. Avek sa 2 mo *i beg to move* Mr Speaker. Mersi.

MR DEPUTY SPEAKER

Mersi Onorab Woodcock pou ou lentervansyon pou entrodwir ou Mosyon. Onorab Porice, ou ki ti segonde. Ou pou koz la? Silvouple *proceed*.

HON DOYACE PORICE

Mersi Mr Speaker. Mr Speaker, mon pou anmenn mon sipor pou sa Mosyon ki Onorab Woodcock in anmennen. Akoz mon santi ki i annan en bezwen total lo nou zil. E mon anvi war i annan plis aktivite sportif, enkli bann facilite ki vreman annan en mank lo nou zil pou en ta letan tel ki *indoor gym, judo, dojo, microentreprise center, en track sentetik* ki pou anmenn plis devlopman lo Praslin avek La Digue.

Mr Speaker, mwan koman en zabitan Praslin e mon en aktivis spor. Mon frekant *sportsmen* tre byen, espesyalman bann ki mon vreman admire oubyen siporte. Alor, mon ti a kontan war plis facilite oubyen lenfrastriktir sports lo nou zil, kot nou a kapab tir nou bann lezot zenn ki dan lenfliyans negativ pou zwenn sport.

Parey nou konnen ki menm si in annan detrwa ki'n preski tonm anrim pou en pe letan, e *sportsmen* pa pe kontan ditou. Mr Speaker, pou fer mazinen zabitan lo zil ki ler sa novo ladministrasyon ti pran pei an 2020 nou ti vin zwenn sa kalite lenfrastriktir spor parey lo nou zil Praslin.

Kot ansyen ladministrasyon pa'n zanmen enterese pou aranze. Pou mwan, dan plas zot ti pe donn dibwa, tol, larzan *left and right*

avan eleksyon, zot ti kapab pran sa larzan pou aranz sa bann lenfrastriktir spor pou sa bann pov malere *sportsmen* lo zil. Parey osi nou konnen, ki i annan bokou zenn zonm ek fanm ki dan spor lo zil ki vreman aktiv.

E zot menm anmenn plizyer meday, menm lakoup lo nou zil e zot pa'n les tonbe zot *sport*, menm si zot lenfrastriktir pa ti bon. Sa bann *sportsmen* in menm fer pli byen ki en pe *sportsmen* lo Mahe e lezot zil; tel ki *Judo*, *Karate*, *Foutbol*, *Volleyball* lo nivo lekol, atletik, *swimming*, *windsurfing* e plizyer ankor.

E la tou resaman, mon pou profite pou mwan felisit tim *volleyball* fiy ek garson Lekol Segonder Praslin pou sa laviktwar 3 fwa konsekitiv. E mon pou felisit sir Sonny ki'n toultan determinen avek son tim lekol. Avek sa zefor ki sa bann atlet in mete, alor nou merit ganny bann lenfrastriktir spor an bonneta, lenfrastriktir nef, ki pli enteresan pou kontiny sa bon legzersis e *practice*.

Gouvernman pe anmenn en konpanny kont konsern obesite dan pei Praslin e Zil Pros pa pe ganny eparnye. E nou bezwen agree ki nou osi nou annan bokou obesite ki zanfan, ki osi adilt. Mr Speaker, nou osi nou bezwen rod en fason pou ed sa bann

zabitan ki obes e ed zot ganny fasilité ki pou ed zot osi.

Alor, nou Gouvernman siporte par lakonpannyen prive, pou bezwen kontinyen met an plas bann fasilité ki manke. E ki en bann lannen *sportsmen* ti ganny promet par Gouvernman lepase zis parey Mosyon pe demande pou annan plis devlopman lo nou zil.

Wi, Mr Speaker, i annan bokou pandan sa 4 an ki nou Gouvernman in fer lo nou zil. Zabitan nou zil i vreman apresye e in vin byen zoli.

E zabitan nou zil i di ren gro mersi nou Prezidan avek son *Cabinet of Ministers* pou pran nou zil a ker. E mon asire ki sa Gouvernman pou fer plis ankor, pou nou zabitan lo zil.

Alor, annou anmenn nou kontribisyen lo devlopman nou zil, sirtou kot i konsern lenfrastriktir spor pou tou kalite *sport* ki i annan lo zil. Praslin ek Zil Pros nou annan apepre plis ki en dizenn tim foutbol, 4 klib *judo*, 2 klib karate, 5 tim *volleyball* enkli tim lekol, e en tim *basketball*, klib *windsurfing*, *carting* ek atletik.

Mr Speaker, tou sa bann spor lo nou zil i bezwen bann nouvo lenfrastriktir. Me nou konnen ki tou keksoz pa kapab fer en sel kou. Me nou zabitan i annan pasyans, akoz zot in deza espere pou plis ki

20 an avan 2020. Keksoz pa'n fasil pou sa Gouvernman aktyel, apre ki in resevwar plizyer lenfrastriktir lo Mahe ki'n tonm anrim. E sa bann lenfrastriktir ti lo latab enternasyonal.

E Gouvernman in bezwen met lanmen lo la pou nou atlet kapab kontinyen annan bann zwe enternasyonal dan nou pei Sesel. La kot nou osi lo zil, nou ti a kontan nou osi ganny sa bann lenfrastriktir parey ki nou osi nou a vwar konpetisyon enternasyonal lo nou zil. Wi, Mr Speaker, ti pou annan sa tel lenfrastriktir parey *court* Marie-Jeanne Estate ki ti ganny *sponsor* pou fer li anfrenmen parey *Palais des Sports*.

Me Gouvernman ki ti pouvwar avan 2020, in plito met sa larzan dan en lot bor zis parey sa *fitness trail* ki ti zis lo papye. Se sa ozordi ki Praslin ek Zil Pros napa en bon lenfrastriktir spor, menm parey sa stad Amitié ki'n ganny mal fer. E ler lapli zot pa kapab zwe foutbol, akoz i ranpli ek delo.

Me nou met de kote sa ki'n arive lepase. E mon asire ki nou Gouvernman aktyel pou fer zot mye pou donn nou bann fanm ek zonm dan *sport*, lenfrastriktir ki zot bezwen. Sirtou enn ki pou an bon leta e pou dire pou bokou lannen.

Alor, mon vreman apresye ki mon koleg Onorab Woodcock in anmenn sa Mosyon pou dir Gouvernman pou kontinyen sa travay met plis fasilite pou nou bann *sportsmen*.

Mr Speaker, en keksoz ki mwan ek Onorab Woodcock pe fer nou mye, pou tap laport *sponsors*, pou ede ganny nouvo lenfrastriktir sport pou nou *sportsmen* lo nou zil. Sa ki ankourazan se ki i annan *businessmen* ki oule menm enkli *sportsmen* dan devlopman. E byento i annan ki pou ganny apele pou ede.

Alor, nou bann fanm ek zonm dan *sport*, met nou apre pou donn en koudmen par mentenir e kit nou lenfrastriktir prop e annord ki ava anmenn nou pou en bon pe letan.

E nou a osi annan aktivite *fund raising* pou ede aranz bann ki kase an menm tan, pou ki pli tar nou pa bezwen Gouvernman pou asiste nou avek nouvo lenfrastriktir. Mon pou sipliy avek nou bann zenn ki pa dan spor, pou zot osi koste ek bann *sportsmen* pou nou kontinyen viv dan larmoni, viv dan lape ansanm pou nou kontinyen annan spor vivan sanpyon. Avek sa 2 mo mon pou siport sa Mosyon. Mersi.

MR DEPUTY SPEAKER

Mersi Onorab Porice. Lot Manm ki'n endike i oule entervenir lo sa Mosyon se Onorab Norbert Loizeau.

HON NORBERT LOIZEAU

Mersi Mr Speaker. Bonzour tou dimoun. Mr Speaker, ozordi i en plezir e mersi pou donn mwan sa sans pou entervenir lo en Mosyon sitan enportan, e ki mon pou i donn mon sipor. Akoz mon pou donn mon sipor Mr Speaker?

Akoz mon mazin ler mon ti fek komans politik - antre dan politik dan lannen 2007 mon ti dan Lasanble. Mon ti en dimoun ki ti koz for lo kote *sports*, lo kote lenfrastruktir pou bann dimoun lo Zil Pros malgre zot ti annan *MNA* laba, me sa bann *MNA* pa ti lo nou kote Mr Speaker.

Mr Speaker, mon ti kontinyen koz lo la akoz mon ti santi ki Praslin pa merit ganny rezete. E Mr Speaker, mwan a mon avi pandan tou sa bann letan ki mon'n antre dan politik, koman en zenn *homme* ki ti ankor pe pratik sport sa letan e mon spesyalite ti *basketball*, Mr Speaker, mon santi ki pandan bokou lannen Zil Pros in ganny neglize.

Tou bann lenfrastruktir Mr Speaker, lo Zil Pros nou vwar nou pa'n dir napa lenfrastruktir me selman i pa'n alaoter. E mon krwar ki Mosyon ozordi anmennen par

Onorab Woodcock, i annan bokou merit. Akoz Mr Speaker? Akoz ozordi modernizasyon i pran son plas partou dan Mahe. Alors, mwan a mon avi mon panse ki zabitan Zil Pros pa merit ganny kit deryer pou tou sa letan ki zot pe espere pou zot kapab ganny en bann keksoz modern.

Mr Speaker, mon pa pou koz lo bann lenfrastruktir lo kote *microenterprises* Mr Speaker, akoz Onorab Woodcock in fer bokou mansyon lo la. E mwan koman *Vice Chair* Komite COGA, nou'n fer bokou vizit lo Ile Eve kot nou'n war ansanm avek mon *Chairman* Onorab Lemiel Mr Speaker. Nou'n fer bokou vizit e nou'n war i annan bokou keksoz ki'n ganny fer. I annan bokou ki *on going*, i annan bokou keksoz ki nou Gouvernman pou fer.

Me selman malerezman, semenn pase mon'n tann mon *Chair* koz mal lo nou Komite ki li i *Chair*. Kot in trouve ki i annan serten keksoz pa pe marse. Mr Speaker, me pourtan li ki *Chair*. Si ou dir en Komite en keksoz pa marse problem i ou, ou ki *Chair*. Alors si i annan problem lo nou Komite e sa in ariv dan Lasanble, alors, mon panse ki i pa fit pou fer sa travay Mr Speaker. Permet mwan dir sa Mr Speaker.

(comments off-mic)

HON NORBERT LOIZEAU

Mr Speaker, e menm ler nou pe koz zil Mr Speaker nou'n fer vizit zil. E si keksoz ti pou marse Mr Speaker.

(comments off-mic)

HON NORBERT LOIZEAU

E si Mr Speaker, dernyen fwa ler Onorab Lemiel ti pe koze, sa i konsern nou Komite COGA i ti mansyonn mon non. E ti annan menm komunikasyon ki mon ti fer dan nou group COGA ki ti al an piblik. Mr Speaker, eski i *ok* sa?

Ozordi ler mwan mon pou koze konmsi mon an defo Onorab Aglae? Ou tenir ek ou Komite.

(Interruptions)

MR DEPUTY SPEAKER

Silvouple, silvouple...

HON NORBERT LOIZEAU

Mr Speaker...

MR DEPUTY SPEAKER

Hold on, hold on, hold on Onorab. *Move away from* sa pwen la, akoz sa mon krwar i en pwen ki zot merit adres dan zot Komite.

HON NORBERT LOIZEAU

Mr Speaker, mersi bokou.

MR DEPUTY SPEAKER

Please proceed.

HON NORBERT LOIZEAU

Le pwen in ganny fer. E nou koman en Komite mon bann Manm Mr Speaker, avan mon fini - nou partisip dan tou vizit ki fer. Ler nou annan vizit nou pa al fer konpanny pou nou soz menm si nou ganny peye avek COGA. Nou partisip dan bann vizit.

E la Mr Speaker, permet mwan pou retourn lo mon pwen konsernan sa Mosyon ankor. Mr Speaker, mon pa pou koz lo *microenterprise center or whatever* bann zafer regarding sa, akoz parey mon'n dir i annan bokou in ganny fer. E mon panse i annan Manm ki pou adres sa. Me mwan koman en dimoun ki annan *sport a ker* mon santi ki Zil Pros i bezwen annan bann lenfrastriktir alaoter e o nivo, pou ki nou bann zenn laba Mr Speaker, i ava ganny sans pou zot fer zot spor dan konfor Mr Speaker.

E la i fer mwan mazin Mr Speaker, ler mon ti pe antrennen e zwe koman en zwer *basketball* Mr Speaker. E ler nou ti al zwe Praslin sa letan, bann *matching* ti zwe Praslin Mr Speaker, parfwa mon ti santi douler ki bann Praslinois sirtou ki ti annan en lekip dan *basketball Praslin Warriors* Mr Speaker.

Mr Speaker, be ler nou ti al zwe nou ti zwe lo en *court koltar*. Mon pa dir kourt koltar pa bon. Lontan mwan tou mon lavi mon'n zwe lo la. Me selman nou sa bann letan nou ti annan *Palais des Sports*. Me zot sa lekip Praslin zot ti bezwen sibir dan sa gro ker soley. E nou, nou'n santi sa douler, mon'n santi sa douler Mr Speaker kot parfwa ou vini pe vin zwe en *league match* kot ou war en kote *ring* i anpandan. Selman nou bezwen zwe lo la. Ki rezulta ou pou donnen?

Ou bezwen tay parmi fey friyapen, fey bodanmyen, ki pa ti pou en sport parey konmsi ki pa ti normal. Me pou sa rezon ki mon pe siport sa Mosyon. Mr Speaker, ler nou koz *sport* lo Zil Pros lenfrastriktir nou kapab vwar Mr Speaker pou nou menm, ler i annan en levennman sportif lo nivo nasyonal, kantite atlet ki sorti lo Zil Pros Mr Speaker, ki fer sitan byen.

Mr Speaker, sitan pli byen ki nou atlet ki sorti Mahe. Mr Speaker, si pandan sa bann letan ki'n passe ti annan bann lenfrastriktir o nivo, kot bann atlet lo Zil Pros, sa ti pou fer ki bann atlet lo Zil Pros Mr Speaker, fer bokou pli byen ki zot a pe fer ozordi. Mon asire ki tou dimoun dan sa lasal pou dakor avek mwan Mr Speaker.

I annan talan lo zil. Mr Speaker, talan lo Zil Pros i annabondans. E la mon mazin *school athletics* Mr Speaker. Ki kantite zenn sorti Zil Pros Mr Speaker ki'n fer tre byen, tre byen *school athletics* i enn. Me kot zot *train* Mr Speaker? Zot *train* lo zerb. Zot *train* lo zerb zot anmenn sa rezulta pli o ki nou Sesel ki lo *tartan track* Mr Speaker.

Savedir Mr Speaker, avek sa lenfrastriktir sportif de O Nivo, i a kapab servi par nou bann ankadrer pou nou anmas sa bann atlet. Ankadre zot Mr Speaker, pou zot kapab fer bann perse enternasyonal partou lerop. E menm larezyon Mr Speaker, si zot, zot pe antrenn lo sa kalite lenfrastriktir parey Mr Speaker. Si nou donn zot sa ki pli meyer, nou pou fer bokou pli byen.

Mr Speaker, bann tel fasilité ki nou pe koz lo la ozordi i a kapab ganny servi pou fer bann levennman kominoter Mr Speaker. Kot ozordi i a kapab anmenn limite parmi nou bann zenn. E nou dan *LDS*, nou krwar dan bann keksoz pozitiv ki anmenn limite parmi nou zenn.

Mr Speaker, akoz mon pe dir sa? Akoz ozordi lazene Seselwa ozordi in eparpiye partou. Drog ek lalkol e lezot bann mers negativ pe *involved* bokou nou bann zenn lo Zil

Pros. Mr Speaker, parey ler nou pe koze la i annan bokou ki'n ganny fer par l'administrasyon avan. Me osi in annan bokou promes ki'n ganny fer oparavan, ki pa'n ganny onore.

E la Mr Speaker, nouveau Gouvernman nou war li neseser pou nou fer sa bann devlopman. Fer sa bann devlopman akoz nou pa zis koz lo lazernes, nou krwar ki nou Lazernes lo Zil Pros i merit ganny trete parey ek Mahe. Lazernes lo Zil Pros, bann *sportsmen* i met pli meyer. E parey nou Prezidan i kontan dir i krwar dan lazernes.

E pou li se lesyel ki zot limit Mr Speaker. Alors se pou sa rezon ki ou trouve nou Gouvernman pou kontinyen travay dir, pou ki lazernes i pran son plas dan nou pei. Ozordi Mr speaker, bann klib lo Praslin i bezwen desann Mahe pou zot zwe zot bann *match league basketball* Mr Speaker. Akoz nou pa ti kapab fer li laba Praslin dan en landrwa konvenab, olye ki zot, zot bezwen depanse Mr Speaker depanse, depanse lo transpor, depanse lo landrwa reste kan nou ti a kapab fer li laba?

Pourtan Mr Speaker, parey mon'n dir mon'n koz lo promes bokou promes in ganny fer. Mon rapel dan 4enm Lasanble Mr Speaker -

dan 4enm Lasanble ti annan en Mosyon kot bann zenn ti ganny promet, promet en *dojo or* en *indoor gym*. E mwan Mr Speaker, mon rapel koman en zenn Onorab sa letan mon ti antre mon ti dir non akoz zis en *dojo* ?

Akoz ki nou olye en *dojo*, annou pa fer en keksoz pa tro gran. Me selman ki pou kapab soutenir mazorite *sport* bann *indoor sport*. Mwan mon ti propoz en *indoor gym* e sa letan Onorab Baie Ste Anne Praslin ti vin ek Mosyon pa ti kontan. Akoz ti annan detrwa marmay ki fer *judo*, alors i ti pe mazin zis *judo* e mwan mon ti pe mazin an zeneral tou *sport* kot en *indoor gym* nou ti kapab fer *volleyball*, *basketball* e menm en konpetisyon *dojo*.

E nou ti menm propoze ki akote li nou ti kapab fer bann dortwar. I ti pe rod bann dortwar, nou ti kapab fer li e menm en pti *dojo training* akote sa pou kapab pou bann zenn bann *sportsmen* lo Praslin kapab fer sa *sport* dan konfor. Mr Speaker, ozordi apre ki sa Mosyon ti pase an 2004, an 2008 a 2009 in pas plis ki 16 an Mr Speaker. Mon panse i bezwen aepre 16 an, nou pa'n war ni en blok mete pou *dojo*, ni pou sa *gym*.

E mon kontan Onorab Woodcock ozordi in fer resorti ki dan plan Gouvernman tousala i ater an diskisyon pou

fer. E dapre ki mon'n tande si mon'n tann byen ler mon pe vini sorti *attend* en lanterman Mr Speaker, mon'n tann li ki dir e i annan later ki *available*.

Mr Speaker, mwan mon pe koz koumsa akoz mon annan *sport* a ker. Mon anvi war ki bann zenn, bann atlet lo Zil Pros ganny trete byen. Zot osi zot bezwen fer keksoz dan konfor parey nou lo Mahe Mr Speaker. Parey nou lo Mahe e lo La Digue la, La Digue zot tay lo zerb. E sa kantite atlet, sa kalite performans ki bann Digwa i anmennen zour i annan en levennman i enkrwayab.

Zis mazinen ki en *track* sentetik lo La Digue. Zis mazin en *preach astroturf* ki mon krwar i annan en travay pou ganny fer pou anmenn enn laba si mon byen. Ki nivo nou bann atlet Zil Pros sirtou La Digue ki kontan foutbol, ki kontan atletik, ki kontan *volleyball* Mr Speaker, ti pou anmennen pou nou pei e dan *sport* Sesel an zeneral.

Mr Speaker, an terminan mon anvi dir ki mon apresye ki mon Gouvernman pe fer. E parey mon Prezidan i kontan dir, i kontan dir o firamezir, mon konnen pa tou dimoun ki kontan ler mon dir sa mo o firamezir. Me selman mon Prezidan i kontan dir sa, e mwan mon pou repet li ankor o firamezir.

O firamezir ki lekonomi i re fer i fer byen, nou Gouvernman pou fer sir ki Zil Pros ki enkli Praslin/La Digue e bann lot zil ki enkli dan Zil Pros pou ganny bann zenn ek bann atlet. Nou pou fer sir ki zot ganny le meyer. Mr Speaker, mersi. Eskiz mwan si oparavan mon'n ofans serten dimoun. Mon demann en leskiz pou sa. Mersi Mr Speaker.

(APPLAUSE)

MR DEPUTY SPEAKER

Mersi Onorab. Onorab ou pe endike oule... ok. Dir mwan anba ki *Order* ou annan en *point of order*?

HON EGBERT AGLAE

Order 49 i permet mwan pou raise en *point of order*. E mon le sit ou anba *Order 59 Content of speeches 59(5)* kot konportman en Manm i pa kapab vin en size dan okenn diskisyon. Sa i enkli depi Prezidan, Minis, *LGB*, *Leader Lopozisyon*.

So, mon krwar Mr Speaker, anvi ki ou ki gardyen *Standing Orders*, ou ti devret aret Onorab dir li poudir be ou pa kapab koz lo konportman en Manm e demann li pou *resign* dan son Mosyon ki in prezante. E *this is wrong* i ti devret *retract*.

MR DEPUTY SPEAKER

Mersi. Letan mon'n ekout li mon pa'n swiv li dan konteks (mon pe adres en pwen. Zot ava ekout mwan silvouple, olye koz avek kanmarad atraver latab) I pa ti son konportman, mon panse sa ki i ti pe dir i ti pe refer avek en *statement* ki Onorab in fer *on the floor*. E li koman en Manm sa Komite. So, i ti pe donn en lot pwennvi.

E anfet mon pa anvi antre dan zot *internal politics of* zot Komite, pou nenport Komite ki si en dimoun i fer en rapor. E sa in deza arive akoz dan *Bills Committee* mon war kot ti annan en *minority report*. So, si en kote pa dakor, *look* pa bezwen manz anndan met li lo papye Lasanble e piblik Seselwa konnen poudir i annan en kote pa dakor avek sa Komanter, rapor *whatever ki'n ganny fer*.

So, koumsa mon'n lir li mwan Onorab. I ti pe pas zizman lo en *statement* ki'n ganny fer *on the floor*, me non pa karakter sa Manm parey nou *Standing Orders* i fer provizyon. Donk, nou pou *move* lo sa pwen. Lot entervenan ki'n endike ki i oule koze, se Onorab Michel Roucou.

HON MICHEL ROUCOU

Mersi Mr Speaker. Bonn apre midi tou dimoun. Bonn apre

midi tou Manm piblik ki pe ekout nou. Mr Speaker, annefe mon pa en zabitan Praslin, me selman mon pare pou donn mon sipor sa Mosyon anmennen par enn mon koleg Onorab Wavel Woodcock, ki MNA pou distrik Grand Anse Praslin.

Mr Speaker, Mosyon Onorab anmennen i lir koumsa. Sa Lasanble i demann Gouvernman pou kontinyen sa travay pou met an plas bann facilite ki manke lo Zil Pros parey *outdoor gymnasium, dojo, micro-enterprise center, track sentetik* ki pou anmenn plis devlopman lo Praslin avek La Digue.

Mr Speaker, mon pa'n ganny sans pou mwan pas lo mazorite ou kapab dir bann facilite *sport* lo sa 2 zil. Me selman souvandfwa lo magazin *sport* mon ganny sans pou mwan swiv bann konpetisyon ou kapab dir ki pase lo sa 2 zil. Be ler mon gete se ki bann facilite i deza la. Me selman parey Onorab pe demande, petet i devret annan en pti pe plis e osi bann ki deza la petet i devret ganny en pti pe plis latansyon pou fer sir ki zot lo en leta ki pou ankouraz plis zenn.

E parey nou konnen ozordi se ki lo nou 2 zil dan bann konpetisyon internasyonal, parey ki ganny

fer sa 2 zil zot osi zot bann atlet i partisip byen. E souvandfwa zot pe anmenn bokou bann bon rezulta pou pei li menm li. E mon'n ganny sans pou mwan koz avek bann zofisyen kot NSC, pou mwan konn en pti pe plis ki bann travay ki pe ganny fer, ki bann plan ki NSC li menm li i annan pou sa 2 zil.

E ler mon'n koz espesyalman ek Mr Aldo, in fer mwan ganny en konpran poudir se ki avek CJSOI ki pe vini, e i annan bokou travay ki definitivman i pou ganny fer. E osi selman pou le moman zot en pti pe plis konsantre pou fer sir ki bann facilite pou ganny met an plas pou fer sir ki CJSOI i pas ase byen.

E selman i dir mwan poudir travay lo sa 2 zil i pou kontinyen parey in koz ek mwan en pti pe lo renovasyon, lo novo lenfrastruktir *changing room* ki kot *water sport* Grand Anse Praslin ki travay pou kontinyen apre i annan *fence* ki pou ganny mete.

Mr Speaker, kot Grand Anse Praslin menm osi La Digue i annan renovasyon ki pou konplete byento kot *sports complex* laba. E osi i annan bann lezot proze ankor parey lo *court tennis* ki pou ganny *refurnished* pou fer sir parey Mahe in deza ganny fer. Me selman lo sa pwen Mr

Speaker, en keksoz ki vreman toulstan trakas mwan lo bann facilite *sports* se ki Gouvernman parey Onorab Woodcock in dir Gouvernman avan, Gouvernman konmela i envestir bokou dan bann lenfrastruktir *sport*.

Me selman toulstan nou war poudir i annan bokou vandalizm ki ganny arive. Kot la sa bann dimoun pa pe respekte sa bann lenfrastruktir. I annan bokou bann aktivite ilegal, antisosyal ki pase kot sa bann facilite e mwan mon krwar se ki Lepep Seselwa nou menm nou ki desann ki al donn sipor nou bann atlet ki anvi war bann bon rezulta, akoz souvandfwa nou war bokou konplent ki ganny fer ler bann rezulta pa sorti byen.

E nou pa pe partisip dan sa lavi nou *sport* pou ede poudir sa bann lenfrastruktir ki ganny mete an plas i ganny kite dan en bon leta, ouswa i ganny servi dan sa fason ki i merite. Zis parey ou pou fer detrwa letour dan laplipar bann facilite lenfrastruktir *sport* dan bann distrik, ou pou war *fencing* in ganny desire. Ou pou war bann *changing room* ki pa pe ganny servi dan sa fason ki i merite.

Ou pou war osi salte diferan kalite keksoz ki ganny zete dan bann facilite sport Mr Speaker. E sa i bann keksoz ki

nou, nou bezwen dir ek nou pep ki se ki nou bezwen dekouraz zot pou zot kapab kontinyen ek sa latitud parey. Akoz i *taxpayers money*, e i bokou larzan ki pe ganny envestir ladan. E bann facilite *sport* Mr Speaker, i pa sipoze en landrwa kot pe ganny servi pou deservi lalkol.

I en landrwa kot pou ankouraz plis bann zenn kontrer pou tir zot dan bann aktivite parey drog ek lalkol pou fer zot sorti dan bann fason fer ki negativ li menm li. Kot sa ou kapab dir i anmenn en pep ansanm, i anmenn en fanmir ansanm pou ede kot nou bann facilite i ganny servi. Mr Speaker, parey mon'n dir lo komansman se ki mon pa'n tro war mwan pe vizit bann facilite *sport* lo Praslin.

Me ler mon'n ekout Onorab ki'n anmenn Mosyon li menm li, se ki in montre ou poudir se ki sa travay li menm li i kontinyen. E bann lenfrastriktir ki petet pou le moman zot napa lo Praslin. E ler mon'n koz ek NSC i annan bokou pou ganny fer i annan en plan ki ler mon'n ekout Mr Aldo kot NSC ki i annan bann plan ki Gouvernman li menm li pe mazin lo la pou kapab anmenn lo nou 2 Zil Pros Praslin ek La Digue, pou fer sir poudir bann zenn dan sa 3 distrik laba zot kapab ganny bann facilite zot osi.

E osi nou anvi ki lo Mahe osi tou nou pa ganny oubliye kot bann travay parey ki pe ganny dir pou fer lo Praslin ek La Digue sa osi tou i kapab kontinyen lo Mahe, nou'n war bokou. Nou war nou Stad Linite kot travay in ganny fer zoli travay Mr Speaker, kot i donn li en novo sirfas byen zoli ki sa demen i kapab re donn lankourazman ankor nou bann *sportsmen*.

Be si ou fe ren pti vire lo Stad Popiler Mr Speaker, ou pou war leta ki sa *track* i ladan i annan trou, in ganny abimen. E mon mazinen poudir Gouvernman dan son plan *once* ki i fini avek Stad Linite i pou bouz Stad Popiler, akoz i ankor *still* pe ganny servi pou bann nenport ki bann aktivite *sport*.

Mr Speaker, apre osi ler mon pe koz lo Mahe mon pa kapab bliy mon distrik Mont Fleuri. Nou annan nou en zoli facilite *sport* laplenn kolez, kot nou war bann diferan landrwa travay zot vin fer *team building* la, zot deservi sa landrwa menm bann etranze ki pe reste isi Sesel kot zot servi nou landrwa pou zot vini vin detann zot lekor. E nou pe demann ek bann lazans, bann departman vini ed nou pou nou kapab kit sa lenfrastriktir lo en bon leta.

Mon pa dir ki zot pe fer zot ki pe fer bann vandalizm,

selman vini parey lot fwa nou ti war tou bann labank dan Sesel i vin fer en konpetisyon la. Me ler zot in vini zot kapab war leta ki nou *changing room* i ladan. E nou lo kote Lotorite Distrik nou pe anvoy en lanons avek zot, pou nou demann zot vini pou envestir. I en landrwa kot bokou zot, zot vini zot vin fer zot *team building*.

Me selman donn nou lanmen, e nou pe demande ki bann businessmen dan distrik dan nenport ki landrwa kot zot ete vini nou ava envestir. Mr Speaker, nou laplenn kolez li menm li ler ou pou pase i en landrwa ki toulstan i *busy*. Ou pou war bokou tim *sport* i vin *train* la. Menm *lately* nou ti war tim *rugby* vin la.

Me selman sa laplenn li dan lepase i ti en laplenn ki ti'n ganny neglize. Ler mwan mon ti ganny elekte koman *MNA* ler mon vini, premye keksoz ki nou ti bezwen fer se tir detrwa bann montanny later ki ti'n ganny kit la. Nou ti bezwen fer sa travay apre dezyenmman se rod fason pou stabiliz sa landrwa kot i retourn li en pti pe dan sa leta ki i ti ete oparavan.

Nou ti war ki ti annan en landrwa kot i ti'n ganny bokou vizitasyon ki ti'n *overgrown*. E bann tim *sport* pa ti kapab servi, zot ti bezwen zis servi en bout laplenn. E souvandfwa

letan nou annan nou 2 tim, Mont Fleuri avek *Foresters* ler pe *train*. Zot ti bezwen rod en fason pou zot kapab fer sir ki zot sakenn i ganny en pti bout pou zot *train*.

E la avek bokou travay avek NSC nou'n war poudir travay i komans demare, kot landrwa kot i annan delo ki pe antre lo laplenn, pe ganny fouye pe ganny remet ros ladan, pou fer sir ki nou tir sa lakantite delo ki la ki mazorite, maksimonm nou laplenn i kapab ganny servi. Par tou bann tim *sport* ki vini.

Osi Mr Speaker, i annan plan pou nou aranz nou *sitting facilities* lo laplenn. Me selman ankor la, *once* ki sa travay i ganny fer zour i arive se ki nou anvi ki bann dimoun i servi li byen kit li lo en fason byen menm. Akoz ozordi ler ou pase bokou dimoun i servi sa landrwa pou zot asize swa pou zot manz zot pti manze. Ouswa 2 zanmi i vini i zwenn.

E nou, nou pe demande ki NSC ler sa travay i ganny fer nou ganny en konpran zot ki poudir avek finansman ki zot annan zot pa kapab fer tou. Me selman nou war poudir i annan sa mouvman, kot *fencing* in komans ganny aranze. Byento nou ava war nou *changing room* li menm li ki pou ganny en nouveau sifras.

Li osi i annan propozisyon pou fer li *move*

ground plus 1, kot par lao i ava annan en *game bar* kot bann tim *sport* ki ozordi Mont Fleuri napa en landrwa pou zot zwenn, zot a kapab zwenn Mr Speaker. I annan bokou bann lazans li menm li ki'n vin devan, zot in montre lentere pou zot kapab ed distrik.

Me selman nou war poudir keksoz pe pran letan i pran bokou letan. E nou, nou pe demann plis ankor bann ki ti a voudre kapab vini pou donn en koudmen, pou nou kapab aranz nou fasilite *sport*. Akoz i en keksoz ki pou benefisy e bann zenn li menm li. E benefisy e nenport ki, ki anvi deservi sa laplenn.

Mr Speaker, nou annan nou pti *court volleyball* la ki osi tanzantan i *busy* la ki i ganny deservi par nenport ki, ki anvi vini vin servi la osi tou i annan en travay pou ganny fer ki pou benefisy e nou tim *volleyball* Mont Fleuri ki ozordi i apel *Premium Cobras Girl* kot sa i ava ede pou re anmenn nou bann tim dan distrik lo en nivo.

E osi nou bann tim lekol e bann konpetisyon lekol Mr Speaker, i ganny fer la lo nou *court volleyball*, kot nou a kapab donn li en pti *proper sitting facilities*. E ozordi Mr Speaker, mon kapab dir mon kapab apresye sa travay ki NSC pe fer lo kote *ground cleaning* akoz nou war poudir

tanzantan i annan kontrakter ki fer sir i pase i fer *delittering*, i fer sir ki zerb i ganny koupe. E ki nou a kit li lo sa fason ki nou a war poudir bann tim ki la zot a kapab deservi nou laplenn.

Osi Mr Speaker, nou pa kapab bliy nou *court basketball*. Nou *court basketball* wi, ozordi i annan bokou bann atlet ki'n pas lo la. I annan tim *Mont Fleuri Dogs*, *Premium Cobras* ki bokou bann zwer profesyonnel in pas la lo sa *court*. E ansanm avek NSC i annan en travay osi ki pou ganny fer. Bann premye travay ki'n ganny fer Mr Speaker, se ki nou'n re aranz en bout *fence* ki pye dibwa ti'n tonn lo la.

Aranz en pti *shed* ki ti la, ki ti'n ganny kraze e nou'n remont li. E i annan bokou travay ankor pou ganny fer Mr Speaker, pou nou kapab met sa *court basketball* lo en nivo. Me selman nou konnen poudir i pou pran letan avek bann travay ki annan pou fer, osi avek finansman ki nou pe koz avek NSC pou fer sir poudir sa *court basketball* i ava kapab vin lo en serten nivo ki pou ankouraz plis nou bann zenn, nou bann lekip *sport*, pou fer ki sa landrwa li menm li i ganny okipe byen.

E nou anvi kontinyen dir avek bann ki servi, nou konnen poudir dan *weekend* i

annan bokou bann zenn ki servi nou bann fasilite. Servi li byen, pa bezwen fer vandalizm pou andomaz bann *fence* li menm li, akoz zot menm zot demen zot apre zot vin kot nou zot konplent fence pa bon, lot pa bon. E tousala ou bezwen war larzan pou ou kapab aranze.

E si zot donn lanmen pou zot kapab kit sa bann fasilite byen, sa pou ed nou kot nou kapab envestir sa larzan ki nou gannyen Mr Speaker, dan lezot lenfrastriktir *sport* ki pou ede pou lev en pti pe nou bann lenfrastriktir. Mr Speaker, mwan mon pou donn mon sipor sa Mosyon par Onorab Woodcock ki'n anmennen. MNA pou distrik Grand Anse Praslin, akoz mon war poudir la deor nou ankor *still* annan bann zenn ki pozitiv.

Bann zenn ki enterese dan *sport*, me selman zot bezwen zis bann fasilite. E mwan mon krwar poudir ler nou pe koz lo fasilite *sport*, e mwan mon krwar lo bann nouvo *housing estate* ki pe ouver, nou bezwen met bann fasilite *sport* osi a dispozisyon bann zenn ki antre dan sa bann *housing estate* pou ede pou tir zot dan bann keksoz negativ parey in ganny dir avan pou ed zot.

E demen sa bann zenn zot kapab ede pou nou kapab ganny meday, fer Sesel fyer. E

mwan mon pou donn mon sipor sa Mosyon Onorab Woodcock, ou kapab kont lo mwan. Mersi.

MR DEPUTY SPEAKER

Mersi Onorab Roucou. Amwen i annan en lanmen ki mon'n manke. Me mon napa personn ankor lo mon lalis, amwen mon annan en lanmen mon'n manke. Non? So... Onorab Gill, *ok proceed* Onorab Gill.

HON CHURCHILL GILL

Mersi Mr Speaker. Loter Mosyon in donn en bon pe leksplikasyon lo son Mosyon. Mon ti anvi zis tous detrwa pwen ki i enportan ki tou dimoun i konpran. E Praslin osi, ki santiman dimoun Praslin i ete lo sa bann size. Onorab, ler in eksplik son Mosyon in fer konpran ki in annan bokou miting dan 6enm Lasanble, e menm dans 7enm Lasanble.

E an rezulta sa bann miting, bann proze ki'n fer an rezulta sa bann miting i pe fonksyonnen byen. E zabitant Praslin, zot anvi mon met devan ki menm pratik ti devret ganny fer avek bann lenfrastriktir ki'n ganny konplete apre. Rezon ki zot dir sa se, mon a pran en legzanp. Par egzanp sa Lasose Baie Ste Anne, i ti annan son plan e i annan diskisyon ki ti'n komans fer lo la.

Me selman apre ler sanzman ti ganny fer lo la, e sa ti napa konsiltasyon serye ki'n ganny ki ti ganny fer sa letan, pou kapab konpran priyrite menm si ti annan kontrent bidzeter. Me selman *at least* son priyrite ti kapab ganny diskite, e sa toulstan i devret ganny fer avek dimoun Praslin. E menm sityasyon nou'n vwar pou Kordgard Baie Ste Anne, e loter Mosyon i konnen Grand Anse Praslin ti fer en kordgard nef.

Me selman Kordgard Baie Ste Anne menm si tou keksoz ti'n ganny diskite pou en kordgard nef, me selman ankor nou'n fer sanzman lo la, son plan orizinal in ganny sanze. E nou'n vwar ki en batiman ki ti'n ganny orizinalman fer koman en magazen, e sa pe ganny fer renovasyon lo la pou vin en kordgard.

Se sa ki enportan ki i annan sa konsiltasyon, kot bann dimoun Praslin i kapab partisipe swa atraver zot bann Manm Elekte Grand Anse, Baie Ste Anne oubyen lezot dimoun ankor dan distrik akoz sa i enportan. Nou ki konnen kwa ki nou bezwen ki bann keksoz ki nou pe fer fas avek. E ler nou pa ganny enkli dan sa bann keksoz, desizyon i ganny pran toulstan nou war nou avek en prodwir ki pa

neseserman pe donn nou sa rezulta ki nou ti oule.

Par egzanp kot lasose ozordi, nou annan en problem kot toulstan i annan en desarz ki monte. Nou annan en lot problem kot lespas ozordi laba, vizit i kapab ganny fer, loter Mosyon i kapab al vizite pou li menm i pou war poudir lofis i ptipti. E deza partou in fini plen. E preznan sa ki reflekte pou Praslin, se en landrwa ki son *lifespan* kantite letan petet ki ti a kapab deservi dan en fason confortab pou bann dimoun ki ti servi sa, la mannyer i ete, i pa pou neseserman kapab servi pou en kantite letan.

E en legzanp tipik se ozordi nou tou nou konnen lakantite viziter in desann. Me si nou vwar nou demen kot viziter i re *pick up* dan en fason ase konsiderab, nou pou, nou kapab realize ki nou pou kapab vwar lo sa lenfrastruktir donneb bann desizyon ki'n ganny pran ki petet fason ki priyrite in ganny fer ti a kapab fer pli byen.

E an menm tan, mon oule koriz en keksoz osi ki'n ganny dir par en Onorab ki'n koz avan mwan. Marie-Jeanne ti annan en sport en *mini Sport complex* ki ti pou fer. E sa ti napa naryen, i pa ti pou ganny finanse par Gouvernman Sesel. Sa ti pou ganny finanse par Gouvernman Endyen, ti

sipoze ganny *sponsor* parey nou tou dan sa Lasanble ki'n la dan 6enm Lasanble, menm dan 7enm Lasanble.

Nou'n tann bokou bann proze ki ti sipoze ganny *sponsor* oubyen ganny sipor Gouvernman Lenn. Me apre nou'n trouve ki bokou sa bann proze i pa'n materyalize. Donk, se sa rezon ki sa pa ti ganny fer Praslin par atraver rezon kot larzan ti annan in ganny depans en lot landrwa. I enportan nou dir keksoz ki konkret la anndan, akoz bann dimoun ki ekout nou vi ki zot ki'n met nou la zot pe *trust* sa ki nou pe dir i bann keksoz ki korek.

En lot keksoz ankor ki nou bezwen konsyan lo sa Mosyon ki nou pe diskite la, Onorab in fer en propozisyon pou ki Gouvernman i kontinyen met bann lenfrastruktir. Me selman nou tou nou konnen pou sa bann keksoz koumsa arive, ou bezwen annan finansman. Alors, kestyon fondamantal la ki fason ki sa bann demann pou ganny fer?

Vi ki la nou pe apros lafen 2024, e Bidze 2024 pou sa ki zot ti'n ganny bidzete, vi ki Bidze Siplementer in vini, nou'n vwar ki bokou larzan in fini ganny *shift* dan bann lezot landrwa. E i pa pou neseserman tou sa ki ti'n

ganny propoze dan Bidze 2024, i pou ganny egzekite.

Alors, ki fason ki sa bann keksoz ki pe ganny demande ozordi pou kapab ganny fer. Mon mazinen petet lapros ki Onorab ti devret pran, se ensiste ki sa pou sa bann proze sa larzan i ganny mete dan Bidze. Me selman apre li menm li in fer nou konpran ki i dan Bidze 2026. So, sa i kler ki sa legzersis ki nou pe fer, menm nou pe diskite oubyen menm si i ava annan bokou bann bon sizesyon ki a sorti, nek 2026 ki dapre loter Mosyon i annan larzan ki pou kapab adres sa bann problem.

Alors, mon santi ki petet lapros pou sa Mosyon ti ava pli bon se nou demande ki sa ti ava dan Bidze. I domaz i pa'n ganny fer koumsa, e mwan mon santi ki sa bann keksoz ki nou pe demande i pa neseserman lannen prosenn nou pou kapab vwar li pou rezon ki li menm li in dir i pa dan Bidze 2025, e i pou dan Bidze 2026.

An menm tan lo Zil Eve nou konnen bann travay ki'n deza konmanse lo Zil Eve, e bann travay ki sipoze kontinyen lo Zil Eve. Me selman nou'n vwar dan Bidze Siplementer ki 16 milyon in ganny tire. E leksplikasyon ki ti ganny donnen, akoz mwan mon ti demann Minis sa sete

pa'n ganny sans enpliment proze. Alor, se sa ki sa larzan in ganny met dan Bidze Siplementer pou ganny servi dan en lot landrwa.

E sa dan li menm, i fer sa travay oubyen bann dimoun ki ti pou benefisyé ek sa travay - la mon pe koz bann dimoun ki ti pou fer biznes ki anvi fer biznes lo Zil Eve - oubyen bann dimoun ki ti pe esper *retender* pou zot kapab partisip dan *tender* pou zot ganny en bout pou zot lans dan zot biznes, avek sa sanzman ki'n arive ki sa kantite larzan in al dan Bidze Siplementer, i kler ki sa bann keksoz prezan pou ganny *delay* pou ankor en pe letan.

E sa petet, lo kote Praslin ler nou pe koz lenfrastriktir pou Praslin petet sa fason *planning* ki pe ganny fer ozordi i devret rewwar, akoz R16 milyon i en kantite larzan ou pe tire. E ou pe tir sa dan mwan Oktob, ki naturelman en lannen in fini, pe al fini. E prezan sa bout devlopman kot ti pe al arive nou pa pou war li arive pou fasilman ankor 10 mwan, 11 mwan.

Alors petet, sa fason get lenfrastriktir lo zil i devret ganny rewwar dan son totalite. E petet pa menm atraver en Mosyon, me petet annan en Polisi ki mannyer nou antreprann bann devlopman lenfrastriktir lo zil. E sa i a osi

dekoul dan fason ki Bidze i ganny *allocate*, akoz lamazorite fwa fason *allocate* i pa neseserman fer dibyen. Menm mon a pran en legzanp Minister Lasante.

Minister Lasante i annan en gro Bidze, nou annan Lopital Baie Ste Anne Praslin. Nou annan en Klinik Grand Anse Praslin, me mon'n deza anmenn kestyon isi dan Lasanble pou demann Minis Lasante ki kantite larzan ki ou'n met akote pou depans spesifikman lo Lopital Baie Ste Anne Praslin ek Klinik Grand Anse Praslin, mon pa ti kapab ganny en larepons.

E sa i montre ki i napa en sistenm dan Minister, ki donn priyorite sa ki annan pou fer lo Zil Praslin oubyen Zil La Digue. E sa i fer ki an rezulta sa, nou vwar nou toulstan nou bann lenfrastriktir i annan demann pou fer keksoz lo la. E mon'n tann bokou Onorab koze ki sa bann lenfrastriktir en bon pe letan i la.

Be nou osi annan en Gouvernman depi 2020 i la. So, nou bezwen balanse pou nou konnen kwa ki petet i pa pe *synchronized* la ki pe koz tou sa bann keksoz. Alors, a lafen dizour dan plas pou nou rode lekel ki ti devret fer, lekel ki pa ti devret fer, petet in ler pou nou rewwar sa Polisi, revizit sa bann Polisi pou Zil Pros avek Praslin.

E sa petet i ava fer nou ganny sa solisyon. E sa petet i ava reponn bezwen Mosyon ki pe ganny met devan konsernan bann lenfrastriktir ki devret annan lo Praslin. Mersi Mr Speaker.

MR DEPUTY SPEAKER

Mersi. Mersi Onorab Gill. Nou pou pran en poz la. I reste 2 Manm ki'n endike zot oule koze avan ki nou donn *right of reply*. Ou le koze ou osi? Ok. Donk, nou ava rezwenn 4er. Nou ava pran en poz la.

(BREAK)

MR DEPUTY SPEAKER

Welcome back tou dimoun. Nou pe kontiny deba Mosyon table par Manm Elekte pou Distrik Grand Anse Praslin, Onorab Wavel Woodcock. E kon a zis lir Mosyon pou dimoun ki pe swiv nou dan lakour konnen ki topik.

Sa Lasanble i demann Gouvernman pou kontinyen sa travay pou met an plas bann facilite ki manke lo Zil Pros parey *indoor gymnasium, judo dojo, micro-enterprise center e track sentetik* ki pou anmenn plis devlopman lo Praslin avek La Digue. Prosen entervenan lo mon lalis i Onorab Rocky Uranie.

HON ROCKY URANIE

Mersi Mr Speaker. Bonn apre midi tou koleg Onorab. Bonn apre midi tou zabitan Zil Pros ki a lekout. Mr Speaker, *sport* i anmenn bokou devlopman dan dimoun. *Sport* i anmenn bann devlopman fizik, pou en dimoun. En dimoun ki fer *sport* i kapab anpes li ganny maladi mantal, i devlop *skills komunikasyon, skills leadership* par egzant si ou vin en kaptenn tim petet demen ou kapab devlope vin en *leader* dan ou pei si byen boner ou'n fer sa.

Par egzant si ou pran en zenn marmay ankor pe lekol i kaptenn tim foutbol, i fer sa byen. Sa i devlop bann *skills leadership* anndan li pli tar demen i kapab vin en *leader*. Fer *sport* i anpes ou ganny bann maladi parey kardiyovaskiler, i fer ou develop bann relasyon sosyal ler 2 tim i zwenn.

I kapab en tim La Digue i zwenn ek en tim Praslin, sa bann zanfan, bann dimoun ki pe fer *sport* ki kekfa pa ti konn kanmarad. Me la zot konn kanmarad, zot kapab fer zanmi. I devlop ou bann *social skills* pou kominike. E osi enn primordyal dan *sport* se disiplin, *sport* i ede fer disiplin. Me pou fer *sport*, formelman nou bezwen bann lenfrastriktir. E nou Gouvernman in fer bokou lenfrastriktir dan pei.

Si ou pou pase partou dan tou distrik, ou pou vwar i annan en *court* oubyen en laplenn, kot bann zenn i kapab vini pratik en *sport* ki zot kontan fer. I vre ki pa dan tou distrik ki annan tou fasilite pou fer tou *sport* ki ou ti a kontan. Me selman i annan *sport* ki anmenn lamas, parey *volleyball*, *foutbol*, *basketball* i annan bann *sport* lekip.

Me *sport* Mr Speaker, pou ankouraz dimoun fer *sport* nou bezwen komans fer byen boner, depi dan lakour ler sa zanfan i al lekol i enn lo *timetable* se ledikasyon fizik. So, nou bezwen ankouraz zanfan pou fer ledikasyon fizik sirtou pou konbat en pe petet obesite, *ok?* I osi *improve* zot *cognitive skills* dan zanfan pou zot kapab aprann pli byen dan laklas.

E la, ledikasyon fizik Minister i bezwen fer sir i donn sa sipor, donn plis bann materyo. Donn *training* bann *PE teachers* pou zot kapab ankadre byen bann zanfan a tre zenn az dan *sport*.

Mr Speaker, fason servi lenfrastriktir osi i enportan ki nou pa fer vandalizm, nou tret byen bann fasilite ki la. E pandan sa 43 an, nou'n met bokou fasilite. E nou'n vwar bokou vandalizm ki ozordi nou vwar kot bann *maintenance* pe ganny fer lo sa bann fasilite. E

mon'n kontan pou aprann ki loter Mosyon, in rekonnet ki nou'n met bokou, nou'n fer bokou e zot pe vin kontinyen sa bann travay ki nou'n fer.

Mr Speaker, La Digue nou annan en *sport complex* mon'n koz plizer fwa lo la. Mon'n fer plizer vizit ansanm avek loter Mosyon. Mon'n menm vin isi anmenn kestyon direk pou Minister Marie-Celine Zialor pou reponn konsernan lenfrastriktir *complex* La Digue. Nou ti vwar kot foutbol par egzanp, ti aret ganny fer pou en kantite letan lo nou zil. E sa ti al fer Praslin, kot nou bann tim ti depans bokou.

E foutbol ti ganny fer arete akoz dapre Minister zot bezwen re aranz laplenn met li lo en standar ki ganny rekonnet par *FIFA* e mon ti ganny dir ki laplenn, later pou ganny tire tou keksoz pou ganny tire. E pou fer li dan en fason pli modern. Me malerezman Mr Speaker, sa travay pa'n arriv koumsa. Mon'n war plito nou'n fer *maintenance* laplenn.

E nou'n met kouvertir wi, e apre nou'n fer *maintenance* laplenn apre plizer fwa la nou war ki finalman foutbol in rekomans ankor. Me ki mannyer mon pe vwar keksoz pou retourne pli pir ki avan, akoz sizesyon sete zis akote *sport complex* La Digue ti

annan en plas pou fer en *training ground*. E plan sete pou devlop sa *training ground* pou bann tim kapab *train* lo la, ki zot pa abiz laplenn prensipal ki zot zwe zot *game league* ek *knockout* lo la.

Me nou war sa pa'n deroule, zot pe fer *training* lo sa menm laplenn ki zot pou servi pou zot zwe zot *game league* ek *knockout* lo la. E sa pa blyie i annan plizer tim foutbol lo La Digue, i annan 2 gro tim Anse Reunion ek La Passe e osi i annan bann tim lekol. I annan tim anba 17 an, ki vreman for ki premye nou ti pran lakoup lannen pase.

E zot pe bat bann tim 22/0, 28/0. Se pourtan nou bann *sportsmen* i vreman, vreman talante lo nou zil. E mon kontan ki bann *MNA* in rekonnet abilite nou bann *sportsmen* lo La Digue. Mr Speaker, atletik pou detrwa lannen la nou pa'n war atletik deroule, akoz dapre zot ti pe aranz stad pou fer li pli meyer. Me parey nou'n vwar, nou vwar ki zot in met *track* sentetik. Me nou tou nou'n vwar ki'n arive avek, ki mannyer in fini finalman zot pe bezwen pez avek blok.

So, keksoz ennler nou bezwen fer li byen, nou pa tay avek nou bezwen fer li byen. Loter Mosyon pe demann *track* sentetik lo Zil Pros, me mwan mon dir loter Mosyon pa

trakase 2025, nou pou fer nou pou vin mete *track* sentetik lo Zil Pros La Digue, lo nou *sports complex*.

Mr Speaker, ler laplenn in fini mon ti pe ekspekte ki *at least proper fencing* ti a'n fer, baraz mete pou sa bann tim ler pe zwe zot vann zot tiket zot kapab anmas en pe plis larzan vi ki zot fer bann gro deplasman pou al zwe Praslin e Mahe.

Me mon vwar ki sa pa'n ganny fer. Me dapre konpran i dir i dan *future plan*. So, mon swete ki sa i ganny fer pou ki sa bann tim i a ede ganny en pe plis larzan pou zot bann deplasman. Mr Speaker, nou tou nou konnen ki devlopman in ganny fer Sesel partou. E loter Mosyon in koz lo preski tou devlopman ki'n ganny fer pa zis lo *sport* me tout sort devlopman.

La Digue osi nou'n war konstriksyon Por, parfwa nou bezwen ekoute, konstriksyon Por. La Digue bann gran dimoun ki'n la lontan pe viv La Digue i konpran ki mannyer sa *flow of water* dan lapas i deroule. Me dan bann miting ki fer, bann sizesyon i ganny met devan me pa ganny pran an konsiderasyon. E preznan ki nou vwar, Por in ganny fer me selman disab i akimile dan milie akoz zot in preski frenm li parey en *swimming pool*.

Prezan nou war nou fek fini fer Por, fek fini fer *dredging* e ankor la pe re fouy ankor e depans plis larzan. Alors i enportan nou aprann ekoute e nou fer keksosz byen. Nou'n vwar nou'n ganny osi en lopital, vre nou bezwen en lopital modern. Me selman ler nou pe get lopital ki nou'n gannyen i pa en lopital ki vreman ale avek nou kondisyon klima, akoz mannyer zot in fer li i depan antyerman lo elektrisite, lizour koman aswar akoz tou *ward* i dan milye.

I annan zis laport, napa en lafnet. E si kouran i koupe i ariv en problem ou pou bezwen tir tou pasyan, met anba lavarang. E nou'n vwar ankor kot sa lopital in ganny fer en pe vit in fini komans *crack*. Mr Speaker, sityasyon lanbilans avan nou ti kapab ganny lanbilans. Me ozordi nou vwar kot kliyan pe mor akoz pe esper lanbilans arrive.

La Digue nou bezwen war nou pe *call* 151 Mahe, e la ou ganny demande tout sort kalite kestyon avan ler ki lanbilans i vini 30 minit apre, 45 minit apre, 1 erdtan apre. So, sa i fer bann konplikasyon e nou pe enplor Minister pou silvouple fer nou ganny komunikasyon direk pou lanbilans kot Lopital La Digue ler Digwa pe *call*. Ki zot kapab

ganny lasistans pou *emergency*.

Mr Speaker, nou'n tann koz bokou lo lenfrastriktir. Me selman nou'n tann osi koz lo programm, kot Minis in vin isi anndan Minis in koz programm parti programm. Me ziska la nou pa war sa bann programm. Alor nou ti a kontan konnen, lenfrastriktir ou bezwen annan programm ki vin avek ki fer li marse.

Alor, mon ti a kontan bann programm i ganny met ater nou vwar sa bann programm, bann zenn i war sa bann programm non pa zis koz lo programm.

Nou'n vwar devlopman, devlopman *sewage*, me ozordi *sewage* pe anmar serten dimoun, ki ler i bezwen fer son lakaz i ganny dir son plan pa aprouve akoz i bezwen esper *sewage plan* fini pou kapab fer son lakaz konekte direk avek *sewage* e sa pe met sa bann dimoun retar. Si sa *sewage* i al pou 3 an, e ki sa dimoun i bezwen esper 3 an pou fer son lakaz.

E nou'n vwar kot sa osi i *disturb* nou semen, lenfrastriktir semen nou semen. Bokou dimoun ti kontan al taye lo semen granmaten marse. Me la, kondisyon semen nepli bon, nou vwar ki tousala in kase e nou pe demande ki nou semen i ganny refer lo en standar

konvenab pou nou dimoun, pou sekirite nou dimoun nou bann zanfan, e osi touris ki servi.

Nou'n tann koz lo *rock armoring*, loter Mosyon in koz lo *rock armoring*. Me La Digue i annan dimoun ki ankor pe esper *rock armoring*, akoz kot zot reste i o bor lanmar. Nou war *rock armoring* fer zis en bout, kantmenm nou tir portre nou avoye demen, tanto me nou pa war naryen ganny fer.

Menm parey pou pye dibwa, ou met ou konplent devan demen, tanto, ziska la pye dibwa pa ganny koupe sirtou pou bann dimoun ki pa kapab napa le mwayen pou koup sa bann pye dibwa. Alors, mon kontan ler loter i demande pou nou vin ansanm, vin ansanm pou koz lo lenfrastriktir. Me mon ti a kontan dir avek loter Mosyon osi, me ler nou koz lo kou lavi lo zil sirtou lo Praslin ek La Digue zwenn nou, zwenn nou koz for lo sa kou lavi parey mon tann ou pe koz for lo lenfrastriktir isi anndan Mr Speaker.

Akoz kou lavi lo nou zil i vreman, vreman, vreman ser. Mr Speaker, Mosyon pe demann osi *microenterprise center*. Mwan mon plan sete kot sa gran lopital in fer, la ti pou en gran lespas pou nou kapab met plizyer, plizyer facilite sportif enkli *dojo*,

microenterprise pou bann pti biznes kapab fonksyonnen. Me sa lopital in pran tou sa lespas.

Nou pe demann osi en *green space* pou tou dimoun kapab defoule lo zil, kot *ex Lopital Logan* ti ete. E *land use plan* ler ti vini dan miting sizesyon mon ti mete kraz sa landrwa, kit li koman en *green space* pou dimoun kapab defoule akoz nou napa. Me mon'n tann la in dir pou fer *Government House*. I annan lespas pou fer *Government House* lot kote, petet sizesyon fer sa vin en *green space* pou tou dimoun Seselwa koman touris, ganny en *green space* dan *La Passe* kot nou kapab vini asize detann, akoz nou napa sa bann fasilité.

Mr Speaker, nou annan *sport women* Natasha Bibi ki pe fer tre byen aletranze, i pe *score* me zanmen nou tann son non ganny mansyonnen. COSAFA nou pe rode ki zot servi pou swazir zwer pou met dan COSAFA. Me li enn bann *top scorers*, enn bann meyer foutboiler fanm i ganny kit ater. Nou pe rode ki rezon pou sa, i pe demann mwan ki rezon pou sa. Mon'n sey rode ki rezon me sa bann rezon pou mwan i pa fer sans ki zot pe donnен.

Alor, mon pou felisit Natasha mon pou dir li kontinyen debourye,

kontinyen fer perse ou non, fer La Digue fyer, fer Sesel fyer. La osi mon oule felisit Rodney Henriette ki fek vini sorti en konpetisyon *body building* ki'n fer vreman, vreman byen. E la osi Rodney, nou dir ou kontinyen sa bon travay, ou'n anmenn en tim modern lo la Digue.

E bokou bann dimoun pe servi, bann tim foutbol pe servi. Alor, nou dir ou mersi, mersi pou sa.

Mr Speaker, pou terminen mon swete ki ler Gouvernman i pran bann desizyon pou fer bann travay zot pran letan zot fer li byen, zot pa tay avek ki apre nou war zot bezwen re vini pou revin fer bann serten travay lo la, ki fer plis depans parey nou pe vwar in arive ek lasose Praslin.

Ou al anba langar pasaze kot ou war soley i ganny ou, lapli i ganny ou, *ok*. Nou war in arive avek *track sentetik* ki zot pe mete. So, alor mon swete ki ler zot pe fer keksoz, zot fer li byen anvi ki zot dir i annan kontinyite en Gouvernman avan i komanse e zot, zot bezwen kontinyen. Alor, Mr Speaker se avek sa 2 pti mo mon ti anvi koz lo sa Mosyon. Mersi.

MR DEPUTY SPEAKER

Mersi Onorab. Aprezan in ariv ler pou mwan donn loter Mosyon son dwa repons, akoz

2 Manm ki ti oule koze enn lo sak kote latab in dir mwan tir zot non. Onorab Woodcock.

HON WAVEL WOODCOCK

Mersi Mr Speaker. Mr Speaker, mon bezwen dir remersi tou bann entervenan ki'n koz ki'n aport sipor lo sa Mosyon ki mon'n prezante *obviously* pou annan diferan lopinyon fason get keksoz. Me pou komanse mon'n apresye Mr Speaker, premye entervenan ki'n koze apre mwan.

Mon koleg Onorab Porice ki sorti Manm Proporsyonnelle ki baze dan Distrik Baie Ste Anne Praslin. Mr Speaker, en keksoz enportan ki'n fer resorti ki mon 100 poursan dakor avek li sa problem obesite dan nou pei Sesel sirtou parmi nou bann zenn dan lekol. E mon kontan ki in dir ki poudir i enportan pou nou kontinyen met lanfaz lo sa size obesite. Sirtou lo Praslin fodre nou ranforsi sa en programm pou nou ed nou bann zenn pou dil avek sa.

In met lanfaz Mr Speaker, lo bann facilite spor parey ki monn fer resorti dan mon lentervansyon *the need* pou nou annan sa bann facilite ki dan serten sans i pou osi ede pou ankouraz plis zenn pou pratik *sport*, pou fer legzersis ki pou ed zot Mr Speaker. Mon'n apresye Mr

Speaker, mon bezwen dir ki Onorab Porice mon'n swiv en pe son travay lo kote Baie Ste Anne osi.

E mon konnen li osi in zwe en rol enportan dan lo kote Baie Ste Anne sirtou dan lenplimantasyon en *outdoor gym* ki ti son linisyativ ki ti pouse avek NSC Mr Speaker, en keksoz ki'n vin en realite Marie-Jeanne. Menm si i en Manm Proporsyonnel e nou annan bann Mamm Elekte mon krwar i enportan ki setaki i zwe en rol. Setaki i pouse, nou tou nou demande, si nou tou nou pe demande nou tou nou pouse pou en keksoz pou nou distrik pou nou zil i pou ed en kantite.

I pou zwe en gran rol pou anmenn sa bann keksoz ki nou zabitant ki pou plizyer lannen Mr Speaker, pe espere. In osi mansyonn plizyer bann klib lo Praslin. Annefe, in al fer en bon resers kot in mansyonn lakantite bann diferan klib ki annan lo Praslin, foutbol, laboks, *basketball*, *volleyball*, *judo*, *water sport*.

E mon bezwen dir Mr Speaker, ki Praslin nou'n prodwir en kantite atlet eksepsyonnell. Pa zis atlet eksepsyonnell, me nou'n prodwir osi bann *coaches* ki'n fer vreman byen lo lasenn lokal. E menm lo nivo enternasyonal. E parfwa i annan en pti pe konsern, ki

petet pou bokou lannen bann *coach* pa pe neseserman ganny sa rekonesans parey zot merite sirtou ennler pou zot pa al *coach* bann tim enternasyonal o nivo *CJSOI* ouswa Zwe De Zil ouswa bann lezot konpetisyon enternasyonal.

Praslin parey mon'n dir pli boner i annan en kantite profesyonnel. E la nou pou bezwen Onorab Rocky Uranie in mansyonn Natasha Bibi, annefe son non ti lo mon lalis akoz ti mon lentansyon dan mon konklizyon pou mwan mansyonn enn de bann atlet ki'n fer en pe forfe ou kapab dir ki'n fer monte paviyon Sesel pli o lo nivo nasyonal, lo nivo enternasyonal.

On top of my head petet mon pa pou mazin zot tou, me selman detrwa bann atlet en pe nouvo avek bann atlet pli lontan, pli ansyen. La mon pe mazin bann atlet parey Angelique Adeline, Jean-Marc Gardet, Natasha Bibi, Dominic Dugasse, Bertrand Lablache, Calixte Cesar, Brigitte Rose Cesar, Jules Kandasamy e bann atlet kekfwa en pe pli avan.

Mon pe mazin Max Anacoura, Luc Jeanne, Olison Joubert, Renting Joubert, Christian Philoe, Noiseline Finesse, Ralph Souffe e en *coach* Mr Speaker ki mon pou bezwen ozordi koz en pti pe lo

li akoz mon santi ki sa *coach* i bezwen ganny rekonnnet lo nivo enternasyonal Mr Speaker pou sa ki i pe fer pou nou zil Praslin Mr Speaker.

Mon krwar Onorab Gill, Onorab Porice ek mwan nou pou agree poudir ki sa *coach* in fer, i pe fer lo Praslin i senpleman eksepsyonnel. E sa se pa lot ki nou *coach* Sonny Athanase. Sir Sonny Athanase ki nou bezwen rekonnnet li ki en *PE Teacher* kot Lekol Praslin Segonder. E sikse bann garson lo nivo pa zis atletik, ki nou pe pran sanpyonna atletik pou plizyer lannen, me osi lo nivo bann *sport* parey *volleyball*, kot nou'n pran konpetisyon *under 15*, *volleyball under 17*, *volleyball under 18 volleyball*. E dan sa dernyen 5 an konsekitif 2020 ziska 2024 Praslin segonder in pran *Inter school competition*. In *win inter-school competition for 5 consecutive years*.

E sa lannen Mr Speaker, *volleyball* lo Praslin 2024 nou'n win nou *boys and girls under 18*. Nou'n *win the school leagues girls under 18, the school knock out girls under 18, the school league boys under 18, school knockout boys under 18*. Me parey mon'n dir 5 konpetisyon enter skoler Mr Speaker, par en *coach* ki vreman eksepsyonnel.

E mon bezwen dir Mr Speaker, mon santi ki enn ler i ganny *overlook*. La sirtou CJSOI pe vini, mon krwar sa i bann kalite dimoun ki nou bezwen *bring them in the fold* e donn zot sa loportinite pou *coach* nou bann zenn sirtou nou bann konpetisyon parey CJSOI. En *coach* ki'n la pou bokou lannen, in fer bokou.

E mwan mon santi in ariv ler pou nou rekonnnet sa bann *coaches* ki pe fer en kantite. Mon mazin Pirame lo kote laboks ki ti *call* mwan resaman, size kot zot fer laboks i koule. Deswit mon ti pran kontak avek CEO NSC, e nou'n rekouver twatir deswit. E nou, konnen i annan sa konversasyon ki bann *MNAs* i merit annan avek bann antite Gouvernman.

E petet sa en pti pe *advice* ki mon kapab donn mon bann lot koleg Onorab. Ler zot war bann *issue*, ou konnen ou kapab zis anmenn en kestyon dan Lasamble napa naryen ki anpes anmenn en kestyon dan Lasamble. Me selman ennler, ou pran ou telefond ou fer en *call*. Ennler ou pa ni bezwen *call* Minis ouswa CEO ou kapab *call* enn de zofisye.

Ouswa ou menm ou kapab met en lekip ansanm, nou dir annou vini, annou donn en koudmen. Zisteman ti annan *issue clinic* ranpli avek

fungus. Zis en zour bann ners, Coast Guard, brigad, marmay Praslin Boys, Biro MNA nou'n vin ansanm nou'n netway klinik. Konmsi i annan keksoz annou pa zis dir depan lo Gouvernman.

I annan bann keksoz ki bann biznes i kapab ede fer, nou bann *MNA* nou kapab ede fer. Ou donn en touk lapentir, i fer en gran diferans. Ou mobiliz en tim pou al netway *Old People's Home*, ou mobiliz en tim pou al fer *clean up the world*, ou fer en ta keksoz. I fasil pou met sa presyon lo Gouvernman dir Gouvernman fer. Me selman nou koman *MNA* nou osi nou kapab fer en kantite pou nou ed nou distrik.

Mon kontan Michel in koz lo *maintenance*, e sa i en keksoz enportan. *For many years in mank maintenance plan, nou napa en maintenance plan dan nou pei pou most of the MDAs anefe. Most bann fasilite Ministries, department and agencies ki fer ki ozordi nou annan en litani. I sitan annan en kantite fasilite ozordi ki ordeta dan nou pei, akoz nou napa en maintenance plan ki sa Gouvernman ozordi i vin en Gouvernman maintenance.*

En Gouvernman ki bezwen fer *maintenance*, en Gouvernman ki bezwen fer *maintenance* lo *so many* bann

fasilite ki dan bann kondisyon bokou bann kondisyon enpitwayab. Nou apel *NIHSS* i deservi nou bann zenn enkli Mahe, Praslin e La Digue ki'n ganny totalman refer ki ti'n ganny abandonnen. E plizyer lezot fasilite *sport* ki ti anrim.

Onorab Uranie in koz lo laplenn La Digue i pa en zafer novo, laplenn La Digue en bann lannen sa laplenn i la. Me selman letan ou pe get bann fase lo la i pa adekwat. E i enposib pou dir sa Gouvernman dan 4 an, si ou tir 2 an. Si ou tir 2 an dan sa 4 an avek sityasyon ekonomik ki nou pei i ladan, nou'n fer bokou plis avek mwens.

Nou'n fer en kantite fasilite, nou pa'n kapab fer tou sa bann fasilite ki petet zot ti anvi war. Nou bezwen *manage* lekspektasyon, akoz pou ou fer tou sa fasilite ki tou distrik pe demande enkli Mahe, Praslin, La Digue i enposib pou nou fer tou sa fasilite dan 4 an. Si zot pa'n fer li dan 20 an, 30 an zis mazinen i pou *almost impossible* pou nou kapab fer tou sa fasilite avek en Bidze ki pa *unlimited* tou le lannen R11,12,13 milyon divize par tou bann MDAs tou bann Minister pou nou fer tou sa bann fasilite an tou sa bann sekter i enposib pou nou fer li dan selman 4 an e menm 5 an Mr Speaker.

So, nou bezwen *manage* lekspektasyon, nou bezwen et realis dan kwa ki nou demande Mr Speaker. Onorab Gill *ok*, ou lopinyon i en pe mon dakor avek li lo some *extent*, me an menm tan i annan keksoz ki mon pa pou neseserman 100 poursan dakor avek li. Onorab Gill nou'n ansanm pou diskrit plizyer bann proze 6enm Lasanble e menm avan ler nou antre dan Lasanble koman nou antre nou komans *tackle* bann *issue* ki nou'n *inherit* avek ladministrasyon avan, bann MNAs ki'n la pou bokou lannen avan nou.

Nou'n *inherit* sa bann *issues* ki'n la pou bokou lannen, menm si nou ti dir i annan en plan. Me i annan plan 20 an, 30 an, 15 an e nou'n vini nou'n koze pa'n materyalize pandan ladministrasyon ki 6enm Lasanble pandan ki nou'n la i pe materyalize la. Ou kapab annan... mwan mon'n koz lo sa gro *sport complex* ki ti pou fer Ile Eve ki pa'n zanmen materyalize.

En plan ki en promet depi letan bann MNA menm avan ou kapab dir. I annan bann ki ti la depi promes depi *Peoples Assembly* ki pa'n materyalize. Me selman ozordi, ozordi nou bezwen get devan. Si i annan proze ki merit ganny fer ki nou

demande pa ankor ganny fer, annou vin ansanm la. Annou koz avek sa bann Minister, annou call sa bann Minis, annou zwenn sa bann Minis.

Mr Speaker, mon pou bezwen dir pou dir avan dan 6enm Lasanble mon ti annan en pli bon lantant travay avek Onorab Gill. Nou ti annan en *sort of lagreman* antre nou de, kot nou pa pou atak kanmarad nou pou travay pou byennet Praslin. Me selman mon pa kunnen si akoz *leadership* parti in sanze, ozordi ou kapab dir i annan en kalite tansyon.

Mon pa kunnen si zot pe ganny dir poudir ou kunnen, pa al dan miting ek bann Minis. Atak bann *MNA LDS*, mon pa kunnen direktiv in sanze. Keksoz ti diferan mon pou dir. Keksoz ti diferan anba *leadership US* avan, e in sanze ozordi kot ozordi ou a krwar i annan plis lanmertim. E zot pe plito rezenbe, opoz, blok, lager kont tou keksoz.

Nou ler nou ti dan lopozisyon Onorab Gill i kapab demanti mwan, mon ti vin avek li nou'n zwenn nou'n koze. Mon ti zwenn avek son bann Minister, mon pa ti zanmen refize ler Prezidan ti vin Praslin pou nou al bann vizit partou mon ti ale avek Prezidan Faure Mr Speaker. Mon ti ale avek bann Minis, tou bann vizit. Ler ti annan

bann aktivite ki ganny fer lo nivo nasyonal mon pa ti mank en aktivite nasyonal Mr Speaker *out of respect*.

Pa akoz i ti en Prezidan sorti dan US, me akoz mon ti MNA Elekte e mon bezwen respekte sa sez, sa Prezidan ki ti la sa letan Mr Speaker. E respe i vreman enportan Mr Speaker. E dir mersi osi i vreman enportan Mr Speaker. Nou kapab kritik bann proze ki ganny fer i annan defayans. I toultan dan tou proze ki ou fer parfwa i annan bann defayans.

Me ler nou war defayans ki nou fer? Nou rod en solisyon. I annan bokou bann proze ki ti ganny *over exaggerated, inflated* ouswa *over ambitious* ki ler nou'n vini nou war poudir nou pa pou kapab fer sa tro bokou larzan nou bezwen *scale down* akoz ti annan bann *urgency*. Por Baie Ste Anne ti en gro problemm en gro konzesyon.

La keksoz i 100 fwa pli meyer la kommela ki ti ete ler nou ti lo vye por Mr Speaker. Fasilite lapes in ganny fer dan distrik nou pa konplent fasilite lapes Baie Ste Anne i enn bann pli zoli fasilite lapes ki'n gannyen. E si i dir napa konsiltan mon krwar nou pe egzazer en pti pe, nou pe al en pti pe tro lwen Mr Speaker akoz Onorab Gill in la dan bann konversasyon. E li

menm li in fer ser ten propozisyon, mon rapel ler ti fer sa bazar peser, fer en pti bout pou bann dimoun ki vann legitim. E Gouvernman ti ekout li Mr Speaker.

I annan en kantite diskisyon La Digue pou aranz kordgard La Digue. E menm Lopital La Digue ler ti pou ganny fer sa lespas kot ti pou ganny fer, ti annan en petisyon ki Onorab Uranie ti fer Mr Speaker, kont sa lopital. La en zoli lopital in ganny fer, *of course* pa tou keksoz ki pou 100 poursan. Me selman i annan bann fasilite dan sa lopital, mon'n al vizit sa lopital mwan Mr Speaker.

E ler mon ti antre mon'n war bokou bann keksoz dan sa lopital ki nou napa Lopital Baie Ste Anne Praslin. E mon remersi Gouvernman pou fer sa, enn ler nou bezwen dir mersi. E zanmen mon pou blye lekel ki ti batiz Lopital Baie Ste Anne, sete bann aktivis US ler ti annan *rally* La Digue ti annan en bon pe zot ti *end up* servi sa lopital, batiz Lopital La Digue Mr Speaker! Ti ranpli ban avek bann aktivis US Mr Speaker, pou batiz sa lopital.

E mon rapel Onorab Vidot osi ti avek enn de aktivis lo ban. I ti tir portre i ti met lo *Facebook*, ou konnen bannla ti eksite kekfwa ou konnen enn ler anba sa lasaler *rally* ou

kapab tonm feb. So, ti annan en bon pe ti *end up* dan lopital ti deservi zot, zot ti ganny sa bon servis Mr Speaker.

So, savedir i annan keksoz dan sa lopital, dan sa lopital ki ti bon. *Ok Mr Speaker. So, ou war Mr Speaker, so ozordi annou gete annou pa zis i fasil vini dir tou keksoz pa bon.* Me selman ler ou asize ou analize, ou *go back 15,10,15,20 years* ou war poudir sa bann proze la *it's been on the waiting list for many, many years no implementation.*

Bokou promes, avan eleksyon nou tou nou konnen ki mannyer keksoz ti ete, ta promes avan eleksyon. Koman eleksyon i fini sa bann proze i ganny *shelved*, i ganny met laba lapousyer. I ganny lapousyer lo la, sak fwa eleksyon i vini *master plan* i ganny tire, proze i ganny tire tap lapousyer lo la nou dir vwala nou pe al fer sa. *But implementation* ti mank en kantite.

With that being said and done, i annan mwan mon'n dir pou dir i annan proze ki ladministrasyon avan in fer. Me selman *what we failed at* ki nou ladministrasyon nou osi nou bezwen fer atansyon nou pa fer menm fot. Se pou annan en *maintenance plan* pou tou nou bann facilite ki nou fer novo. E bann facilite ki deza

an egzistan ki nou deza pe fer en pep travay lo la Mr Speaker.

Mr Speaker, Onorab Gill in osi koz lo Ile Eve i dir Ile Eve ou konnen tou le lannen nou ti ganny *peanuts*. En pti alokasyon petet R5 milyon, ennler pa tro gran alokasyon pou devlopman Ile Eve. E bokou fwa nou'n rann sa bann larzan dan bann Bidze avan sirtou anba ladministrasyon avan in ganny rann.

Sa lannen, in annan apepre R30 milyon dan Bidze. E Gouvernman in depans li in rann R16.5 milyon si mon pa tronpe. Me in depans li R13.5 milyon lo Ile Eve sa lannen. Ki bokou pli ski bann lannen presedan. Savedir i annan en kantite facilite, nou pa'n fini met tou. Me en kantite nouveau facilite in ganny mete, semen, *utilities* e elektrisite delo ki pe benefisye bokou nou bann *businessmen* lo Praslin.

E 25 later in ganny *allocate*, e byento pou annan ankor alokasyon later Mr Speaker. E nou tou nou konnen ki ti arive Ile Eve, mon'n fatige koz lo la *land speculation*, bann koripsyon. E mwan mon'n la ansanm avek IEA Onorab Gill in la kot nou'n diskite bann later ki pa'n ganny devlope, in ganny repran e re distribye avek bann dimoun ki merite.

So, i annan bann travay ki'n ganny fer Mr Speaker. In

koz lo Polisi, lo redevelopman bann facilite lo zil ki kapab gid nou. mon pa krwar sa i en move lide mwan Mr Speaker. Mon krwar i en keksoz ki kapab ed nou. So, okenn sizesyon ki nou fer ki nou war nou merit fer pou devlop nou zil Mr Speaker, mon pou donn tou mon sipor.

Lo sa size... Mr Speaker, koman *Chair MYSCC* nou ti al vizit Stad nou ti al vizit Roche Caiman *Sport Complex*. Nou ti al vizite nou'n war leta facilite ti ladan, nou al plizyer repriz, 3 repriz nou'n ale e nou swiv *over the years*. Tou le lannen nou'n al fer vizit, e nou'n war devlopman, nou'n war *improvement*.

Pa tou keksoz ennler parey mon dir i annan bann defayans ki vini. Me selman nou pa kapab vin ek en latitud kot nou zis rod lipou Mr Speaker. I annan en tonton enn fwa in dir mwan koumsa, i dir ou konnen sorry mon pe dir mon bann koleg US sa i dir "i annan en bann dimoun i sey rod lipou lo lisyen, pa'n war lipou lo lisyen. Prezan olye rod lipou lo lisyen, zot al rod lipou lo lezar prezan Mr Speaker!

Ou konpran, sa issue Mr Speaker se ki zot rod tou sa bann pti defayans. Lo sa *issue track*, lo sa *issue* Mr Speaker lo sa zafer *track* lo stad Roche Caiman. Mon ti fer li mon devwar koman *Chairman*

MYSCC ler mon ti war sa dan nouvel mon'n *call* li. Napa naryen ki anpes okenn nou MNA pou nou, nou koz avek CEO.

CEO, ok mon annan tel *issue* dir mwan ki problem nou pe fer fas avek akoz sa retar. E in dir mwan ler sa bann *expert* ti pe enstal sa *track* la ti annan gro lapli e se sa ki'n kre en *issue*. Selman lo *track* zeneral kot marmay i taye la, napa tro gran *issue* la - *issue* i pou sa bann bout *outfield*.

Bann *expert* in ganny apele, *issue* pe *sort out*. E byento sa *track* pou *fully functional*, tou sa bann *issue* pou ganny rektifye Mr Speaker, akoz sa lakonpannyen ki'n ganny sa kontra la i en lakonpannyen ki fer sa bann travay partou dan lemonn. I annan bann sityasyon ki ennler ki arive.

Pa koman en pti fot i arive, nou zis sot lo la pou nou fer politik. Ler i annan bann *issue* i arive la, nou tou nou bezwen ler i vini annou gete ki mannyer nou kapab apiye. Kritike i fasil, me pou nou donn en sipor pou nou donn en soutyen i *the most difficult part* pou dimoun fer. E en lot laspe pli difisil en keksoz ki mon war i en pti pe difisil, ennler nou Seselwa sa i en pti pe nou defayans.

E mwan menm mon parfwa mon fer sa fot, se pou nou dir mersi letan keksoz i ganny fer. *Astroturf* in ganny mete lo sa stad, *wonderful* i vreman zoli. Nou annan en issue nou dil avek en *issue*. Tou bann defayans ki nou war, nou bezwen koman en pep rezilyan. Ler bann defi i vini la nou von ansanm nou rod solisyon.

E osi Onorab Gill or Onorab Rocky ki'n koz ou bezwen *call* Mahe pou *emergency*. Mon kontan poudir zot sa *issue* ti leve dan en miting ki mon ti annan avek Prezidan Sanmdi pase. Annefe *ok*, en topik in ganny leve. E prezan ti'n dir nou, annefe mon pou koz laverite ti en miting nou bann aktivis me Prezidan ti la koman *Party Leader*. E nou bann aktivis ti demann li sa kestyion regardan bezwen *call* Mahe an ka en *emergency*.

E Prezidan in dir nou koumsa annefe Baie Ste Anne osi, in dir poudir Gouvernman i annan lentansyon met 2 novo limero, 152 ek 153 enn pou Praslin, enn pou La Digue. Kot ou kapab *call* direk pou ganny an ka *emergency*. So, i deza annan bann keksoz ki pe arive. *Sewage* La Digue. Konbyen fwa Onorab Uranie in vin koz lo *sewage* La Digue?

Mon rapel depi 6enm Lasanble, menm avan sa i

annan sa *problém sewage* La Digue. E li i pe ekspekte nou Gouvernman dan zis 4 an rezourd sa bann problem ki'n anta e an pake La Digue *for years and years*. Tou sa bann MNA ki'n la avan li, sa pa'n rezourd. Me mon krwar la pep La Digue i bezwen ouver zot lizye vot pou en *MNA LDS next* eleksyon si tou sa *MNA* La Digue pa'n kapab fer sa bann keksoz. Mon krwar sel solisyon Mr Speaker.

E dan plizer logmantasyon ki'n ganny donne, kou lavi i en topik ki tanzantan i monte. Me selman i annan plizer bann keksoz ki Gouvernman in fer zis pou mansyonn 2 Mr Speaker, logmantasyon *allowance* bann etidyan. E la Prezidan in fer lanons ki pou annan en lot logmantasyon ankor, logmantasyon saler bann dimoun dan sekter piblik. *Allowance* pou bann madanm ki al donn nesans lo Mahe, e plizer lezot bann *weights* pou ASP in ganny revize.

So, i deza annan en kantite keksoz ki pe ganny enplimante, ki'n ganny enplimante. Menm nou pa'n esper eleksyon Mr Speaker pou nou donn sa bann keksoz. Nou depi 2022, 2023. 2022, zot ti dir nou, nou vin avek en Bidze eleksyon. 2023 nou in avek Bidze eleksyon, 2024 nou vin avek Bidze eleksyon. Be

oule dir mwan Bidze 2025 osi i bezwen eleksyon?

Be savedir, savedir tou sa bann dernyen 3 an tou nou Bidze i bon si tou nou Bidze i Bidze eleksyon Mr Speaker. So Mr Speaker, a lot *has been done*. Mon pa dir poudir kot bann facilite ki'n ganny fer napa en bann ki annan bann pti defayans. Be ler nou war defayans nou vin ansanm. Onorab Gill, Onorab Rocky Uranie, Onorab Porice mwan menm ek tou nou bann *MNA*, annou vin ansanm annou dir lala problemm annou rod en solisyon pou sa bann problemm. Nou pa kapab zis wi, nou annan nou diferans politik, me selman sa lapros Onorab Gill ki nou ti annan dan 6enm Lasanble mon *wish* ki nou kapab re annan sa lapros ankor.

Me selman mon konnen ou pe ganny lord dan en fason ou konnen nou pa tro, tro kapab montre konmsi sa kalite lanmitye ki nou ti annan avan, akoz pangar bannla i fer ou pas par lafnet parey zot ti fer Onorab William pas par lafnet.

Me selman annou vin ansanm, annou travay ansanm. Onorab Rocky Uranie osi mon envit ou, Onorab Doyace Porice annou travay ansanm pou byennet Praslin avek La Digue. Avek sa

2 mo mon dir ou mersi Mr Speaker.

(APPLAUSE)

MR DEPUTY SPEAKER

Mersi Onorab Woodcock, pou sa *droit de response*. Donk, in ariv ler prezan pou nou pran en vot lo Mosyon ki devan nou. E mon ava relir sa Mosyon dan lentere piblik ki pe swiv nou travay. Mosyon i dir sa Lasanble i demann Gouvernman pou kontinyen sa travay pou met an plas bann facilite ki manke lo Zil Pros parey *indoor gymnasium, judo dojo, microenterprise center, e track* sentetik ki pou anmenn plis devlopman lo Praslin avek La Digue.

Mon ava demann tou bann Manm ki an faver pou endike silvouple. Mersi. Eski i annan okenn Manm ki kont? Mersi. Donk, rezulta nou vot ki nou fek pran i annan 20 Manm ki'n vot an faver, 8 Manm in *abstain*, personn pa'n vot kont. Alor, sa Mosyon in ganny aprouve par Lasanble Nasyonal.

Sa in anmenn nou lafen nou travay pou sa Mardi. E byen zot ava vwar poudir nou'n go through *Order Paper* pou ozordi. E demen nou pa bezwen zwenn akoz napa travay, i arive sa parfwa dan lavi Lasanble Nasyonal. E sirtou bann semenn ki pe vini

devan nou, nou pou travay en kantite depi apepre le 4 Novanm nou pou ale en sel tre ziska pres Nwel. Donk, i ok?

Nou pou zwenn ABC demen, demen bomaten. Madanm Clerk in fini sirkil randevou. Donk, nou pou zwenn... mon war lanmen Manm anler avan nou ale. Ou annan en *point of order* Onorab?

HON WALLACE COSGROW

Mersi Mr Speaker. Yes Mr Speaker. En *matter of privilege*, apre midi. Mwan koman en Manm mon santi ki koman en Lasamble par egzanz si nou ti kapab donn plis letan Manm letan *Question Time* nou pa ti pou war nou dan en sityasyon kot Merkredi nou pa pe travay. Nou ti kapab donn Manm plis letan e nou ti pou travay Merkredi ti ava fer Mosyon. Bokou plis laklerte ti ava ganny donne dan bann kestyon.

La ozordi nou'n tay avek *Question Time*, prezan nou fini Merkredi napa travay. Mersi Mr Speaker.

MR DEPUTY SPEAKER

Mersi pou ou pwen. Mon krwar poudir ABC – ABC i en foronm konsilitativ ki annan reprezantan bann dirizan tou lede kote latab; *Leader of Government Business – Leader*

Lopozisyon – *Chief Whip LDS, Chief Whip United Seychelles*, laba ki nou merit pe diskit sa bann zafer. Ki'n arive la se ou dirizan in *fail* pou vwar ki pe arive e i pa'n anvoy latet.

Donk, i arriv koumsa e alor nou pa kapab dir nanryen. Donk, mon pa pou prolong sa deba lo sa pwen, nou pou termin-

(Off-Mic)

MR DEPUTY SPEAKER

Non-non napa *okenn matter of privilege*. Ou pran mikro pou vin dir ek mwan poudir mon'n *fail*? Ou ti dan ABC avek Speaker semenn pase, ou ti merit *raise* sa bann *issue*. La i vedir in fini. Nou ava zwenn Mardi. Mersi.

(ADJOURNMENT)